

Jon

Ölöwak Buᅇa Jonöᅇ ohoyök.

Jim-asa-asari

Jonöᅇ nanni ɢetᅇi Ölöwak Buᅇa kianɢöreᅇ aukᅇe ɢahö ohoyökmö, nanᅇaᅇgöra kewö jiza, “Gwarek Jisösnöᅇ uruᅇaᅇ jöpaköm waᅇgiyök.” (19.26) Jonöᅇ urujöpak urukalemgö keuᅇi kapaᅇ köla jimakza. Jonöᅇ Ölöwak Buᅇa ki mi ambazipnöᅇ keu kewö möt kutumegöra (20.31) ohoyök, “Jisös Kraist mi gölme aziyöhök ɢahö malökmö, öᅇa Anutugö Nahönᅇi aka Amötɢeɢe Toᅇi akza. Inᅇi mönö i möt köhöiba mewö miaᅇön malmal köhöikᅇi miwikᅇaime.” Jisösnöᅇ mutuk Iwigöreᅇ mala keu jᅇᅇa malök. (1.1) Mewö mala gölme azia aka ösum-mumuᅇi aka mötmötᅇi mi aiwesök aᅇgöletot memba miaᅇön kondelök. Mi kondela bemtohoᅇgö könaᅇi jim asariiga tosaᅇᅇaᅇ uruᅇiᅇi melenɢetka tosaᅇᅇaᅇ töndup yaᅇgiseᅇ aket.

Jisösnöᅇ kewö akza, jiyök: Amötɢeɢe Toᅇi (4.26), malmalgö nene wötᅇi (6.35), miri gölme euyaᅇgö buᅇaya (8.23), bem koᅇkoᅇ (8.58), gölme pak-pakö asakᅇi (9.5), naᅇgu (10.7), lama galöm ölöᅇᅇi (10.11), Anutugö Nahönᅇi (10.36), Kambu aka Böhi (13.13), kömupnöhök wahötwhöt Toᅇi aka malmal kömbönaᅇi Toᅇi (11.25), köna, keu öᅇi aka malmal köhöikᅇi (14.6), wain ip öᅇi (15.1), kulem namᅇi mutukᅇi aka teteköᅇi A aka Z (Ind 1.8), Mutukᅇi aka Qöndökᅇi (Ind 1.17) aka mewö mewö.

Jisösnöᅇ gwarekurupᅇi öᅇa jöpaköm eᅇgiba

malöhi, goro keu qöndöknan (Boñ 13-17) mi törörök kondelja. Keu mi nahömñambuk. Kömupnöhök wahötagun Pitö mem köhöimapköra kewö qesiyök: “Ni jöpaköm ningizan me qahö? Mewö akzan ewö, mönö alaurupni köyan köl engiman.”

Buk kiangö bahöñi bohonñi 6 mi kewö:

Keu mutukñi 1.1-18

Jon O-melun azi aka gwarekurup mutukñi 1.19-51

Jisösnöñ qenjarök nup meyök 2.1–12.50

Teteköñe Jerusalem kaba mala kömuyök 13.1–19.42

Guliba wahöta alaurupñi asuhum engiyök 20.1-31

Galili kaba gwarekurupñi asuhum engiyök 21.1-25

Anutugö numbu jitñi malmalñambuk.

¹ Könakönahine möpñangö möpñeyök keu jit malök. Yanön malmalgö könañi nangöba jiba kota malök. Keu jit yanön Anutugö qöhöröñe mala korök aka nanñak bem Anutuyöhök ahök.

² Keu jit yanön könakönahine Anutugö qöhöröñe malök. ³ Yanögö qöhöröñe mala bauköm wanñiiga yuai pakkak ahuyök. Yuai kun qahö bauköm wanñibawak, mi mönö qahö ahubawak. ⁴ Keu jit yanön malmal bömöññanök ahök. Yanğoren malmal köhöikñi miañön ambazip mem asarim enñiiga eka mala kotket. ⁵ Asakñan panaman uruñe asarimakzappmö, söñaupnöñ malgeri, yeñön asakñangö könañi mi qahö möt asariba mala kotket. Mewö.

6-7* Anutunöŋ ambazip körek pakpak asakŋi möt narimegöra möta kolek azi qetŋi Jon melaiiga asuhuyök. Asuhiba kaba asakŋaŋgö könaŋi indela naŋgöba jiba malök. ⁸ Jonöŋ nanŋak asakŋi mi qahö aka malökmö, yaŋön mönö asakŋaŋgö könaŋi mi naŋgöba jiba malök. ⁹ Asak ölbölŋi yaŋön ambazip gölme dop mem asarim neŋgimakzawi, yaŋön gölmenöŋ asuhumangö ahök.

¹⁰ Yaŋön könakönahiŋe gölmeŋi gölmeŋi miangö öröyuaiŋi pakpak mi nam köl eŋgiiga ahuget. Ahugetka nanŋak sutŋine mala korökmö, gölme ambazipnöŋ töndup i qahö möt kutum waŋgiba tönpin malget. ¹¹ Mewö tönpin malgetka nanŋi miri gölmeŋe kaiga könagesöurupŋan zikzik tököba nesampurek aka andö qem waŋgiget. ¹² Mewö aketmö, denike yeŋön köl öröm waŋgiba qetbuŋaŋi möta möt narigeri, yaŋön mönö körek yeŋgöra köna mesari kewö asuhuyök: Nanŋak nam köla kukösum eŋgiiga ahuahu dölökŋi ahiba Anutugö nahönböraturupŋi aket. ¹³ Anutugö jitsihitŋan mönö nam köl eŋgiiga asuhuget. Gölme azinöŋ jit sihitŋi wuatangöba anömŋambuk keu jöhöiga gölöm ala morö meiga asuhuzawi, yeŋön köna mewö mi-aŋön Anutugö nahönböraturupŋi qahö aket. Mewö.

¹⁴ Keu jit yaŋön azi silebuk aka sutnine anda kaba malök. Mewö maliga aködamunŋi uba eka malin. Iwiŋan Nahönŋi mohok-kungöra aködamunŋi pakpak ala aum köl waŋgiiga qainŋi kun maljawi, yaŋön mönö miangö dop kalem möriamŋan uruŋi kokolak qeiga aködamunŋambuk aka nalö dop keu öl töhöŋi jiba malök.

* **1:6-7:** Mat 3.1; Mak 1.4; Luk 3.1-2

¹⁵ Jonöŋ azi miangö könaŋi naŋgöba kewö qeta jiba malök, “Nöŋön kungöra keu jiba malali, yaŋön mönö mia akza. Kewö jiba malal: Nöŋgö andöne azi kun kamawi, nöŋön qahö asuhubiga yaŋön mutuk malök. Miangöra yaŋgö qetbuŋaŋan mönö ni nonŋita öŋgöŋgöŋi akza.” Jon O-melun azinöŋ mewö jiba malök.

¹⁶ Kalem möriamŋan azi miangö uruŋi kokolak qeiga aködammunŋambuk malöhi, yaŋön mönö miangö dop kötuetköm neŋgiba malök. Kötumötuetŋi mi nalöŋi nalöŋi mokoiga körek neŋgö qaknine öŋgöi malin. ¹⁷ Mosesnöŋ Köna keunini nam köli asuhuyökmö, Jisös Kraistnöŋ keu öŋŋi indel teköba Anutugö kalem möriamŋi nam köli aukŋe asuhuyök. ¹⁸ Gölme azi kunŋan Anutu nalö kunöŋ qahö ehök. Nahönŋi mohok-kunŋan Iwigö wösöŋe mala kota malöhi, yaŋön mönö gölmenöŋ eta könaŋi indel neŋgii mörin. Mewö.

Jon O-melun azinöŋ nanŋi könaŋi jim asariyök.

Mat 3.1-12; Mak 1.1-8; Luk 3.1-18

¹⁹ Juda jitŋememe yeŋön jike nup galöm aka jöwöwöl jikegö welenqeŋe tosatŋi Jerusalem sitinöhök melaim eŋgigetka Jongöreŋ kaget. Kaba qesim waŋgiba jiget, “Gi wani azia akzan? Könaŋamgi denöwö?” Mewö jigetka könaŋamŋi indela jii mötket.

²⁰ Könaŋamŋi qahö qaŋ kölökmö, aukŋe kewö jim miwikŋaiyök, “Nöŋön Amötqeŋe Tonji Kraist qahö akzal.”

²¹ *Mewö jiiga kapan köla qesim waŋgiget, “Gi mönö azi niŋia akzan? Gi Elaija (Elia) akzan me

* **1:21:** Dut 18.15, 18; Mal 4.5

qahö?” Qesim waŋgigetka “Qahö!” jiyök. “Gi kezapqetok azi kun akzan me qahö?” Mewö qesigetka “Mewö qahö!” melenök.

²² Melenniga qesiget, “Gi ninia akzan? Melaim nenngigetka kazini, yengöra mönö denöwö melennda jiin mötme? Gi nangi könagi denöwö jim asariman?”

²³*Qesigetka kewö jii mötket,
 “Kezapqetok azi Aisaianöŋ keu kun kewö jii ahöza,
 ‘Ni garata aka gölme qararaŋkölkölŋe mala
 kewö qerakzal: Kembunöŋ kamawo!
 Miangöra inini mönö uruŋini mindiŋgöba könaŋi
 mesata möhamgöget.’ Ni miangö kolek
 garataŋi akzal.”

²⁴ Azi melaim enngigetka Jongöreŋ kageri, mi Farisi (Köna keugö kapaŋkölköl) azia aket. ²⁵Yeŋön kunbuk kewö jiba qesim waŋgiget, “Gi Amötqeŋe Toŋi Kraist qahö akzan aka Elaija (Elia) me kezapqetok azi yengöreŋök kun qahö akzani, miangöra mönö wuanöŋgöra ambazip o melun mem enngimakzan?”

²⁶ Qesim waŋgigetka kewö melen enngiyök, “Nöŋön o töhönöŋ enngömirimakzalmö, azi kun inini qahö möt kutuzei, yaŋön lök sutŋine kinja.

²⁷ Azi kun nöŋgö andöne kamapköra jiba malali, yaŋön mönö mi. Yaŋön kaiga ketaŋamni aka malma. Miangöra nöŋön yaŋgö kösutŋe anda wayangösöŋi tenngöba köna esuŋangö kösöŋi pösatmamgö qötötaŋgömam.”

²⁸ Jonöŋ Jordan o likepŋe miri qetŋi Betani miangöreŋ mala ambazip o melun mem enngiba

* **1:23:** Ais 40.3

malök. Yuai mi mönö mianğöreñ asuhuyök. Mewö.

Jonöñ Jisösgöra “Anutugö lama moröñi,” jiyök.

²⁹ Mi asuhuiga miri gianjiiga Jonöñ Jisös tikep kaiga eka jiyök, “Eket, azi mi Anutugöreñ lama moröñi. Yanön mönö gölmeñi gölmeñi neñgö sinğisöndoknini köl könjörari solanibin. ³⁰ Nöñön kungöra keu jiba malali, yanön mönö mia akza. Kewö jiba malal: Nöñgö andöne azi kun kamawi, nöñön qahö asuhubiga yanön lök mutuhök malök. Mianğöra yangö qetbuñañan mönö ni nonğita öngöngöñi akza. ³¹ Nöñön i mutuk qahö möt kutuyalmö, Anutunöñ könañamñi Israel ambazip neñgöra indeli mötpingöra mötza. Mi möta ni melaim niñjiiga kaba o melun mem enğimakzal.”

³² Jonöñ mewö jiba dangunu ewö kinda nanğöba kewö jiyök, “Uña Töröñan mönö Suepnöhök eta kembö nei ewö yangö nöropñe eta köla tari ehal. ³³ Nöñön i mutuk qahö möt kutuba malalmö, kunöñ ambazip o melun mem enğimangöra melaim niñgiyöhi, yanön kewö jii möral, ‘Uña Töröñan kungö nöropñe eta köla tari ekñani, yanön mönö Uña Töröñi ambazip uruñine ala melun mem enğima.’ ³⁴ Nöñön mi ehalangöra aka könañamñi kewö nanğöba jizal, ‘Yanön Anutugö Nahönñi akza.’” Mewö.

Jisösnöñ gwarekurupñi mutukñi enğoholök.

³⁵ Mewö jiiga miri gianjiiga Jonöñ kunbuk o jitñe mianğöreñök aniga gwarekurupñi yengöreñök yahötñan yambuk mohotñe kinget. ³⁶ Kingetka Jisösnöñ mianğöreñ enğonğita anöhi, i törörök uba

ehiba jiyök, “Azi mi ehot. Yanjön mönö Anutugören lama moröni ewö akza.”

³⁷ Mewö jiiga gwarek yahöt yetkön keu mi möta Jisösgö andöne anohot. ³⁸ Anohotka Jisösnöñ lilingöba andöne kayohori, i etkeka kewö qesim etkiyök, “Injiri ninia jaruba kazahot?” Mi möta jiyohot, “Ketañamniri! Gi miri denike ahöba maljan?” (Juda yejön ‘Ketañamnini’ keu mi böhigöra jiget.)

³⁹ Mewö jiyohotka melenök, “Mönö kaba ehot!” Mewö melenniga wehön möñaiiga 4 kilok mianjö dop ahök. Wehön möñaiiga mianjören mohotje anda miri denike ahöba malöhi, mi eket. Mi eka mianjören yambuk malohotka miri söñauba sunjem aiga mosöta kayohot.

⁴⁰ Jonöñ keu jiiga gwarek yahötñan möta Jisösgö andöne anohori, yetkörenök kungö qetñi Andru, datñi qetñi Saimon Pitö. ⁴¹ Andru yanjön mutuk datñi Saimon miwikñaiba kewö jii mörök, “Niri Amötqeqe Tonji mönö miwikñaizit.” Amötqeqe Tonji mi Grik keunöñ Kraist. ⁴² Mewö jiba datñi wañgita Jisösgören anohot. Anohotka Jisösnöñ Saimon törörök uba ehiba jiyök, “Gi Saimon, Jongö nahönñi akzanmö, nöjön qetki Sifas qetpi ahöma.”* Mewö.

Jisösnöñ Filip aka Natanael etkoholök.

⁴³ Miri gianjiiga Jisösnöñ Galili prowinsnöñ an-mangö möta anda könanöñ azi qetñi Filip miwikñaiba kewö jii mörök, “Gi mönö ni nuatangöba kaman!” ⁴⁴ Filipnöñ Andru aka Pitö yetpuk mirinini mohok. Taonñini qetñi Betsaida.

* **1:42:** Sifas mi Grik keunöñ Pitö, nanine keunöñ köt jamönjin.

⁴⁵ Filipnönj azi qetnji Natanael miwikñaiba kewö jii mörök, “Mosesnönj azi kungöra Köna keunönj ohoba kezapqetok yenön toroqeba ohoget ahözawi, nini mönö azi mia miwikñaizin. Azi mi qetnji Jisös, iwiñi qetnji Josef, miriñi qetnji Nazaret.”

⁴⁶ Natanaelnönj mi möta welipköba jiyök, “O Nazaret! Mi miri qandakña. Yuai ölopñi kun mönö mianğoreñök asuhumawanğö dop qahö.” Mewö jiiga Filipnönj jii mörök, “Mönö kaba nangak ek kutuman!”

⁴⁷ Mewö jii möta Jisösgöreñ kaba asuhuiga eka yanğöra keu kewö jiyök, “Eket! Azi kianön mönö Israel azi ölni akza. Uruñe munen genmoni kun qahö.”

⁴⁸ Mewö jiiga Natanaelnönj qesim wanğiba jiyök, “Gi mönö denöwö aka ni möt kutum niñgizan?” Mewö jiiga Jisösnönj melenđa jiyök, “Gi fig ip† könañe tatnönğa gek kutuyal. Mutuk gek kutubiga Filipnönj mianğö bapñe geke goholök.”

⁴⁹ Mewö jiiga Natanaelnönj melenđa jii mörök, “O Ketañamni, gi mönö ölna Anutugö Nahönñi akzan. Gi Israel neñgöreñ azi Kembuya maljan!”

⁵⁰ Mewö jiiga Jisösnönj melenđa jiyök, “Ni mutuk kewö jizal, ‘Gi fig könañe tatnönğa gek kutuyal.’ Mewö jim miwikñaizalanğöra ölop möt narim niñgizan. Anutugöreñ kukösum ki eka mötzani, mi mönö yuai kötonđökñi akza. Ölni ketañi mi mönö bian eka möta malman.”

⁵¹ *Mewö jiba toroqeba jii mörök, “Nönön keu öl töhönñi kun kewö jibi mötnönj: Könañgep

† **1:48:** Fig mi sambu ewöya. Mi nupñine kömötkeka kötni nahömñambuk asuhuiga mi nalö gwötpuk nezema. * **1:51:** Jen 28.12

nöngö gwarekurupni aketka kutum enguasoriga imut kewö ekñe: Suep nanğunöñ taliga Anutugö garataurupñan asuhuba Suep gölmegö Azi Ölni yambuk nariba yangören eta öngöba aketka engekñe.” Mewö.

2

Jisösnöñ o mem letoriga wain ahök.

¹ Jisösnöñ Filip aka Natanael etkoholiga silimñi karöbut teköi malgetka kunöñ ambi memegö maren lömbuan ali tokoget. Mi Galili prowinsgö miri qetñi Kana miangören alget. Jisösgö namñan miangören mohotñe ani malget. ² Jisös aka yangö gwarekurupñi mi mewöyök öröm enğigetka lömbuanñöñ mohotñe malget. ³ Miangören malgetka wain onöñ qahöwahiga Jisös namñan nahönñangöra jiyök, “Yengören wain o qahöwakza.”

⁴ Mewö jiiga kewö jii mörök, “Namni, mi denöwö akñangöra jizan? Jim kutum niñgizan me? Nöngö anğöletot meme nalönan mönö qahö kam kuñguiga maljal.”

⁵ Mewö jii möta welenqeçe yengöra kewö jiyök, “Yañön yuai kungöra jim kutum enğimawi, mi inini ölop akñe.”

⁶ Juda yeñön amöt qem anğubingöra Köna keuñini wuatangöba böröñini sanğonmaljema. Miangö dop miri miangören köurañen ketani 6 tarök. Köurañen mohot mohot mi o gina 8 me 12 mianñon geba kokolak qenahangö dopñan tatket.

⁷ Jisösnöñ mi eka kewö jii mötket, “Inini mönö o uba kaba mokogetka köurañen ki kokolak qeget.” Mewö jii möta jiyöhangö dop aket. ⁸ Köurañen mi

kokolak qegetka kewö jim kutum enġiyök, “Mönö o qakñi tosatñi uba anda lömbuañ galöm wañgime.” Jim kutum enġiiga memba anget.

⁹ Uba angetmö, galömnöñ o letota wain ahöhi, mi memba möta denikeyök memba kageri, mi qahö möt asariba auruyök. Auruyökmö, welenqeqenöñ o ugeri, yeñön mi möta jigetka galömnöñ maren toñi oholi kayök. ¹⁰ Kaiga kewö jii mörök, “Maren nalöñe körek pakpak yeñön wain o ölöpnji mi mutuk memba kaba enġimakze aka mi memba enjololoñ aketkun wain o nahömnji qahö mi könangep enġimakze. Göñön wain o ölöpnji mi mutuk anġön köla qahö enġiba döлки nalö onġita memba kazan. Mi silik murutñi kun akzan.”

¹¹ Jisösnöñ anġöletot mutukñi ki mi Galili prowinsgö miri qetñi Kana mianġöreñ meyök. Mi memba mewö mianön kukösumñi indeliga asuhuyök. Mi asuhuiga gwarekurupñan möt narim wañgiget.

¹² *Közölömbuañnöñ malget teköiga Jisös, yañgö nam-munñi aka gwarekurupñi yeñön mirinjne Kaperneam anget. Mianġöreñ anda sömañ tosatñi toroqeba malget. Mewö.

Jisösnöñ jöwöwöl jike jim kömbuhiyök.

Mat 21.12-13; Mak 11.15-17; Luk 19.45-46

¹³ *Nalö mianġöreñ Juda neñgöreñ ak-kömükömu kendon nalöñan dopdowiyök. Anutunöñ mönöwök neñgehoriba neñgonġiröhi,* mianġöra

* **2:12:** Mat 4.13 * **2:13:** Eks 12.1-27 * **2:13:** Anutunöñ Ijpt mianġöreñ Israel ambazip neñgehoriba neñgonġirök, mianġö sösoñgainji mi Nei keunöñ Pasowa. Eksodus, Mekömekö 12.15

söngaingö aketka Jisösnöñ mewöyök miriñi mosöta Jerusalem sitinöñ öngöyök. ¹⁴ Sitinöñ öngöba jöwöwöl jikegö tohon uruñe anda yuai kewö miwikñaiyök: Ambazip bulmakau aziñi, lama aka kembö nei mi bohonñi memegöra alget aka tosatñan monerj utekutek albingöra tatkeri, mi engehök.

¹⁵ Mi engeka kösönöñ tapep (munğamunğa) mönjöñda mianön engohotiriba enguyök. Enguba ambazip mi körek közöl engiba lama bulmakaunambuk jöwöwöl jikenöhök enğuatangöyök. Utekutek ambazip yeñgö souje kötnini metaliga mokoba eriga tebolñini metali anget. ¹⁶ Kembö bohonñini memegöra algeri, ambazip mi kewö jim engiyök, “Yuai mi mönö memba kesala yaigep anget. Inini nöngö Iwinangö jöwöwöl jikenji ki mönö wuanöngöra utekögetka kölköl-örörö miri ewö akza?”

¹⁷ *Mewö jiiga Buña keu kun gwarek yeñgö mötmötñine kanğoriga mötmöriget. Keu mi kewö ohoget ahöza, “Nöngö urunan göhöreñ jike mi kömbukñi ahömapköra kapan kölbiga mianön urune newañ könöp ewö jeiga waimanjat mianön kawöl miwikñaimakzal.”

¹⁸ Mi közöl enğiiga Juda jitmeme yeñön tembula wahöta Jisösgöreñ kanğota kewö qesim wañgiget, “Gi mönö wani anğöletot kun aknöñga kukösumgi ehinga dop köl neñgiigun kimbi mewöñi akanak?”

¹⁹ *Mewö qesim wañgigetka kewö melen engiyök, “Inini jöwöwöl jike ki köndengetka

* **2:17:** Sum 69.9 * **2:19:** Mat 26.61; 27.40; Mak 14.58; 15.29

gölmenöŋ eriga nöŋön mi wehön karöbutkö uruŋe memba wahöta kuŋgumam.”

²⁰ Melenŋ enŋiiga kewö jiget, “Yambu (yara) 46:gö uruŋe jöwöwöl jike ki memba mala mem tekögetka asuhiba kinja aiga göŋön mi wehön karöbutkö uruŋe mönö denöwö aka memba wahöta kuŋgubanak?”

²¹ Mewö jigetmö, Jisösnöŋ jikegö keu mi nanŋi sileŋaŋgö söpsöpŋa ala jiyök. ²² Jisösnöŋ könaŋgep kömupnöhök wahöriga söpsöp keu jiyöhi, mi nalö miaŋgöreŋ gwarekurupŋi yeŋgö mötmötŋine kaŋgori ölöp möt asariget. Mi mötmöriba Jisösnöŋ keu jiyöhi, mi aka Buŋa keu ohogeri, mi pakpak möt nariget. Mewö.

Jisösnöŋ ambazip könaŋamni möt teköza.

²³ Jisösnöŋ Jerusalem sitinöŋ ak-kömükömu kendongö nalöŋe mala aŋgöletot kukösumŋambuk meyöhi, mi ambazip gwötpukŋan eka qetŋi möt nariba yaŋgöreŋ lapingöget. ²⁴ Lapingögetmö, Jisösnöŋ ambazip pakpak yeŋgö könaŋamni möt kutum teköyök. Mewögöra ambazip pakpak qahö möt narim teköm enŋiba keuŋinaŋgö bapŋe qahö anda malök. ²⁵ Ambazip uruŋine keu yuai ahöyöhi, Jisösnöŋ kuŋŋan ambazip uruŋinaŋgö könaŋi mi indela kondel waŋgimawaŋgö dop qahö ahök. Mönö nanŋak mi ölöp möt kutum teköyök. Mewö

3

Jisösnöŋ Nikodemus urumelenŋö könaŋi kusum waŋgiyök.

¹ Juda könagesögö jike kaunsöl sutŋine jitŋememe azi kun qetŋi Nikodemus malök. Yaŋön Farisi

(Köna keugö kapañkölköl) kambunöy kinök.
² Yañön sungem kunöy Jisösgöreñ kañgota kewö jii mörök, “Ketañamni, gi añgöletot memakzani, mi azi kunñan Anutu yambuk qahö kiniga nanñök memamgö osimakza. Miangöra gi Anutunöy nam köl gihiiga böhi akzan, mewö mötzin.”

³ Mewö jiiga kewö jiba melen wañgiyök, “Nöñön keu öl töhöññi kun kewö jibi mötnöy: Kunñan Anutugöreñök ahuahu dölökñi qahö ahuma ewö, yañön mönö Anutugö bemtohone añgota ekñamgö osima.”

⁴ Melen wañgiiga kewö jiyök, “Kunñan lök ahuba ambazip namñi aka malagun ahuahu dölökñi mönö denöwö ahubawak? Yañön mönö nam körö uruñe añgori kunbuk gölöm ala memamgö osima.”

⁵ Mewö jiiga kewö melenök, “Nöñön keu öl töhöññi kun kewö jibi mötnöy: Kunñan o melun mem wañgigetka Uña Töröñan uruñe geiga mewöñi mianñön ahuahu dölökñe qahö ahuzawa ewö, mewöñi mianñön mönö Anutugö bemtohone uruñe añgotmamgö osima. ⁶ Gölmegö iwinam eñgöreñök morö ahuzawi, mi gölme moröya. Uña Töröñan inahöba nam kölga morö asuhumakzawi, mi mönö Suepkö moröya.

⁷ “Mewögöra inini ahuahu dölökñi Anutugöreñök qahö ahume, mianñön mönö qahö dop kölja. Keu mi jibiga miangöra mönö kude auruman. ⁸ Luhutnöy nanñi imbi-imbi lañ giliga ötöñi mörakzanmö, mi denikeyök kaba gilakza aka denike gila anakzawi, gi miangö könañi qahö möt asarizan. Uña Töröñan ambazip nam köl eñgiiga ahuahu dölökñe ahugeri, körek yeñgö könañinan mönö luhut miangö dop akza.”

⁹ Mewö meleşniga Nikodemusnöŋ köŋkuŋ aka kewö jiyök, “Mi ahakö dop qahö.”

¹⁰ Mewö jiiga Jisösnöŋ jiyök, “Gi Israel könagesö kusum neŋgimakzan aka töndup keu mianğö könaŋi qahö möt asarizan. Mi kude dop kölja. ¹¹ Nöŋön keu öl töhöŋŋi kun kewö jibi mötnöŋ: Neŋön wania möt kutuzini, mi jiba indelakzin aka wania jeninan eka mötzini, mi naŋğöba jimakzin. Mewö ahakzinmö, eŋön töndup Buŋa keunini mi qahö möt aŋğön kölakze.

¹² “Gölmegö yuaini jenöŋ ehekŋi mianğö keuŋi jibiga möta qahö möt narim niŋgize ewö, nöŋön Suepkö yuaini qahö ehekŋi mianğö könaŋi jibiga mötmei, mi mönö denöwö möt naribeak? ¹³ Gölmegö azi kunŋan Suepnöŋ qahö öŋğöyökmö, Suep gölmegö Azi ölnan Suep mire mala eta asuhuyöhi, yaŋön mönö liliŋğöba Suepnöŋ öŋğöma.

¹⁴*“Anutunöŋ Moses gölme qararanğölkölŋe jim kutui kopö ainöŋ mokoleŋ imutŋi memba tohotnöŋ kösököi kinöhi, mianğö dop Suep gölmegö Azi Ölni mi kösökögetka öŋğöba kinma. ¹⁵ Ambazip i möt narim waŋgizei, yeŋön körek pakpak malmal köhöikŋi miwikŋaiba malmegöra aka eu öŋğöma.

¹⁶ “Mianğö könaŋi kewö: Ambazip i möt narim waŋgizei, yeŋğöreŋök kunŋan ayuhubapüköra Anutunöŋ gölme dop önöŋi qahö jöpaköm neŋgiyök. Neŋön körek letota malmal köhöikŋaŋğö buŋaya akingöra mönö Nahönŋi mohotsirik mi neŋgiyök. ¹⁷ Ambazip gölme dop mal anjini, Anutunöŋ Nahönŋi neŋğö keunini jim tekömapköra aka qahöpmö, Nahönŋan amöt neŋguiga kantri

* **3:14:** Jan 21.9

dop letota oyaenƙoyaen akingöra aka melaiiga gölmenöŋ erök.

¹⁸ “Ambazip kunŋan Nahönŋi möt narizawi, Anutunöŋ yaŋgö keuŋi jim teköiga qahö ayuhumapmö, kunŋan Jisös qahö möt narim waŋgizawi, Anutunöŋ yaŋgö keuŋi lök jim teköiga malja. Anutugö Nahönŋi mohotsirikö qetŋi qahö möt narizawaŋöra aka könöp siagö buŋaya akŋa. ¹⁹ Anutunöŋ gölme ambazip keunini jim tekömazawi, miangö könaŋi kewö: Asakŋan lök gölmenöŋ eta asuhuyökmö, ambazipnöŋ ahakmeme bölöŋi bölöŋi aka memba malget. Mewö mala Anutugö asakŋi tököba uruŋini söŋaupkö ahakmemenöŋ laŋ jöhöba mala kotket.

²⁰ “Körek pakpak ahakmeme bölöŋi ahakzei, yeŋön Anutugö asakŋi tököba andö qemakze. Anutunöŋ ahakmemeni bölöŋi bölöŋi mi indela jim enŋiiga gamuŋini mötpepuköra keŋgötŋini mörakze. Mi möta asakŋaŋgö uruŋe qahö aŋgorakze. ²¹ Qahö aŋgorakzemö, kunŋan kun keu öŋi wuatangöba maljawi, yaŋön ölöp asakŋaŋgö uruŋe kaŋgotma. Anutunöŋ sölölohöm waŋgiiga ahakmemeni aka memba malöhi, miangöra ahakmemeni mianön aukŋe asuhumapköra mötza.” Mewö.

Jon O-melun azinöŋ Jisösgö könaŋi jim miwikŋaiyök.

²² Jisösnöŋ mewö jim teköba kinda gwarekurupŋi enŋuaŋgita Jerusalem siti mosöta Judia prowinsgö miri andöŋe anget. Miangöreŋ anda gwarekurupŋi yembuk sonda tosatŋi toroqeba yembuk mala ambazip o melun mem enŋiba malök. ²³ Jisösnöŋ mewö malökmö, Jonöŋ

mewöyök miri qetņi Salim mianğö kösutņe malök. Miri qetņi Aion mianğöreņ o jök ahöyök aka ambazipnöņ Jongöreņ kaņgota o melun mem eņgimapkö qesigetka amqeba mem eņgiba malök. ²⁴*Nalö mianğöreņ Jon mi kösö mire qahö algetka tarök.

²⁵ Juda yeņön amöt qem aņgubingöra böröņini saņgoņmaljema. Mewögöra Jongö gwarekurupņi yeņön Juda azi kunbuk keu mianğö goranora aka könahiba jitnakölik jiget. ²⁶Mewö jigetka lömböriiga Jongöreņ kaba kewö jiget mörök, “Ketaņamnini mötnöņ, azi Jordan o likepņe göbuk maliga nan-gak könaņamņi naņğöba jinöņi, yaņön ambazip o melun mem eņgiiga jesöņğöņan mönö yaņğöreņ anakze.”

²⁷Jonöņ mi möta kewö meleņnök, “Anutunöņ azi kungöra yuai kun Suepnöhök qahö al waņgibawak ewö, yaņön mönö mi buņa qem aņgumangö osiza.

²⁸*Yambuk mala kewö jial, ‘Ni Amötqeqe Toņi Kraist qahö akzalmö, Anutunöņ melaim niņgiiga mutuk kazala yaņön andöne kama.’ Nöņön keu mi jiali, iņini mi ölop nanņinak naņğöba jiba malbea-haņğö dop akze. ²⁹Mianğö keuņi dop ala kewö jimam: Azi kunņan ambi buņaambuk aka ambi memangöra sösöņgai keu jim sehiba malja. Mewö maliga azi alañan kösutņe kinda sösöņgai keuņağö jölņi möta yaņğöra önöņi qahö söņgaimakza. Mianğö dop nöņön Jisösgö alaņi aka yaņğöra söņgaibiga sösöņgai mianjön döłki uruni kokolak qeiga maljal. ³⁰Jisösgö qetbuņaņan qarim sehiiga nöņğöreņan mönö waziiga dop kölma.” Mewö.

* **3:24:** Mat 14.3; Mak 6.17; Luk 3.19-20 * **3:28:** Jon 1.20

Jisösnöŋ Suepnöhök eröhaŋgö könaŋi jiyök.

³¹ “Daŋön euyangörenök eröhi, yaŋön ambazip körek pakpak enŋonŋita öngöŋgöŋi akza. Kunŋan gölmenöŋ asuhiba gölmegö buŋaya akza aka gölmenöŋ malmalgö keuŋi jimakza. Suepnöhök eta kayöhaŋön mönö körek pakpak enŋonŋita öngöŋgöŋi akza. ³² Yaŋön yuai eka möt kutuba malöhi, miangö könaŋi jiba naŋgöba dangunu ewö kinja. Mewö kinjapmö, naŋgönaŋgö keuŋi mi ambazip kunŋan kun qahö möt aŋgön kölja.

³³ “Ambazip kunŋan naŋgönaŋgö keuŋi möt aŋgön köljawi, yaŋön Anutu ölbölŋi akzawaŋgö keuŋi mem köhöiiga pöwöwömŋi akŋa. ³⁴ Anutunöŋ kolek aziŋi melaiba Uŋaŋi Töröŋi musa qakŋe qahöpmö, kelenmalelen waŋgimakza. Miangöra kolek aziŋan mönö Anutugö keu töhöŋŋi indela jimakza. ³⁵ *Iwinöŋ Nahönŋi uruŋan jöpaköm waŋgimakzawaŋgöra aka yuai pakpak buŋa qem waŋgiba böröŋe ali ahöza.

³⁶ “Ambazip kunŋan Nahönŋi möt nariba uruŋi melenjawi, yaŋön mönö kunbuk letota malmal köhöikŋaŋgö buŋaya akza. Kunŋan Nahönŋaŋgö keuŋi qahö tem kölakzawi, Anutugö irimesewölŋan mönö yaŋgö qakŋe öngöba pöndaŋ kini malmal köhöikŋaŋgö könaŋi qahö ek kutuba önewat laŋ malja.” Mewö

4

Jisösnöŋ Samaria ambi kunbuk keu eraum mörohot.

* **3:35:** Mat 11.27; Luk 10.22

¹ Jisösnöŋ mewö ambazip kusum enŋiiga gwarekurupŋi aketka o melun mem enŋiba mewö mianjön Jon O-melun azi luhut ala malöhi, keu mi Farisi (Köna keugö kapaŋkölköl) yeŋgö kezapŋine gei mötket. Yeŋön mi mötkeri, buzup mi jiget sehiba Kembugö kezapŋe gei mörök. ² Jisösnöŋ nanŋak ambazip qahö o melun enŋiyökmö, yaŋön jiiga gwarekurupŋan mi aket. ³ Mi möta Judia prowins mosöta lilingöba kunbuk Galili prowinsnöŋ göröken anget. ⁴ Köna mewö anda Samaria prowins onŋita anget.

⁵ *Onŋita anda Samaria prowinsgö taonŋi kun qetŋi Sikar mianjörenj angorök. Sikar taon mi Jeikobnöŋ gölme bahöŋi kun nahönŋi Josef waŋgiyöhi, mianjögö kösutŋe ahöza. ⁶ Jeikobkö o lömŋi diginŋambuk mi Sikar taonöŋ ahöza. Jisösnöŋ köna kayohaŋgöra aka silenŋi lömböriiga silim bibiŋe o lömŋi mianjörenj angota kösutŋe eta tarök.

⁷ O löm kösutŋe tariga Samaria ambi kunöŋ o umangö kayök. Kaiga Jisösnöŋ eka kewö jii mörök, “Gi ölöp o niŋginöŋga nembilenjak.” ⁸ Nalö mianjörenj gwarekurupŋan nene bohönŋi memb- ingöra i mosöta taonöŋ angetka nanŋirök kinohot.

⁹ *Juda ambazipnöŋ Samaria prowins qepureim enŋiba yembuk köisirik qahö maljema aka pake mohot mianjön o qahö uzema. Mewögöra nanŋirök kinohot mianjörenj ambinöŋ kewö jii mörök, “Gi Juda azia aiga ni Samaria ambiapmö, denöwögöra ‘O niŋginöŋga nembilenjak,’ jiba qesim niŋgizan?”

* **4:5:** Jen 33.19; Jos 24.32 * **4:9:** Esra 4.1-5; Neh 4.1-2

10 Jisösnöŋ qeçesi mi möta kewö melenŋ waŋgiyök, “Gi Anutu kalemŋaŋgö könaŋi möt kutunöŋga dop kölbawak. Daŋön ‘O niŋginöŋga nembilenak,’ jiba qesim gihizawi, yaŋgö könaŋi möt asaribanak ewö, i mönö qesinöŋga malmalgö öŋi gihibawak.”

11 Mewö jiiga kewö jii mörök, “O ketaŋamni, o umamgö pakegi kun qahö ahöza aka o löm kianöŋ mönö diginŋambuk akza. Mianŋöra malmalgö ogöra jizani, mi mönö denikeyök miwikŋainöŋga ahubawak? 12 Isik bömönini Jeikob yaŋön o lömŋi ki neŋgiyök. Yaŋön mutuk nanŋak aka yaŋgö andöŋe nahönurupŋan ki kaba o uba nemba maljema aka bulmakau kambuŋi kambuŋi o eŋgigetka nemba maljema. Gi Jeikob oŋgita öŋgöŋgöŋi aka ambazip o mem sehim eŋgimamgö jizan me?”

13 Mi möta Jisösnöŋ kewö melenŋök, “Ambazip körekŋan o ki nembagun mönö kunbuk ogö kömumba nemingö mörakŋe. 14 Mewö malmemö, nöŋön kungöra o waŋgimami, yaŋön mi nembagun nalö kunöŋ ogö kunbuk qahö kömuma. Mewö qahöpmö, o waŋgimami, mi mönö yaŋgö uruŋe letota malmalgö o jeŋi jöpjöpköŋi qahö aiga malma. Mewö mali mönö uzumgöba malmal köhöikŋi teteköŋi qahö waŋgimakŋa.”

15 Mewö melenŋiga ambinöŋ jiyök, “O ketaŋamni, gi mönö o mia niŋginöŋga nembu. Mi nembagun nalöŋi nalöŋi kunbuk ogö qahö kömumbilenak aka o umamgöra ki könasöksök qahö tibilenak.”

16 Mi jiiga kewö jim kutum waŋgiyök, “Gi mönö anda apki waŋgita ki kamahot.”

17 Mewö jim kutum wanjiiga “Ni apni qahö,” jiba meleşnök. Meleşniga kewö jii mörök, “Gi ‘Apni qahö,’ keu mi törörök jizan. 18 Gi ölņa azi 5 enğömembra malnöŋ aka merak kun memba maljani, yaŋön mönö göhö apki qahö akza. Keu jizani, mi öl töhöŋņa.”

19 Ambinöŋ mi möta kewö jii mörök, “Ketaŋamni, gi mönö kezapqetok azi qainŋi kun akzan. Nöŋön tandöki mewö gek kutum gihizal. 20 Neŋgö ambösakonurupninan kundunji kondela kiangören ŋgöba sipköba köuluköba malgetmö, Juda enön kewö jimakze, ‘Samaria enön mönö Jerusalem sitinöŋ ŋgöba jöwöwöl jikenöŋ sipköba köulukögetka dop kölja.’ ”

21 Mi möta Jisösnöŋ kewö jim kutuyök, “O ambi, nalö kun kam kuŋguma. İjini nalö miangören İwi waikŋi memba möpöseibingöra kundunji kiangören me Jerusalem miangören qahö ŋgöba malme. Gi keu mi ölop möt narinöŋga dop kölma. 22 Samaria ijini Anutugö könaŋi törörök qahö möt kutuba töndup yaŋgö waikŋi laŋ memba möpöseimakze. Amötqegegö könaŋi mi Juda neŋgö sutnine aukŋe asuhuba ahöza. Miangöra Juda neŋön Anutuninaŋgö könaŋi möt kutuba waikŋi memba möpöseininga dop kölja.

23 “Töndup nalö kun kewö asuhuma: Nalö miangören Uŋa Töröŋan ambazip sölölohöba inahöm enjiiga keu ölŋi wuatangöba İwi waikŋi memba ölņa möpöseiba malme. İwininan ambazip mewöŋi jarum enğiba asuhumegöra sihimŋi möta malja. Nalö murutŋi miangön mönö lök kam kuŋguba döлки ahöza. 24 Anutunöŋ

Uņaya akza. Mianğöra Uņa mianğö waikņi memba möpöseimakzei, yeņön mönö Uņa Töröņan sölölöhöba inahöm enjiiga keu ölni wuatangöba möpöseiba malme.”

²⁵ Jisösnöņ mewö jim kutuiga ambinöņ jii mörök, “Amötqeqe Toņi qetņi Kraist qetzei, yaņön kamangö akza, mi mötzal. Yaņön kamawi, nalö mianğöreņ mönö keu pakpak indel neņgiiga mötpin.”

²⁶ Jisösnöņ keu mi möta kōnaņi kewö indelök, “Göbuk ki kinda keu eraum mötziri, nöņön mönö mia akzal.” Mewö.

Gwarek yeņön kaba yetpuk toroqeget.

²⁷ Kōnaņamņi indeliga gwarek yeņön mianğöreņök lilingöba kaget. Kaba ambibuk eraum mörohot, mi eka welipkögetmö, kunöņ kewö qahö qesiyök, “Gi denöwögöra yambuk keukeu jizahot?” me “Wanigöra ak gihiza?” Mewö qesibingö mötketmö, körekņan ölöņ tatket.

²⁸ Ölöņ tatketka ambinöņ o pakeņi mosöta taonöņ anda ambazip yeņgöra kewö indela jii mötket, ²⁹ “Mötket! Nöņön azi kun miwikņaibiga yuai pakpak aka malali, mianğö kōnaņi indela jii mötzal. Mianğöra yaņön mönö Amötqeqe Toņi Kraist akapuk. Mönö nanņinak kaba azi mi ekņe.”

³⁰ Keu mi möta taon mosöta öröba Jisösgöreņ anget.

³¹ Gwarek yeņön nalö sutņe mianğöreņ Jisös qesim waņgiba kewö jiget, “Ketaņamnini, ölöp nene nenöņ.”

³² Mewö jigetmö, kewö jiyök, “Nöņön neneņamni qainņi kun memba maljali, inņini mianğö kōnaņi qahö möt kutuze. Qahö!”

³³ Mi möta nanñini qesim aᅅguba kewö jiget, “Kunñan nene kun memba kaba waᅅgiza me denöwö?”

³⁴ Mewö jigetka kewö jii mötket, “Melaim niᅅgiiga kayali, nöñön yaᅅgö jitñi tem köla nupñi mem sorokömakzali, mianñön mönö nöᅅgö nenenamni akza. ³⁵ Inini keu kewö jibepuk, ‘Köin 4 kunbuk ahöiga ölöm-izi-izi nalöñan törima.’ Mötket, nöñön mianğöra kewö jizala kezap alget: Nup boni ketañi miᅅᅅgö ölninan lök öliiga meme nalöñinan kam kuᅅguza. Inini mönö jeñini uget aniga mi uruᅅine ek kutume. ³⁶ Tosatñan mutuk keu kötni qesinᅅa gila malgetka ölnan nalö kewöᅅe asuhuiga tosatñan mi lök tokoba töwanini megetka ambazipñi ambazipñi malmal köhöikᅅaᅅgö buᅅaya ahakze. Mewö asuhuiga ölni meme yeñön qesinᅅ gilgil ambazip yembuk mindiriba mohotᅅe söᅅgaiba simbawoᅅ mötze.

³⁷ ‘Kunöᅅ kötni qesinᅅ giliga kunöᅅ ölni mezawi,’ keu mewö jimakzei, mi keu ölna. Mi Anu-tugö nup memegö könaᅅi indelja. ³⁸ Nöñön inini melaim eᅅᅅibiga nup qainñi kunöᅅ nanñinak yuai kötni qahö kömötkeri, mönö nup mianğoreᅅ anda ölni meme. Tosatñan mutuk silenini qeba nup memba malgetka eᅅön yeᅅgö könaᅅine anda nup megeraᅅgö ölni miwikᅅaiba memakᅅe. Mewö melaim eᅅᅅizal.” Mewö

Samaria ambazip gwötpukñan uruᅅini melenᅅet.

³⁹ Samaria ambinöᅅ keu kewö naᅅgöba jiyök, “Nöñön azi kun miwikᅅaibiga yuai pakpak aka malali, yaᅅön mönö mianğö könaᅅi indela jii mötzal.” Mewö jiyöhaᅅgöra Samaria ambazip

gwötpukñan Sikar taon miangören uruñini melenða Jisös möt narim wangiget. ⁴⁰ Möt narim wangiba yangören kaba yembuk toroqeba malmapköra kapan köla qesigetka silim yahötkö dop toroqeba miangören malök.

⁴¹ Mewö mala keu jiba malöhangöra aka gwötpukñan Jisös möt nariba toroqem wangigetka kambuñini qariyök. ⁴² Toroqem wangiba ambigöra kewö jiget, “Azi kianön ölña gölmenji gölmenji nengören Amötqeqe Tonina akza. Neñön mi göhö keugörök qahö toroqeba möt narizinmö, mi naninak kezap ala möta möt kutuzin.” Mewö.

Jisösnöñ jembon azi kungö nahönñi mem ölöwahök.

⁴³ Jisösnöñ Samaria maliga silim yahöt teköiga engömosöta Galili prowinsnöñ anök. ⁴⁴ *Jisösnöñ nanjak nalö kunöñ keu kun kewö nangöba jiyök, “Kezapqetok ambazip kunñan nanñe miri gölmenöñ maliga yangöra qahö mötket öngöiga göda qahö qem wangimakze.”

⁴⁵ *Mewö jiyökmö, töndup nalö miangören nanñe Galili prowinsnöñ kanğoriga miangören mewöyök tosatñan jölöñi jiget. Yeñön ak-kömükömu kendongöra Jerusalem sitinöñ öngöba Jisösnöñ kendon nalöñe angöletot meyöhi, mi pakkak eka mötket. Miangöra nalö miangören ölop köl öröm wangiget.

⁴⁶ *Galili prowins yeñön köl öröm wangigetka miri qetñi Kana mutuk o meiga letota wain ahöhi, miangören kunbuk kayök. Taon qetñi Kaperneam

* **4:44:** Mat 13.57; Mak 6.4; Luk 4.24 * **4:45:** Jon 2.23 * **4:46:** Jon 2.1-11

miaŋgöreŋ kiŋ kembugö jembonŋi kun malök. Yaŋgö nahönŋan kawöl yöhöiga ahöyök.

⁴⁷ Ahöba kömumamgö ahök. Miaŋgöra Jisösnöŋ Judia prowins mosöta Galili uruŋe kayöhi, yaŋön miaŋgö buzupŋi möta Jisösgöreŋ anda kewö qesim waŋgiyök, “Gi ölop kaba nahöni mem ölöwak waŋgiman.” ⁴⁸ Qesim waŋgiiga kewö jii mörök, “Iŋini ni öne qahö möt narim niŋgimeangö dop akzei, mi qahö dop kölja. Nöŋön aŋgöletot aiwesök membi ekagun mönö amqeba ni möt narim niŋgiba uruŋini melenbeak.”

⁴⁹ Mewö jii mörökmö, jembonöŋ kewö jiyök, “Ketajanni, nahönan kömumbapuköra mönö ösumok kaman.”

⁵⁰ Mewö jiiga melen waŋgiyök, “Nahöngan mönö ölöwaka malma. Miaŋgöra mönö ölop lilingöba anman.” Mewö melen waŋgiiga yaŋön mi möt nariba lilingöba anök. ⁵¹ Anda könanöŋ maliga welenqequeurupŋan kaba miwikŋaiba kewö jiget mörök, “Nahöngan lök ölöwaka malja.”

⁵² Mi möta qesim enjiba jiyök, “Wani nalönöŋ könahiba ölöwahök?” Mewö jiiga jiget mörök, “Uran mare wan kilok miaŋgöreŋ sile könöpŋi mosörök.” ⁵³ Mi möta mötmötŋi kewö ahuba asariyök: Aha! Jisösnöŋ “Nahöngan mönö ölöwaka malma,” jiyöhi, mönö aua miaŋgöreŋök ölöwahök. Keu mi möt asariba i aka saiwaurupŋi pakpak yeŋön uruŋini melenja Jisös möt narim waŋgiget.

⁵⁴ Jisösnöŋ Judia mosöta Galili prowins uruŋe kaba aŋgöletot kun ki meiga yahöt ahök. Mewö.

5

Jisösnöŋ Betesda o aŋgö jitŋe azi kun mem ölöwahök.

¹ Könangeŋ nalö kunöŋ Juda yeŋgö kendon ketani kun töriiga Jisösnöŋ Jerusalem sitinöŋ öŋgöyök.

² Jerusalem sitigö selnöŋ naŋgu kun mi lama yeŋgöra ahöyök. Miangö kösutŋe o aŋgö kun qetŋi Hibru keunöŋ Betesda qetkeri, mi ahöyök. Miangö göraŋe luhut miri köröpŋi ketani 5 tatket.

³ Luhut miri 5 miangö uruŋe kawöl ambazip kambu ketani ahözema. Tosatŋan jeŋini gömölii tatket. Tosatŋan simalokon aka tatket. Tosatŋan likepŋini kömükömuŋa tatket.*

⁴ Nalö tosatŋe Kembugöreŋ garata kunöŋ eta o aŋgönöŋ timjaliiga unduzapma. Onöŋ unduiga nalö miangöreŋök kunŋan mutuk aŋgönöŋ geiga kawölŋi mi me mi mianön ölöwahakzapma. Miangöra mamböta tatket. ⁵ Miangöreŋ azi kun yambu (yara) 38 miangö dop kawöl yöhöiga ahömalök. ⁶ Miangöreŋ ahöiga Jisösnöŋ kaŋgota eka lök nalö köröp tiŋtiŋi kawöl yöhöi ahöba malöhi, mi möta kewö qesim waŋgiyök, “Gi ölöwakŋangö ak gihiza me qahö?”

⁷ Qesim waŋgiiga kewö melenŋ waŋgiyök, “O Kambu, onöŋ unduba ötöŋ qeiga alani danön noaŋgita o aŋgönöŋ anda al niŋgibawak? Alani mewöŋi kun qahö malja. Nanak anmamgö möta esapköba malali, nalö miangöreŋök tosatŋi yeŋgöreŋök kunöŋ ni noŋgita anda gemalget.”

* **5:3:** Mötmöt ambazip tosatŋan kewö mötmörimakze: Könakönahiŋe jabö 3:gö kitipŋi teteköŋi aka jabö 4 mi kewö ohoget ahöyök: Yeŋön o aŋgönöŋ gwözöŋda undumapkö mamböta tatzema.

⁸ Melen waŋgiiga Jisösnöŋ jii mörök, “Gi mönö wahöta tumbulahöpki memba anöŋ.” ⁹ Mewö jii möta miangörenök ölöwaka tumbulahöpŋi memba anök. Anökmö, yuai mi Sabat kendonöŋ asuhuyök. ¹⁰ *Miangöra Juda yeŋön azi ölöwahöhi, yaŋgöra kewö jiget mörök, “Merak Sabat kendon akza. Miangöra tumbulahöpki memba aŋgunöŋga qahö dop kölja.”

¹¹ Mi möta kewö meleni mötket, “Möhamgöm niŋgizawaŋön mönö kewö jim teköm niŋgiza, ‘Gi mönö tumbulahöpki memba anöŋ.’”

¹² Mi möta kewö qesim waŋgiget, “Azi daŋön göhöra ‘Tumbulahöpki memba anöŋ,’ jiza?”

¹³ Qesim waŋgigetmö, Jisösnöŋ mem ölöwahiga ambazip kambu ketanjan ölökögetka yeŋgö sutŋineyök sömuniba anök. Miangöra daŋön mi ak waŋgiyöhi, mi qahö möta tönpin kinök.

¹⁴ Miangö andöŋe jöwöwöl jike tohoŋ uruŋe öŋgöiga Jisösnöŋ miangören miwikŋaim waŋgiba qambaŋ keu kewö jii mörök, “Mötnöŋ, gi lök ölöwakzan. Miangöra ayuayuhu törösait bölöŋi kötökŋi kun asuhum gihibapuköra mönö siŋgisöndok kunbuk kude aka malman.”

¹⁵ Azi ölöwahöhi, yaŋön Jisös ek kutuba anda Juda jitŋememe yeŋgöra kewö jii mötket, “Azi mem ölöwak niŋgiyöhi, yaŋgö qetŋi Jisös.” ¹⁶ Mi möta Jisösnöŋ Sabat kendonöŋ nup mewöŋi meyöhi, Juda jitŋememe yeŋön miangöra aka sesewerowero ak waŋgiba malget. ¹⁷ Mewö malgetmö, Jisösnöŋ kewö melen eŋgiyök, “Nöŋgö

* **5:10:** Neh 13.19; Jer 17.21

Iwinan sundan dop nup memakza aiga nöñön mewöñanök mi memakzal.”

¹⁸ Mewö meleş engiba ambazip Sabat kendongö keu tosatñi toroqeba algetka Jisösnöñ mi ahak-memenjan qeapköba yeñgö jeñine siñgisöndok ahök. Siñgisöndok mi toroqeba Anutugöra ‘Iwini’ jiba Anutu tandök ewö maljawañgö dop aka nanñi mem öñgöyök. Juda ambazip yeñön yuai yahöt miangöra aka möt kömbuhiba kapan köla Jisös qe-bingö jim köhöiget. Mewö.

Malmal gulimapkö kukösumñi mi Jisösgöreñ ahöza.

¹⁹ Mewö aketmö, Jisösnöñ keu kewö jii mötket, “Nöñön keu öl töhönñi kun kewö jibi mötket: Nahönöñ nanñi uruñangö yuai kun qahö memakzapmö, Iwinöñ yuai memakzawi, Nahönñan mönö mewöñanök memakza. Miangöra Iwinöñ yuai meiga ehakzawi, yañön mönö miyök memakza. ²⁰ Iwinöñ Nahönñi urunöñ jöpaköm wañgiba mala nanñak nup memakzawi, mi pakpak kondel wañgimakza. Miangöra añgöletot eka maljei, mi yuai eretñi. Miangö ölni mi könañgep kondel enjiiga eka nemböñini teköi welipköba malme.

²¹ “Kun kewögöra welipköme: Iwinöñ ambazip kömükömuñi engömindiga gulimakze. Nahönñan mönö miangö dop mewöñanök ambazip köhömuñi niñia gulimegö mötzawi, mi engömindiga gulimakze. ²² Mewöñanök Iwinöñ kungö keuñi qahö jim tekömakzapmö, jimtekötekö nupkö kukösumñi pakpak mi kewögöra Nahönñangö böröñe ali ahöza:

²³ “Ambazip Iwi göda qem waŋgimakzei, miangö dop körekŋan Nahönŋi göda qem waŋgimegöra mötza. Iwinöŋ Nahönŋi melaim waŋgiyök. Miangöra kunŋan Nahön qahö göda qem waŋgizawi, yaŋön mönö Iwi mewöyök göda qahö qem waŋgiza.

²⁴ “Miangöra nöŋön keu öl töhöŋŋi kun kewö jibi mötket: Kunŋan nöŋgöreŋ Buŋa keu möta mötmöriba ni melaim niŋgiyöhi, i möt narim waŋgiza ewö, yaŋön mönö malmal köhöikŋaŋgö buŋaya akza. Nöŋön keuŋi jim teköbiga könöp siagö buŋaya qahö akŋa. Kömup köhöikŋaŋgö likepŋi mosöta jabö kutuba malmal köhöikŋaŋgö likepŋe aŋgota mal öŋgöma.

²⁵ “Nöŋön keu öl töhöŋŋi kun kewö jibi mötket: Nalö kun kama aka nöŋgöra aka lök kam kuŋguza. Nalö miangöreŋ siŋgisöndok aka uru köhömuŋi akzei, yeŋön Anutugö Nahönŋan keu qeri mötme. Mi möta tem kölmeaŋön mönö guliba köhöiba malme. ²⁶ Mi kewögöra: Iwinöŋ nanŋak malmal köhöikŋi kondorakzawi, miangö dop malmal gulim köhöimapkö kukösumŋi mi Nahönŋi waŋgii yaŋön mewöyök ambazip mem gulim eŋgimakza.

²⁷ Yaŋön Suep gölmegö Azi Ölni maljawangöra aka Iwinöŋ ambazip keuŋini jim tekömapkö kukösumŋi mewöyök yaŋgö böröŋe ali buŋaŋi ahök.

²⁸ “Nöŋön keu kötŋi jizali, miangöra mönö kude aurume. Nalö kun kam kuŋgumawi, miangöreŋ körek pakpak qaksirinöŋ ahözei, yeŋön mewöyök qet qetmawi, mi mötme. ²⁹ *Qetŋi mi möta wahöta aukŋe asuhugetka ahakmeme ölöpŋi aka

* 5:29: Dan 12.2

malgerañon malmal köhöikne öngömemö, ahakememe bölöni aka malgeri, nöñon yeñgö keuñini jim teköbiga kömup köhöikñangö bunaya akne. ³⁰ Nöñon nani urunañgö yuai kun nanak aka memamgö osizal. Ni Iwigö jitne mörakzali, mönö miangö dop ambazip keuñini jim teköm engimakzal. Nani imbinangö dop lañ qahö memakzalmö, melaim niñgiyöhi, mönö yangö keuñi wuatañgömakzal. Miangöra jimtekötekö keuni jimakzali, mi mönö dopneyök asuhumakza.” Mewö.

Tosatñan Jisösgö könañamñi nañgöba jiget.

³¹ “Nöñon nani könañamni nañgöba jibilenjak ewö, keuni mianñon ölop qahö köhöibawak. ³² Alani kunöñ nöñgö könañamni nañgöba jimakza. Yañon nöñgöra keu jimakzawi, mianñon mönö köhöiba öljambuk akza, mi mötzal. ³³ *Inini jitñememe melaim engigetka Jongöreñ kagetka keu ölnangö dop nöñgö könañamni indela jiba nañgöyök.

³⁴ “Jiba nañgöyökmö, nöñon gölme azigö nañgönañgö keuñi mi möta qahö mötpi öngöza. Qahö öngözapmö, Jongö nañgönañgö keugöra jimakzali, mi mönö inini nalö kewöñe letotketka Anutunöñ bohonñini jöhömapköra aka jimakzal. ³⁵ Jonöñ kiwa ketañi aka ölopñanök jeba asariyökmö, inini nalö köröpñi qahöpmö, töröptökñanök yangö asakne lañ söñgaibingö sihimñi mötket.

³⁶ “Jonöñ könani töröptökñanök jiiga mötketmö, kunöñ mi nañgöba jimakzawi, yangö keuñan mönö Jongöreñ nañgönañgö keu oñgitza. Nani Iwinan nupñi al niñgii membiga ölni asuhumakza. Ölni

* 5:33: Jon 1.19-27; 3.27-30

mianjön mönö könañamni kewö nañgöba indelakza: Iwinöñ mönö melaim niñgii jitñje memenji akzal.

³⁷ *Iwinöñ melaim niñgii erali, yañön könañamni nañgöba jiba malök. Inini nalö kunöñ yañgö keu kourukñi qahö mötket aka kaisoñgolomñi qahö eket. ³⁸ Yañön niñja melaiiga eröhi, inini i qahö möt narim wañgize. Miangöra yañgö keuñan mönö eñgö uruñine qahö kinja.

³⁹ “Inini malmal köhöikñangö könañi mi Buña Kimbinöñ ahöm eñgiza, mewö mötmöriba mi oyoñda uru köñömñine ala Suepkö buñaya akingö mötze. Mewö mötzemö, kimbiñi kimbiñi pakpak mienjön mönö nöñgö könañamni nañgöba indelakze. Mi möt yaköze me qahö?

⁴⁰ Nañgönañgö keu gwötpuk ahözapmö, inini malmal köhöikñi buña qem añgubingöra nöñgöreñ kabingö tökömakze.

⁴¹ “Gölme ambazipnöñ qetbuña niñgigetka qarimapköra qahö mambötzal. Mi niñgigetka mötpi qahö öñgöi maljal. ⁴² Mewö maljalmö, eñgö könañamñini mi kewö ahöza, mi mötzal: Inini uruñini Anutugöreñ qahöpmahöp jöhöba urukalem qahö ak wañgiba malje. ⁴³ Nöñön Iwinañgö qetñi qeta kabiga inini andö qem niñgimatzemö, kunöñ nanñi qetñi qeta kamawi, inini mönö i ölop möt añgön köla köl öröm wañgime.

⁴⁴ “O inini nanñini möpöseim añguba qetbuñani qarimapkö mötket öñgöza. Öñgözapmö, bem mohotñan Anutu öñi akzawi, yañön qetbuña eñgimapköra qahö kapan kölje. Mewö aködamurañinambuk akñegöra qahö jaram tiba

* **5:37:** Mat 3.17; Mak 1.11; Luk 3.22

kinje. Miangöra denöwö ni möt narim niŋgibeak? Mi mönö osibeak.

⁴⁵ “Nöŋön injini ‘Iwigö jemesoholŋe keu jakeŋe al enŋimam,’ mewö mötmöribepuk. Injini Mosesgö keugö jörömqöröm al waŋgiba Suep mire öngöbingö mamböta maljemö, Anutugö jeŋe aŋgotketka Mosesnöŋ nanŋak Anutugö keu jakeŋe ala jim aum enŋiiga gamuŋini mötme.

⁴⁶ “Mi kewögöra: Mosesnöŋ nöŋgö könaŋamni jim asariba Buŋa Kimbinöŋ ohoi ahöza. Miangöra Moses möt narim waŋgibeak ewö, mönö nia möt narim niŋgibeak. ⁴⁷ Mewömö, Mosesgöreŋ kimbia qahö möt nariba tem köljeaŋgöra mönö nöŋgö keuni mi denöwö möt naribeak? Mi kupuk-kapakŋambuk akapuk.” Mewö.

6

Jisösnöŋ azi 5000 nene gumohom enŋiyök.

Mat 14.13-21; Mak 6.30-44; Luk 9.10-17

¹ Miangö andöŋe Jisösnöŋ Galili o aŋgö, qetŋi kun Taiberias o aŋgö qetkeri, mi kutuba likepŋe aŋgorök. ² Kawöl ambazip möhamgöm enŋii aŋgöletot asuhui ekeranŋöra aka ambazip kambu jesöŋgöŋan Jisösgö andöŋe wuatanaŋöba kaget. ³ Jisösnöŋ gwarekurupŋi enŋömeiga kundunje öngöba tatket.

⁴ Nalö miangöreŋ Juda neŋgöreŋ ak-kömukömu kendonöŋ töriyök.* ⁵ Jisösnöŋ je ui aniga ambazip kambu jesöŋgöŋan yaŋgöreŋ kaŋgotkeri, i enŋeka

* **6:4:** Anutunöŋ mönöwök neŋgehoriba neŋgoŋgiröhi, Juda yeŋön miangöra yambu (yara) dop nalö ala söŋgaimakze. Nei keunöŋ qetŋi Pasowa jize. Eksodus 12.15

Filipkōra jiyök, “Nini nene denikeyök bohonji meinga kambu mewōñan nem timbireñ aketka dop kölbowak?” ⁶ Yuai akñamgö ahöhi, mi nanñak mörökmö, keu mi Filip esapköm wañgiba jiyök.

⁷ Mewö jiiga kewö meleşnök, “Nene beret silim 200:kö töwanji (Kina 1000,-) mianñon bohonji memba mendenña körek yeñon kitipñanöhök nembeak aka töndup qahö dop köl engibawak.”

⁸ Mewö jiiga gwarekurupñi yeñgörenök kun qetñi Andru, Saimon Pitögö munñan kewö jii mörök, ⁹ “Azi moröñi kun kiangören malja. Yangören bali† beret 5 aka söra yahöt ahözapmö, ambazip sehisehñi kewö kagetka yeñgöra mi qahö dop kölma.”

¹⁰ Jisösnöñ jiyök, “Inini mönö ambazip kambu ki jiba mendeñ engigetka nene nemingö eta tatme.” Gölme miangören kegwan luplup gwötpuk ahöyök. Miangöra azi jañgöñini 5000:gö dop yeñon gölmenöñ eta tatket.

¹¹ Eta tatketka Jisösnöñ beret mi memba saiwap jiba ambazip tatkeri, mendeña engiyök aka söra mi mewöyök mendeña sihimñinan jigerangö dop engiyök. ¹² Mendeña engiiga memba nem timbireñ aketka Jisösnöñ gwarekurupñi kewö jii mötket, “Nene kitipñi ayuhubapukōra mi mönö qezaköget.” ¹³ Mewö jiiga möta bali beret 5 miangörenök memba kitipñi kitipñi mosötket taröhi, mi qezakögetka sakap 12 miangören geba kokolak qeyök.

¹⁴ Jisösnöñ angöletot mewö mei asuhuiga ambazipnöñ eka welipköba jiget, “Kezapqetok

† 6:9: Bali mi padi, wit, out aka sehoñ miangö alanjini kun.

azi gölmenöy asuhumapkö jigeri, yañön mönö ölna mia akza.” ¹⁵ Mewö jiba Jisösgöra köirañ ala kiñ kembunini akñapkö mötmöriget. Mötmöriba kaba liliköm wañgiba walimgöba kiñ kuñgum wañgibingö aket. Mewö möt kutuba engek tököba enğömosöta kunbuk kunduje öngöba nanñök malök. Mewö.

Jisösnöy o anğö qakñe tiba tiba anök.

Mat 14.22-33; Mak 6.45-52

¹⁶ Neget teköiga mare aiga Jisösgö gwarekurupñi yeñön o anğögö jitñe geget. ¹⁷ Geba wañgenöy öngöba gölme mi mosöta o anğö kutuba likepñe Kaperneam mire göröken anget. Angetka miri söñaum teköiga Jisösnöy töndup yeñgöreñ qahö asuhuyök. ¹⁸ Angetka luhut köhöikñanök giliga o anğönöy könöpuk kunduta öngöba erök.

¹⁹ Öngöba eriga lökuatnöy qeba nañgöba 5 me 6 kilomita miangö dop angetka Jisösnöy o anğö qakñe tiba tiba wañge kösutñe kaiga eka auruba keñgötporiñ aket. ²⁰ Mewö mötketka kewö jii mötket, “Nanak kazal. Keñgötñini kude mötme.”

²¹ Mewö jii möta Jisösnöy wañgenöy öngömapkö jigetka öngöyök. Öngöiga wañgeñinan miangöreñök ösumok enğuañgita gölme görañe anbingö akeri, miangöreñ anğotket. Mewö.

Ambazip yeñön Jisösgöra um jarum bibihiget.

²² Miangöreñ anğotketka miri gianañgiga ambazip kambu ketañi yeñön o anğö likepñe toroqeba mala kewö mötmöriget, “Uran wañge mohotñan tari ehinga Jisösnöy gwarekurupñi yembuk wañgenöy qahö öngöba anök. Jisös umbula nanñinök anget.

Wanġe murutġi kun qahö ehin. Mianġöra Jisösnöŋ kunbuk ki malja.”

²³ Mewö mötmöriba tosatŋan kewö jiget, “Wanġe mohotnöŋ angetmö, ölna, Taiberias taonök wanġe tosatġi kaget. Wanġe mi Kembunöŋ beretköra saiwap jiiga nemba tarini, mönö gölme mianġö kösutŋe kagera Jisösnöŋ wanġe mienġörenök kunöŋ öngöba anök me denöwö?” ²⁴ Ambazip kambu yeŋön mewö jiba Jisös aka gwarekurupŋi mianġören qahö miwikŋaim enġiget. Mewö eka möta mewöŋanök wanġenöŋ öngöba Kaperneam taonöŋ anda Jisös jaruget. Mewö.

Jisösnöŋ malmal köhöikŋanġö nenenġi akza.

²⁵ Ambazipnöŋ Jisös jaruba o anġö likepŋe yuke göröken miwikŋaiba eka kewö jiget mörök, “O Ketaŋannini, gi mönö wani nalönöŋ ki kazan?”

²⁶ Mewö jigetka kewö melenġ enġiyök, “Nöŋön keu öl töhöŋŋi kun kewö jibi mötket: Inġini anġöletot membi ekeranġöra aka ni qahö jarum niŋgizemö, nene beret kötuetköbi nemba nem timbirenġ akeri, mönö mianġöra ni nuatanġöba ki kaze. ²⁷ Nene ayapkömawi, mi miwikŋaibingöra urukönöp kude aka malmemö, urugö nenenġan malmal köhöikŋi enġimakzawi, mönö mia buŋa qem anġubingöra kapŋ köla malme. Iwi Anutunöŋ muŋgem silimbannġi Suep gölmegö Azi Ölnġi wanġiiga kukösumŋan walönŋiga ölop urugö nene enġiiga oyaenköyaen akŋe. Mewö aka mal köhöiba kömumba toroqeba teteköŋi qahö malme.”

²⁸ Mewö melenġ enġiiga kewö qesim wanġiget, “Anutugö sihimŋanġö dop ahakmeme tandökŋi mönö denöwö ahinga dop kölbawak?”

²⁹ Qesim wanğigetka kewö melenök, “Anutunöñ azi melaim wanğiyöhi, injini i möt narim wanğiba malme. Ahakmeme mianön mönö Anutu sihimñangö dop akza.”

³⁰ Mewö melenniga kewö qesim wanğiget, “Mewö aiga gi kunbuk wani anğöletot kukñambuk kun menöñga eka möt narim gihibinak? Gi mönö wani yuai kun Mosesnöñ ahök, mianğö dop aka meman? ³¹ *Buña Kimbi kun kewö ohoget ahöza, ‘Yanön Suepnöhök nene beret enğiiga neget.’ Keu mianğö dop nanine ambösakon yeñon gölme qararanğölkölñe anda mala nene qetñi mana namba malget aka gi mönö kónañamgi Moses onğita denöwö kondelbanak?”†

³² Qesim wanğigetka Jisösnöñ kewö jii mötket, “Injini mianğö kónañi ölop qahö möt kutuze. Nöñon keu öl töhönñi kun kewö jibi mötket: Mosesnöñ anğöletot Toñi qahö ahök. Yanön nene beret mi Suepnöhök qahö enğii negetmö, nani Iwinan mönö Suepnöhök beret ölbölñi enğimakza. ³³ Anutugö nene beret mi mönö Suepnöhök eta asuhuba gölme dop ambazip malmal köhöikñi enğimakza.”

³⁴ Mewö jii möta kewö jiget mörök, “O Kembu, gi nalö dop nene beret mi neñinöñga namba malbin.”

³⁵ Jisösnöñ mi möta jiyök, “Nöñon malmal köhöikñangö neneñi akzal. Kunñan nöñğören

* **6:31:** Eks 16.4, 15; Sum 78.24 † **6:31:** Gölme qararanğölkölñe Anutunöñ söñan dop söñangö yuai amötñi, jöhanñi tuatñi aka awanñi juzu paura ewö ali gölmenöñ ahöi eka yaigep sombennöñ anda qezaköba koumñine kaba beret lölöwöröñi memba nezema. Eks 16.13-36

kazawi, yañön nem timbireñ aka wösöñi nalö kunöñ qahö alma. Kunñan ni möt narim niñgimakzawi, yañön ogöra qahö kömuma. ³⁶ Mewö aigun injini ni nek teköba töndup qahö möt narim niñgize. Mi mönö lök jibi mötze. ³⁷ Aka töndup Iwinöñ ambazip tosatñi niñgimakzawi, yañön mönö körek nöñgöreñ kame. Kunñan nöñgöreñ kamawi, nöñön mönö i qahö yakörimam.

³⁸ “Nöñön Suepnöhök eta nani imbinangö dop yuai lañ aka memba malmangöra qahö asuhuyal. Mewö qahö. Melaim niñgiyöhi, mönö yañgö jitkö dop nup memba malmangöra eral.

³⁹ “Melaim niñgiyöhi, yañgö jitsihitñan kewö ahöza: Yañön ambazip nöñgö böröne al engiiga maljei, nöñön mi pakpak köyan köl enjiba malbiga yeñgöreñök kunñan kun qahö sohoba ayuhuma. Qahö ayuhugetka nöñön i nalö ketañe enñömindiba mem gulim enñimam.

⁴⁰ “Iwinangö jitsihitñan kewö ahöza: Tosatñan Nahönñi eka möt narim wañgizei, yañön körek nalö kewöñe letota malmal köhöikñi buña qem anguba malme. Mewö mal kömugetka nöñön i nalö ketañi miañgöreñ enñömindiba mem gulim enñimam.”

⁴¹ Jisösnöñ mewö jiiga keu kötñi kun kewö ahök, “Nöñön malmalgö nene ölni aka Suepnöhök eta asuhuyal.” Mewö jiyöhañgöra aka Juda jitñememe yañön möt böliba uruñinan ihururuk jiba jim wañgiget. ⁴² Jim wañgiba jiget, “Azi ki Jisös, Josefko nahönña. Yañgö iwinamñi mi ölop möt etkizinmö, mönö denöwögöra ‘Suepnöhök eta asuhuyal,’ jiza?”

⁴³ Mewö jigetka möta kewö melenjök, “Urujnan mönö kude ihururuk jiba jim niŋgime. ⁴⁴ Iwi ni melaim niŋgiyöhi, yaŋön ambazip qahö öröm enŋiza ewö, enŋörenök kunŋan nönŋören kamamgö osima. Öroi kabawak ewö, nönön i mönö nalö ketanje enŋömindiba mem gulim waŋgimam.

⁴⁵ * “Kezapqetok yeŋören kimbinöŋ keu kewö ohoget ahöza, ‘Anutunöŋ i körek pakpak kusum enŋii mötme.’ Iwinöŋ ambazip kusum enŋii keu möta urukönömŋine ala maljei, yeŋön mönö körekŋanök nönŋören kame. ⁴⁶ Ambazip kunŋan Iwi qahö eka malja. Iwigörenök eröhi, yaŋön mohot kun mönö i eka malja. ⁴⁷ Nönön keu öl töhöŋŋi kun kewö jibi mötket: Kunŋan ni möt narim niŋgizawi, yaŋön mönö malmal köhöikŋi buŋa qem aŋguba mal öŋgöma.

⁴⁸ “Nönön malmal köhöikŋaŋgö nene ölni akzal. ⁴⁹ Mötket! Enŋö amböskonuruŋinan gölme qararaŋkölkölŋe anda mala nene qetŋi mana nempa malgetmö, töndup kömumba gisahöget. ⁵⁰ Yeŋön kömugetmö, nene beret nalö kewöŋe Suepnöhök eta maljawi, kunŋan mi nempa mala qahö kömum köhöima.

⁵¹ “Nene beret malmalŋambuk Suepnöhök eröhi, mi nönön akzal. Kunŋan nene mi nempa malmawi, yaŋön mönö teteköŋi qahö köhöiba malma. Nene waŋgiba malmami, mi nönŋö busuni. Gölmeŋi gölmeŋi yeŋön köhöiba malmegöra mi al enŋimam.”

⁵² Jisösnöŋ mewö melenjiga Juda jitŋememe yeŋön sutŋine urukönöpnöŋ jim qesim aŋguba jiget,

* **6:45:** Ais 54.13

“Yei! Azi kianjon mönö denöwö aka busunji neŋgiiga nembinak?”

⁵³ Mi möta jigetka kewö jii mötket, “Nöjon keu öl töhönnji kun kewö jibi mötket: Inini Suep gölmegö Azi ölnjanjö sepñi aka busunji qahö neme ewö, malmal köhöikñji mianjon mönö enjö urunine qahö ahöma. ⁵⁴⁻⁵⁵ Nöngö sepnan o ölnji akza aka nöngö busunan nene ölnji akza. Mianjöra kunjan nöngö sep busuni nemakzawi, yanjon mönö letota malmal köhöikñjanjö bunaya aka mal öngöma. Mewö mal kömuiga nöjon i nalö ketaje mindiba mem gulim wanjimam.

⁵⁶ “Kunjan nöngö sep busuni nemakzawi, yanjon mönö nömbuk qekötahöba kinakza aka nöjon yambuk kinakzal. ⁵⁷ Iwinöñ Malmal Tonji aka melaim niñgiba wötni aka nam köl niñgiiga köhöiba maljal. Mewöñanök kunjan ni nem niñgimakzawi, nöjon mönö mewöñanök yanjö wötni aka nam köl wanjibiga ölop köhöiba malma. ⁵⁸ Nene ölnji Suepnöhök eröhi, mi nöjon akzal. Enjö ambösakonurupñinan Anutugö nene nempa mala kömugetmö, nalö kewöñe enjöreñök kunjan beret ki nempa malmawi, yanjon mönö teteköñi qahö köhöiba malma.”

⁵⁹ Jisösnöñ Kaperneam taongö köuluk miriñe kinda keu mi jim kusum enjiyök. Mewö.

Gwarek gwötpukñan urunini böliiga Jisös mosötket.

⁶⁰ Jisösgö gwarekurupñi yenjöreñök gwötpukñan keu mi möta jiget, “Keu jit jizawi, mianjon mönö keu köt ewö lömbötñambuk akza. Mi möringa uruninan lömböriba bölim teköza.

Miaŋgöra mi kunbuk mötpingö ölan neŋgöhöiga i mönö mosötpin.”

⁶¹ Gwarek yeŋön Jisösgö keugöra möt böliba uruŋinan ihururuk jiba jim waŋgigetka Jisösnöŋ mi uruŋan enġuaŋgita möta kewö jii mötket, “Keu jizali, mi möt bölize me qahö? ⁶² Keu miaŋgöra möt bölize ewö, könaŋgep mönö denöwö asuhubawak? Suep gölmegö Azi ölnan mutuk miri mala koröhi, euyaŋgöreŋ kunbuk liliŋgöba öŋgöi ekŋe ewö, nalö miaŋgöreŋ mönö denöwö mötme?”

⁶³ “Uŋa Töröŋi yaŋön ambazip mem gulim enġimakza. Inini gölme ambinöhök ahuba busuŋinambuk akzemö, ahuahu dölökŋe qahö ahuba nanŋini ösumŋinan öne letota Suepkö buŋa ahak mi qahöpmahöp. Uŋa Töröŋan malmal köhöikŋi enġizawi, nöŋön keu kötŋi mi jim tuaribi möta malget. ⁶⁴ Mewö möta malgetmö, enġöreŋök tosatŋan töndup ni qahö möt narim niŋgiba malje.” Denike yeŋön qahö möt narim waŋgigeri aka daŋön könaŋgep mamalolo mem waŋgimawi, Jisösnöŋ mi könakönahineyök möta korök. Miaŋgöra mewö jiyök.

⁶⁵ Mewö jiba toroqeba jiyök, “Miaŋgöra nöŋön kewö jibi mötme: Nöŋgö Iwinan ambazip kun qahö inahöm waŋgiza ewö, yaŋön mönö nöŋgöreŋ kamangö osima.”

⁶⁶ Keu miaŋgöra aka gwarek yeŋgöreŋök gwötpukŋan poraiba ziriŋziriŋ aka mosöta yambuk qahö toroqeba anda kaget. ⁶⁷ Miaŋgöra Jisösnöŋ gwarek 12 mieŋgöra kewö jiyök, “Inini mönö mewöŋanök nömosöta anbingö mötze me qahö?”

68 *Mewö jiiga Saimon Pitönöŋ melenök, “O Kambu, nini mönö dagörej anbinak? Malmal köhöikŋaŋgö Buŋa keuŋi mi mönö göhörej ahöza. 69 Göŋön Anutugörej azi sarakŋi akzani, nini mi möt nariba möt asariba maljin.”

70 Mewö meleniga Jisösnöŋ möta jiyök, “Nöŋön azi 12 iŋini möwölöhöm enġial aka enġörejök kunöŋ mönö bölöŋaŋgö bohonŋi akza.” 71 Judas Saimon Iskariotkö nahönŋi yaŋön gwarek 12 yeŋgö sutŋine mala könaŋgep mamalolo mem waŋgiyök. Jisösnöŋ keu mi yaŋgöra möta jiyök. Mewö.

7

Jisösnöŋ munurupŋi yembuk keu eraum mötket.

1 Juda jitŋememe yeŋön Jisös qebingö kapan kölgeraŋgöra Judia prowins uruŋe anda kamangö tököyök. Mianġöra Judia mosöta Galili prowins uruŋe anda liliköba maliga köiŋ tosatŋi teköyök.

2 *Mi teköiga Juda yeŋgörej kendon kun qetŋi koumkoum mianġö nalöŋan töriyök.*

3 Mianġöra Jisösgö munurupŋan kewö jiget mörök, “Gi kianġörej mala aŋgöletot memakzani, mi gwarekurupkan mewöyök ek kutumegöra gi mönö gölme ki mosöta Judia anöŋga dop kölma.

* 6:68: Mat 16.16; Mak 8.29; Luk 9.20 * 7:2: Lew 23.34;

Dut 16.13 * 7:2: Juda yeŋgörej yambu jeŋi qeŋe sösongai kendonŋi mi yambu (yara) dop kewö alget: Wain nupŋine anda ip sinŋi memba koumkoum qeba mianġörej ahöba wehön 8 söŋgaiba kendon tata malget. Wehön kondikŋe sösongai öŋgöŋgöŋi alget. Mönöwök gölme qararaŋkölkölŋe yambu (yara) 40 mianġö dop opo koumŋine ahöba kaba malgeri, mi mötmöriba söŋgaiget. Lew 23.33-36,39-43; Dut 16.13-15

⁴ Kunŋan nanŋak aukŋe asuhumamgö mörakzawi, yaŋön yuai kun tölapŋe qahö memakza. Anŋöletot mewöŋi memakzanangöra mönö ambazip kambuŋi kambuŋi yeŋgö jeŋine anda asuhiba könaŋamgi indelman.” ⁵ Munurupŋan qahö möt narim waŋgiba tönpin malgerangöra aka mewö laŋ jiget.

⁶ Mewö jigetka kewö jii mötket, “Urugö nup aukŋe memamgö nalöŋan qahö kam kuŋguiga maljalmö, eŋgö nalöŋinan mönö sundan dop an-meangö dop ahöza. ⁷ Göłme ambazipnöŋ kazik ak eŋgibingö osimakzemö, nöŋön yeŋgö ahak-memeŋini bölöŋi indela naŋgöba jibi mötzeangöra mönö ni kazik ak niŋgimakze. ⁸ Anmamamgö nalöŋan mönö qahö kam kuŋguza. Miaŋgöra nöŋön sösöŋgai kendon kiaŋgöreŋ qahö öŋgömam. Nöŋön mire tatpiga iŋini ölop endü anda öŋgöba söŋgaimē.” ⁹ Keu mewö jii mötketka Galili prowins uruŋe toroqeba malök. Mewö.

Jisösnöŋ koumkoum sösöŋgainöŋ malök.

¹⁰ Jisösgö munurupŋan koumkoum kendongöra angetmö, nanŋak mire tata könaŋgep aukŋe qahöpö, tölapköba anda Jerusalem öŋgöyök. ¹¹ Juda yeŋgö jiŋnememeurupŋinan sösöŋgai nalöŋe Jisösgö jeŋi jaruba qesiqesi aka kewö jiget, “Azi mi denike?”

¹² Ambazip kambu yeŋön sutŋine Jisösgöra saŋep keu gwötpuk jiget. Tosatŋan “Azi mi ölop sorokŋi,” jigetmö, tosatŋan kewö jiget, “Qahö! Yaŋön mönö ambazip kambu eŋololonŋ ak eŋgiiga kahapmahap ahakze.” ¹³ Mewö mewö laŋ jigetmö, Juda

jitnememe yengöra kenğötņini mōta malgeraņğōra kunņan yaņğō keuņi aukņe qahō jiyōk. Mewō.

Jisōsnōj nanņi kōnaņi ambazip kusum enġiyōk.

¹⁴ Kendon sōsōņgai bibiņe malgetka Jisōsnōj jōwōwōl jike tohoņ uruņe ōņgōba kōnahiba ambazip kusum enġiyōk. ¹⁵ Kusum enġiiga Juda yeņōn welipkōba kewō jiget, “Azi ki mōtmōt jake ōņgōņgōņe qahō ōņgōba tōndup Buņa Kimbigō kōnaņi denōwō mōt sorokōza?” Mewō jiba welipkōget.

¹⁶ Welipkōgetka kewō jii mōtket, “Mōtmōt Buņa jimakzali, nōņōn miangō Toņi qahō akzal. Nanak qahōpmō, melaim niņgiyōhi, nōņōn mōnō yaņğō mōtmōtņi memba kaba jimakzal. ¹⁷ Ambazip kunņan Anutugō jitsihitņangō dop aka memangō mōtzawi, yaņōn mōtmōt jibiga miangō Toņi daņōn akza, mi mōt kutuma. Anutunōj Buņaņi nōņgō urune ali asuhuza me nani imbinangō keu laņ jimakzal?

¹⁸ “Kunņan nanņi imbiņe mōtmōriba keu jimakzawi, yaņōn nanņak qetbuņaņambuk akņamgō mōtza. Mewō mōtzapmō, melaimelai azi kun toņan qetbuņaņambuk akņapkōra kapan kōljawi, yaņōn mōnō jitnememe ōlbōlņi geņmoņi qahō akza. ¹⁹ Mosesnōj Kōna keu al enġii mi ahōza me qahō? Mi ahōzapmō, enġōreņōk kunņan mi qahō tem kōla wuatangōmakza. Inini mōnō wuanōņgōra kapan kōla ni nuņgubingō mōtmōrize?”

²⁰ Mewō jii mōta ambazip kambu yeņōn kewō melenget, “Ōmewōrōmenōj mōnō uruge geba kinja. Daņōn kapan kōla gi guhumangō mōtmōriza?”

21 Mewö melengetka jii mötket, “Nöñön anğöletot mohot membiga injini körek pakpak auruba köñkuñ akze. 22 *Mosesnöñ silenine Anutugö aiwesök yandibingöra jim kutum engiyöhi, o Mosesnöñ mi mutuk qahö jim kutuyökmö, amböskonurupninan mi könahiba memba malgetka silik mi neñgöreñ kaiga Sabat kendonöñ mewöyök azi silenini yandimakze.

23 **“Nini Mosesgö Köna keu walöñnin siñgisöndok ahubapuköra köhöikñi mötzin. Mi mötzinmö, keu mi qetala Sabat kendonöñ mewöyök azi silenini yandiba töndup nannini qahö jim anğuba silebile malje. Mewö maljemö, nöñön azi jömukñi Sabat kendonöñ mem ölöwak wañgiali, mianğöra mönö wuanöñgöra mi yom jim niñgize? 24 Injini ambazip silenini miyöhök eka mewö mianñön bahösöhamök kewöta keu lañ jim tekömakzei, mi mönö mosötme. Mi mosöta uruñini törörök möt kewöta keu ölñanök jim teköme.”* Mewö.

Jisösnöñ Amötqeçe Toñi akza me qahö?

25 Jerusalem toñi yeñgöreñök tosatñan kewö jiget, “Azi kapan köla qebingö mötmörizei, yañön mönö mia me? 26 Eket, yañön ambazip jeñine aukñe keu jiiga qahö jim wañgize. Mewögöra azi kianñön Amötqeçe Toñi Kraist akzawi, keu mi ölña galömkölköl azi yeñgö kezapñine geiga mötze me qahö? 27 Amötqeçe Toñi Kraistnöñ kamapköra jiba kota malgeri, yañön ‘Denikeyök asuhumawi, mi kunöñ kun qahö mötma,’ jizemö, azi kianñön denikeyök asuhuyöhi, mi mönö ölop mötzin.”

* 7:22: Jen 17.10; Lew 12.3 * 7:23: Jon 5.9

²⁸ Mewö eraum mötketka Jisösnöñ jöwöwöl jikegö tohoñ uruñe kinda imbiñi memba wahöta kusum engiba keu kewö jiyök, “Inini nöngöra kewö jize, ‘Azi mi möt wañgiba miriñi denikegö mi ölop mötzin.’ Nani kukösum qakñe qahö asuhaba kinjal. Melaim niñgiyöhi, yañön melaimelai Toñi ölni aiga i qahö möt kutum wañgiba malje. ²⁹ Yañön melaim niñgiiga yañgöreñök eralañgöra i ölop möt wañgizal.”

³⁰ Mewö jiiga i memba jöhöbingö mötketmö, nalöñan qahö kam kuñguyöhañgöra aka kunñan silene qahö meyök. ³¹ Mewö mötketmö, ambazip kambu yañgöreñök gwötpukñan möt narim wañgiba kewö jiget, “Kraistnöñ kamawi, yañön mönö azi ki oñgita añgöletot memba malma me denöwö? Mewö tandök akza.” Mewö.

Jisös memba jöhömegöra nañgu galöm melaim engigetka kaget.

³² Ambazip kambu yañön Jisösgöra mewö goranora jiba jitnakölik akeri, mi Farisi (Köna keugö kapañkölköl) yañön mötket. Mi möta jike nup galöm yembuk kinda nañgu galöm (sikiriti) tosatñi melaim engigetka memba jöhöbingö kaget. ³³ Kagetka Jisösnöñ kewö jiyök, “Nöñön embuk nalö töröptökñi toroqeba malmam. Mi malagun engömosöta melaim niñgiiga erali, mönö yañgöreñ liliñgöba öngömam. ³⁴ Öngöbiga göraim niñgiba malmemö, ni qahö miwikñaim niñgime. Nöñön miri malmami, inini miangöreñ kabingö osime.”

³⁵ Mewö jiiga Juda jitñememe yañön sutñine kewö erauget, “‘Nini miwikñaim wañgibingö osibin,’ jiza. Miangöra mönö denikeañgöreñ

öngömangöra jiza? Juda ambazip tosatñan denða kantri tosatñe anda Grik yeñgö sutñine maljei, mönö yeñgöreñ anda Grik ambazip kusum eñgimamgö möta jiza me? ³⁶Keu kewö jiza, ‘Göram niñgiba malmemö, ni qahö miwikñaim niñgime,’ aka keu kun kewö jiza, ‘Nöñön miri malmami, iñini miangöreñ kabingö osime.’ Keu yahöt mietkö könañiri denöwö?”

Malmal köhöikñangö oñan mönö jeñi tohoba kañgotma.

³⁷*Mewö eraugetmö, kendon söñgaigeri, miangö wehön qöndökñi ketañi mianñon kam kuñguiga Jisösnöñ kinda köhöikñanök qeta kewö jiyök, “Kunñan ogöra kömuzawi, yañön mönö nöñgöreñ kaba nema. ³⁸*Buña Kimbigö keu kun kewö ohoget ahöza, ‘Kunñan ni möt narim niñgizawi, yañgö uruñeyök malmal köhöikñangö oñan mönö tohoba saksaköba kañgorakña.’”

³⁹Mewö jiyökmö, keu mi Uña Töröñangöra aka kewö jiyök, “Denike eñön ni möt narim niñgizei, iñini mönö Uña Töröñi buña qem anguba malme.” Anutunöñ Jisös gölmenöñ malöhangö dop Suepkö asakmararañi qahö al wañgiiga malök. Miangöra Uña Töröñi qahö melaiiga eta uruñine geiga öne malget. Mewö.

Ambazip sutñine jujul ahui malget.

⁴⁰Jisösnöñ mewö jiiga ambazip kambu yeñgöreñök tosatñan keu mi möta kewö jiget, “Azi kianañön mönö öñña kezapqetok azi asuhumapkö jigeri, mönö mia akza.”

* **7:37:** Lew 23.36 * **7:38:** Eze 47.1; Zek 14.8

⁴¹ Tosatŋan jiget, “Yaŋön Amötqeqe Toŋi Kraist akza.” Mewö jigetmö, tosatŋan qetala jiget, “Kraistnön mönö denöwö Galili prowinsnöhök kabawak? Mi qahö dop kölja. ⁴² *Buŋa Kimbinön kewö jiza, ‘Kiŋ Deiwidnön Judia prowinsgö taon moröŋi Betlehem miangören malöhi, Kraistnön miangörenök asuhuba Deiwidkö gwölönarökurupŋi yeŋgörenök kunŋan akŋa.’ ”

⁴³ Mewö mewö laŋ jigetka ambazip kambu yeŋön Jisösgöra aka jula denget. ⁴⁴ Yeŋgörenök tosatŋan memba jöhöbingö mötketmö, kunŋan sileŋe qahö meyök. Mewö.

Juda galöm yeŋön Jisös qahö möt narim waŋgiget.

⁴⁵ Jöwöwöl jikegö kiripo galöm (sikiriti) yeŋön liliŋöba jike nup galöm aka Farisi (Köna keugö kapaŋkölköl) yeŋgören kagetka kewö jim enget, “Inini wuanöŋgöra i qahö memba kaze?”

⁴⁶ Jim engetka kewö melenget, “Azi mianön keu jimakzawi, kunŋan nalö kunön keu tandökŋi mewöŋi qahö jiyök.”

⁴⁷ Mewö melengetka Farisi (Köna keugö kapaŋkölköl) yeŋön qesiba jim enget, “Inini tok enololon ak enŋii malje me? ⁴⁸ Galömkölköl azi neŋgörenök kunŋan mönö i qahö möt narim waŋgiyök. Aka Farisi (Köna keugö kapaŋkölköl) neŋgörenök kunön kun uruŋi yaŋgören göröken melenök me qahö? ⁴⁹ Mewö qahöpmahöpmö, ambazip kambu Mosesgö Köna keu qahö möt kutuba Jisösgö keu möta kopa keu laŋ jimakzei, yeŋgöra muat! Anutunön mönö i qesuahöm enŋiiga ayuhume.”

* 7:42: 2 Sml 7.12; Mai 5.2

50 *Mewö jim engigetka azi qetnji Nikodemus mutuk Jisösgöreñ kaiga qambañ wañgiyöhi, yañön mewöyök yeñgöreñök kun aka sutñine tata kewö jii mötket, 51 “Azi kunöñ siñgisöndok ahöhi, mi qahö qesiinga jiiga möta töndup kewöringa dop kölja me qahö? Qahö kewöta keuñi öne jim teköbin ewö, mönö naninak Köna keunini qebin me? Mi qahö dop kölma.”

52 Mewö jii möta kewö melenñ wañgiget, “Gi mewöyök Jisös ewö melenñda Galili qandak azia akzan me? Galili prowinsnöhök kezapqetok azi kun qahö asuhumawi, mi mötzin. Mewö mi nangak Buña Kimbi oyoñda könañi jaruba möt kutuman.” 53 Mewö jitnakölik aka jula denñda miriñine anget. Mewö.

8

Ambi kunöñ serowilin aiga miwikñaiget.

1 Miriñine angetmö, Jisösnöñ anda Oil ip kundune öngöyök. 2 Öngöba ahöba miri gianjiiga söñanök kunbuk liliñgöba jöwöwöl jikenöñ öngöiga ambazip kambu pakpak kaba liliköm wañgigetka eta tata kusum engiyök.

3 Kusum engiiga Köna keugö böhi aka Farisi (Köna keugö kapañkölköl) yeñön ambi kun wañgita yañgöreñ kaget. Ambi mianñön sero yoñgorö ahiga mianñöra memba jöhögeri, mi wañgita kambu jeñine alget. 4 Jeñine ala Jisösgöra jiget, “Böhi, ambi kianñön qesabulum ahiga mönö mianñöreñök miwikñaiba memba kazin. 5 *Mosesnöñ Köna keu

* 7:50: Jon 3.1-2 * 8:5: Lew 20.10; Dut 22.22-24

ala mianğoreŋ ambi mewöŋi mi kötnöŋ gila qeinga kömumapköra jim kutum neŋgiyöha ahöza. Mewö ahözapmö, göŋön yaŋğöra denöwö jiman?”

⁶ Mewö jiba mianğoreŋ möndöba Jisös keugö bötaknöŋ öröi qaköiga qebingö könaŋi ahui keu jakeŋe albingöra jiget. Mewö jigetka sipköba eta böröŋan kulem kun gölmenöŋ ohoyök.

⁷ Ohoyökmö, toroqeba kapan köla qesim waŋgigetka hök ala wahöta diŋdiŋi kinda kewö jii mötket, “Eŋğoreŋök kunŋan siŋgisöndok kun qahö aka maljawi, yaŋön mönö ölop köt mutukŋi memba gila qema.” ⁸ Mewö jii mötketka kunbuk sipköba eta kulem kunbuk gölmenöŋ ohoyök.

⁹ Jisösnöŋ keu jiyöhi, mianön eŋğömemba jöhöiga nanŋini siŋgisöndokŋini gamuŋambuk akeri, mi Anutunöŋ kondeliga nanŋini uruŋinan naŋğöba jiga isikusukŋini qahöwahök. Mianön qahöwahiga keu göröŋ kingetka bohonŋinan mutuk eŋğömosöta aniga yaŋğö nemböŋan andöŋe aniga tosatŋi mohot mohot yeŋön mömölaköba körek an teköget. Qöndökŋan aniga Jisösnöŋ zoŋ kuŋguba tari ambinöŋ nanŋök yambuk kinök. ¹⁰ Jisösnöŋ hök ala wahöta diŋdiŋi kinda ambi eka kewö jii mörök, “Ambi, keu jakeŋe al gihibingö jizei, yeŋön mönö denike gi sök ni sök anjeje? Yeŋğoreŋök kunöŋ kinda gi kömumangö keuŋi qahö jim teköza me?”

¹¹ Jii möta melenök, “O Kembu, kunöŋ qahö jim teköm niŋgiza!” Mewö meleniga jii mörök, “Nöŋön mewöyök gi qahö jim teköm gihizal. Gi mönö dölki könahiba siŋgisöndok kunbuk kude aka malman.” Mewö.

Gölme dop neŋğö asaknini mi Jisös.

12 *Jisösnöŋ keu kunbuk suariba kewö jii mötket, “Nöŋön ambazip gölmeŋi gölmeŋi tat anjei, eŋgö asakŋini akzal. Kunŋan ni nuatanŋöba kamawi, yaŋön mönö söŋaupnöŋ jipjap qahö qeba malmäpmö, malmal köhöikŋaŋgö asakŋi mianŋö uruŋe malma.”

13 *Mewö jiiga Farisi (Köna keugö kapanŋölköl) yeŋön kewö jiget mörök, “Nanganök könaŋamgi naŋgöba jim asarimakzani, mianŋön mi qahö dop köl köhöiza. Qahö!”

14 Mewö jiget möta kewö jii mötket, “Nöŋön denikeyök eta kayali aka denike anda öŋgömami, mi möt teközal. Mianŋöra nanak könaŋamni naŋgöba jim asarimakzali, keu mi mönö ölop dop köl köhöiza. Mi köhöizapmö, iŋini nöŋgö könani mi ölna qahö möt kutuze. 15 Eŋön ambazip silenini miyöhök eka mewö mianŋön bahösapsap kewöt eŋgiba keuŋini laŋ jim tekömakzemö, nöŋön ambazip kungö keuŋi qahö jim tekömakzal.

16 “Ni nanök qahö maljalmö, Iwi melaim niŋgiyöhi, yaŋön mönö nömbuk kini maljit. Mianŋöra kungö keuŋi jim teköbilenak ewö, mi mönö diŋdiŋanök kewöta dopŋe jim teköbilenak.

17 *Yahötŋan keu kun urumohot aka naŋgöba jiyohotka dop köl köhöimakza. Keu mi eŋgö Köna keuŋine mewöyök ohoget ahöza.

18 “Nöŋön nani könaŋamni naŋgöba jimakzal aka Iwi melaim niŋgiyöhi, yaŋön mewöyök nöŋgö könaŋamni naŋgöba jimakza. Mianŋöra yahöt akziga mianŋön ölop dop köla köhöim teköza.”

* 8:12: Mat 5.14; Jon 9.5 * 8:13: Jon 5.31 * 8:17: Dut 19.15

¹⁹ Jisösnöŋ mewö jii möta kewö qesim waŋgiget, “Göhö Iwigi mi denike malja?” Qesim waŋgigetka melenök, “Ijini ni aka Iwini netkö könaŋamniri qahö möta malje. Ijini nöŋgö könaŋamni möt kutubeak ewö, mönö nöŋgö Iwini mewöyök möt waŋgibeak.”

²⁰ Jisösnöŋ jöwöwöl jikegö naluk dum kösutŋe kinda ambazip kusum eŋgiba keu mi jiyök. Mi jiyökmö, nalöŋan qahö kam kuŋguyöhaŋgöra aka kuŋŋan i qahö memba jöhöyök. Mewö.

“Denike öŋgömami, ijini miangöreŋ öŋgöbingö osime.”

²¹ Jisösnöŋ keu kun kewö toroqeba jii mötket, “Nöŋön eŋgömosöta anda malbiga ijini ni göraim niŋgiba malme aka siŋgisöndok akeri, miangöreŋ qekötahöba kinda kömum köhöime. Miangöra denike öŋgömami, ijini miangöreŋ öŋgöbingö osime.”

²² Juda jitŋememe yeŋön mi möta jiget, “Kewö jiza, ‘Denike öŋgömami, ijini miangöreŋ öŋgöbingö osime.’ Keu mi denöwö? Imbi aumangöra jiza me?”

²³ Mewö jigetka jii mötket, “Ijini gölme kiangö toŋi aka maljemö, nöŋön miri gölme euyaŋgö buŋaya akzal. Eŋön gölmenöŋ ahuba gölme kiangö buŋaya aka maljemö, nöŋön mutuhök gölme kiangöreŋ qahö ahuyal. ²⁴ Qahö ahuba malmalgö könaŋi nalö dop mala korali, nöŋön mönö mia akzal. Nöŋgöra mewö qahö möt narize ewö, mönö siŋgisöndok akeri, mi qahö mosötpiga miangöreŋ qekötahöba kinda kömum köhöime. Könaŋi miangöra aka kewö jibi mötze, ‘Ijini

siŋgisöndok akeri, mönö mianğöreŋ qekötahöba kinda kömum köhöime'. Keu mi ölna.”

²⁵ Keu mi möta kewö qesim waŋgiget, “Gi mönö niŋia akzan?” Qesim waŋgigetka melenök, “Könaŋamni lök indelbiga mötzei, nöŋön mönö mia akzal. ²⁶ Nöŋön enğöra keu gwötpuk ölop toroqeba jibilenak aka siŋgisöndok gwötpuk akeri, mianğö keuŋi ölop jim teköbilenakmö, melaim niŋgiyöhi, yaŋön mönö nöŋgö melaimelai Toni ölni akza. Yaŋön keu jiiga yaŋgöreŋök möta kota maljali, nöŋön mönö keu mi aukŋe jibiga gölmeŋi gölmeŋi yeŋön mörakŋe.”

²⁷ Mewö melenökmö, Iwigöra keu suariba jiyöhi, yeŋön mi qahö möt asariget. ²⁸ Jisösnöŋ toroqeba kewö jii mötket, “Nöŋön malmalgö könaŋi nalö dop mala korali, mönö mia akzal. Mianğö könaŋi mi könaŋep ölop möt asarime. Nöŋön yuai kun nani ösumnan me nani imbinanğö dop qahö ahakzalmö, Iwinan keu kusum niŋgiba malöhi, mönö mianğö dop keu jitni ki jimakzal. Keu kötni yahöt mianğö könaŋi mi könaŋep möt asarime. Inini Suep gölmegö Azi Ölni kösökögetka eu öngöba kömumawi, nalö mianğöreŋ mi ölop möt asarime.

²⁹ Melaim niŋgiyöhi, yaŋön mönö nömbuk kini maljit. Ahakmeme möri dop köl waŋgimakzawi, nöŋön mönö sundan mia ahakzal. Mianğöra yaŋön qahö nömosöriğa nanök qahö maljal.”

³⁰ Keu mewö jiyöhanğöra aka ambazip gwötpukŋan uruŋini melenđa Jisös möt narim waŋgiget. Mewö.

Abrahamgö gwölönarökurup muneŋi aka Jisös.

³¹ Jisösnöj Juda ambazip tosatñan möt narim wañgigeri, yeñgöra keu kewö jii mötket, “Nöñgö Buja keunan uruñine geiga miangöreñ qekötahöba kinje ewö, mönö ölna nöñgö gwarekurupni akze.

³² Mewö mala keu ölnañgö könani möt kutugetka Buja keu ölnan inini bölöñangö kösönöhök pösat enjiiga solanji (fri) aka malme.”

³³ *Mewö jii möta melenä kewö jiget, “Nini Abrahamgö gwölönarökurupni mala könagesö walji akzin. Mewögöra azi kunöñ kösö gwarö mem neñgiiga maljinangö jizani, mi qahö. Nini mönö nalö kunöñ etqeçeni mewö qahö aka malin. Aiga gi denöwögöra aka kewö jizan, ‘Kösönöhök pösat enjiiga solanji aka malme?’ Keu mi qahö dop kölja.”

³⁴ Mewö jigetka kewö melen enjiyök, “Nöñön keu ölä töhöñni kun kewö jibi mötket: Singisöndok akzei, körek yeñön singisöndokö welenqeçe omani töwa qahö aketka miangö kösöñan köpeim enjimakza. ³⁵ Köpeim enjimakzapmö, welenqeçenöñ tonangö miri uruñe nalö dop qahö mal öñgöma. Nannj Nahönñan öläp miriñe nalö teteköñi qahö malma.

³⁶ “Nahönñan bölöñangö kösönöhök pösat enjiiga solanime ewö, enñön mönö ölna kösö gwarö qahö solanji (fri) aka malme. ³⁷ Inini Abrahamgö gwölönarökurupni maljei, mötzalmö, bölöñan uruñini gwözönjawangöra nöñgö Buja keunan mösösönihim enjiba kondondongöba erakza. Könani miangöra mönö kapan kölä ni nuñgubingö mötze. ³⁸ Nöñön Iwinangö qöhöröñe mala yuai

* **8:33:** Mat 3.9; Luk 3.8

eka mala korali, mianğö keuŋa jimakzal. Eŋön mewöyök iwiŋinan keu jii mötkeri, mianğö dop ahakze.”

³⁹ Jisösnöŋ mewö melenj enğiiga kewö jiget mörök, “Abrahamnöŋ mönö nanine iwiambönini akza.” Mewö jiget möta jiyök, “İnini Abrahamğö gwölönarökurupŋi akeak ewö, mönö yanğö ahakmemeni wuatangögetka dop kölbawak. ⁴⁰ Mianğö tandökŋi kewö akza: Nönön Anutugö jitleyök keu möta mianğö dop keu ölbölŋi mi jibi mörakze. Nalö kewöŋe inini kapan köla azi ni nuŋgubingö mötzemö, Abrahamnöŋ mewö qahö ahök. ⁴¹ Nanŋini iwiurupŋinanğö ahakmeme miyök wuatangöba malje.” Mewö jiiga jiget mörök, “Serowilinöŋ qahö ahuba iwi qahö (bastet) mi qahö akzinmö, Iwininambuk maljin. Anutunöŋ mohok-kun nanŋak iwi ak neŋgiza.” Mewö.

“Bölöŋi Tonangö buŋaya akze,” jiyök.

⁴² Jisösnöŋ kewö jii mötket, “Anutunöŋ nanŋak iwi ak enğibawak ewö, nönön yanğoreŋök eta asuhuyalaŋgöra mönö ölop ni uru jöpaköm niŋgibeak. Nani ösumnöŋ nam köliga qahö asuhuyalmö, Anutunöŋ melaim niŋgiiga eta maljal. ⁴³ Keu jimakzali, mi wuanöŋgöra möt asaribingö lömbörimakze? Nöŋgö keunan uruŋini undenjawanğöra mi möt kutubingö olan qeba zikzik tökömakze. Mewögöra mi möt asaribingö osimakze?

⁴⁴ “Mönö iwiŋini Bölöŋi Tonangö buŋaya akze. Sihim kömbönaŋinan mönö iwiŋinanğö sihimŋi bölöŋi wuatangöbingöra ahöza. Yanön könakönahineyök ambazip enğuget kömükömu

azia aka kota malja. Keu ölnan urune qahö kinjawangöra aka keu ölni ongita lolonqalolon kinja. Munen jiji azia aka munen jijigö iwinji akzawangöra munen jimakzawi, mi mönö nanji uruñangöra jimakza.

⁴⁵ “Yañön munen jimakzapmö, nöñön keu ölni jimakzal aigun injini ni qahö möt narim niñgimakze.

⁴⁶ Injini körekñan nöngö könani kewö kondelbingö osize: Yañön siñgisöndok aka keuñambuk malja. Könañamni mewö jaruzemö, nöñön keu ölni jimakzali, mi mönö wuanöñgöra qahö möt narim niñgize?

⁴⁷ “Kunñan Anutugö buña akzawi, yañön mönö Anutugören keu kezap ala mörakza. Injini Anutugö buña qahö akzeañgöra aka keu mi qahö möta möt asarimakze.” Mewö.

Jisösnöñ nanñangöra denöwö jim miwikñaiyök?

⁴⁸ Jisösnöñ Juda ambazip yeñgö könañini indeliga likepñi melenđa kewö jiget mörök, “Gi Samaria prowinsgö lolonqalolon azia aknöñga ömewörömenöñ uruge geiga maljan. Mewö jiba dopñe jizin me qahöwi, mi ölop nangak jinöñ mörin.”

⁴⁹ Mewö möta kewö melenñök, “Ömenöñ urune qahö geiga maljal. Ni Iwinanök göda qem wangiba maljal aigun töndup enön gamu qem niñgimakze.

⁵⁰ Mewö ahakzemö, nanak qetbuñanambuk akñamgö jaram qahö timakzal. Mohot kunñan mewö akñamgö bimñi qeba malja. Azi yañön mohot kewöt niñgiba ‘Dop köljan,’ jiba jim teköm niñgimakza. ⁵¹ Nöñön keu öl töhöññi kun kewö jibi mötket: Kunñan nöngö Buña keuni tem köla

wuatangömakzawi, yañon mönö nalö kunöñ kömup köhöikñangö buñaya qahö akña.”

⁵² Mewö melenniga Juda jitnememe yeñon Jisös kewö jiget mörök, “Abraham aka kezapqetok ambazip yeñon kömuget aigun göñon töndup kewö jinöñga siksauk akza, ‘Kunñan nöñgö Buña keuni tem köla wuatangömakzawi, yañon nalö kunöñ kömup köhöikñangö buñaya qahö akña.’ Mewö jizanañgöra gi öme kunöñ uruge geiga maljan. Mi döлки ölop möt asarizin. ⁵³ Neñgö bömönini Abraham kömuyöhi, göñon mönö i ongita yañgö ketanñi akzan me? Kezapqetok yeñon mewöyök kömuget. Gi nangahöra mötnöñ ongöiga ‘Ketanñi niñia akzal?’ jiba mötzan?”

⁵⁴ Mewö jiget möta kewö melennök, “Nanañgöra mötpi ongöiga Anutugö aködamunñi mi nana buña qem anğubilenak ewö, qetbuñani mi mönö nesak akawak. Iwinan nanñi aködamunñi niñgiyöhanğöra aka qetbuñanambuk aka maljal. Eñon yañgöra ‘Neñgö bem Anutunini akza,’ jize. ⁵⁵ Eñon könañi mi ölop qahö möt kutumakzemö, nöñon i ölop möt wañgizal. ‘I qahö möt wañgizal,’ jibilenak ewö, mönö inini ewö tilipqilip azi akilenak. Ni azi mewöñi qahö akzalmö, i ölop möt wañgizal aka yañgö keuñi tem kölakzal. ⁵⁶ Eñgö bömönñini Abrahamnöñ ni gölmenöñ eta malmamğöra mamböta nalö mi ekñamğöra uru sösöñgai aka malök. Nalö kewöñe Suepnöñ mal köhöiiga nöñon asuhubiga nöñgö nalöni eka miañgöra söñgaiyök.”

⁵⁷ Mewö melenniga Juda jitnememe yeñon kewö jiget mörök, “Yambugi (yara) 50 qahö ongita

miaᅅgö bapᅅe maljan aka ‘Abraham ehal,’ jinöᅅga qahö dop kölja.”

⁵⁸ Mi möta jii mötket, “Nöᅅön keu öl töhöᅅᅅi kun kewö jibi mötket: Abrahamnöᅅ qahö asuhuiga nöᅅön lök nalö miaᅅgöreᅅ malal.”

⁵⁹ Mewö jii möta kötnöᅅ gila qeᅅbingöra köt um-buraᅅgöba megetmö, Jisösnöᅅ tölapköba jöwöwöl jikegö tohoᅅi mosöta ölöᅅ köla anök. Mewö.

9

Jisösnöᅅ jegömöl azi kun mem ölöwahök.

¹ Jisösnöᅅ toroqeba köna anda azi kun nam körö uruᅅeyök jegömöl asuhuyöhi, mi ehök. ² Mi ehiga gwarekurupᅅan qesim waᅅgiba jiget, “Ke-taᅅamnini, yaᅅön mönö dagö siᅅgisöndököra aka jegömöl mewöᅅi asuhuyök? Nanᅅi siᅅgisöndököra me iwinamᅅi yetkö siᅅgisöndököra?”

³ Jigetka kewö melenᅅök, “Nanᅅak siᅅgisöndök kun qahö ahök aiga iwinamᅅan siᅅgisöndök qahö ahotmö, Anutugö kukösumᅅan yaᅅgö malmalᅅe aukᅅe asuhumapköra mewö ahuyök.

⁴ Wehönöᅅ asariba ahözawaᅅgöreᅅ mönö melaim niᅅgiyöhaᅅgö nuwa töp memba malbin. Suᅅgem akᅅawi, miaᅅgöreᅅ körek nup membingö osibin.

⁵ *Nöᅅön gölmenöᅅ malmamaᅅgö dop gölmeᅅi gölmeᅅi enᅅgö asakᅅini aka asariba malmam.”

⁶ Mewö jiba gölmenöᅅ söutköi geiga gwakötak melenᅅa jegömöl azigö jeᅅe timbilyök. ⁷ Timbiliba kewö jim kutuyök, “Gi mönö Siloam o aᅅgönöᅅ anda jegi saᅅgoᅅman.” (Siloam qet mi nanine keunöᅅ Melaimelai azi.) Mewö jim kutuiga anda

* 9:5: Mat 5.14; Jon 8.12

jeni saŋgoŋni tohoiga ui asariiga lilingöba miriŋe kayök.

⁸ Mewö kaiga alaurupŋan kösutŋe malgeri aka tosatŋan mutuk nene yuaigöra ulet engiba mali ekeri, yeŋön i eka jiget, “Jegömöl azi nenegö uleta tata malöhi, yaŋön azi mia me?”

⁹ Tosatŋan jiget, “Yaŋön mönö mia.” Tosatŋan jiget, “Qahö, kaisongolomŋi i ewö akzapmö, yaŋön qahö.” Mewö mewö jigetka nanŋak jiyök, “Nöŋön mönö ia akzal.”

¹⁰ Mewö jiiga kewö qesiget, “Jegi mönö denöwö aknöŋga tohoza?”

¹¹ Qesigetka kewö melenj engiyök, “Azi qetŋi Jisös qerakzei, yaŋön söutköi gwakötaknöŋ geiga melenjda jene timbiliba jim kutuba kewö jiyök, ‘Gi mönö Siloam o aŋgönöŋ anda jegi saŋgoŋman.’ Mewö jiiga o miangörenj anda jeni saŋgoŋbi tohoiga ubi asariyök.”

¹² Mewö melenj engiiga kewö qesiget, “Azi mi denike malja?” Qesim waŋgigetka “Qahö mötzal,” jiyök. Mewö.

Farisi yeŋön jeni tohoyöhaŋgöra qeqesi alget.

¹³ Azi jegömöl malöhi, yaŋön “Qahö mötzal,” jiiga ambazipnöŋ i waŋgita Farisi (Köna keugö kapankölköl) yeŋgörenj anget. ¹⁴ Jisösnöŋ söutŋan gwakötakpuk melenjda jeŋe timbiliba metohoyöhi, mi mönö Sabat kendon nalöŋe meyök. ¹⁵ Miangöra Farisi yeŋön mewöyök kewö qesim waŋgiget, “Jegi mönö denöwö aknöŋga tohoza?” Qesim waŋgigetka kewö melenj engiyök, “Azi mianön mönö söutŋan gwakötakpuk melenjda jene timbiliiga anda jemesoholni saŋgoŋda jeni ubi asariza.”

16 Mewö melen enjiiga Farisi yengörenök tosatjan jiget, “Azi mianjon Sabat kendon köteközawi, mianjora mönö Anutugören azia qahö akza.” Tosatjan jiget, “Mewö qahö! Azi gonjonni kunjan mönö denöwö aka anjoretot mewöni memangö köhöibawak?” Mewö mewö jiba nanjini jula denget.

17 Mewö dengetka jegömöl azi mianjoren kunbuk lilingöba jiget, “Jegi metohoyöhi, yangöra mönö denöwö jiman?” Mewö jigetka “Kezapqetok azia akza,” jiyök.

18 Mewö jiiga jeni ölña gömoliyöha tohoiga uyöhi, Juda jitnememe yenjon mi qahö möt nariget. Qahö möt nariba uruyahöt kinda iwinamni öröm etkigetka kayohot. 19 Kayohotka kewö qesim etkiget, “Azi ki etkö nahönjira me qahö? ‘Jegömöl asuhuyök,’ jizahotmö, denöwö aka mönö dölki jeni uba ekza?”

20 Qesim etkigetka kewö melenohot, “Azi ki netkö nahönira akza aka jegömöla asuhuyök, mi ölop mötzit. 21 Mewö mötzitmö, denöwö aka dölki jeni uba ekzawi, mi qahö mötzit. Danjon jeni metohoi uzawi, niri mewöyök qahö mötzit. Gömokni qahö, lök qariba töwatni jörak alalña aka mötkutukutuñambuk akza. Mianjora mönö nanjanjögö qesigetka könani ölop jima.”

22 Juda jitnememe yengöra kenjotnjiri möta mewö jiyohot. Yenjon sutjine keu kewö jöhöba urumohot aka kinget, “Kunjan Jisös Amötqeqe Tonj Kraist akzawi, mewö jim miwiknjaima ewö, i mönö köuluk miri kambunöhök közöl wanjabin.” 23 Keu mianjora aka kewö jiyohot, “Gömokni qahö, lök qariza. Mianjora mönö nanji qesim wanjime.”

²⁴ Mianğöra azi jegömöl malöhi, mi kunbuk öröget kaiga kewö jiget mörök, “Azi mi sinğisöndok azia akza, mi mötzin. Mianğöra mönö Anutugö qetbuñaji möpöseinönga aködamunñambuk ahi dop kölma.”

²⁵ Mi möta kewö melenök, “Sinğisöndok azia akza me qahö, nöñön mi qahö mötzal. Mohot kewöyök mötzal: Nöñön jegömöl malalmö, dölkwöñe kunbuk ölop uba ekzal.”

²⁶ Mewö melenniga kewö qesim wañgiget, “Wani yuaia ak gihiza? Jegi mönö denöwö metohoza?”

²⁷ Qesim wañgigetka kewö melen enğiyök, “Nöñön lök melen enğizalmö, enñon keu jizali, mi qahö mötze. Wuanöngöra mi kosikñi kunbuk jibi mötpingö kapan kölje? Enñon mönö mewöyök yañgö gwarekurupñi akingö mötze me?”

²⁸ Mewö melen enğiiga mepaqepaik aka uruqege keu töhöreñ kewö jim wañgiget, “Gi mönö yañgö gwarekña akzanmö, neñon Mosesgö gwarekurupña maljin. ²⁹ Anutunöñ Mosesya Buña keu wañgii mötzinmö, azi mianñon mönö igen me waigenök asuhuyöhi, mi qahö mötzin.”

³⁰ Mewö jigetka keu kewö jii mötket, “Yañon denikeyök asuhuyöhi, injini mianğöra tok kök qeba tönpin akzeañgöra mi welipközal. Öña welipközalmö, töndup nöngö jeni metohoiga ölop uba ekzal. ³¹ Ambazip gonğonji yeñon Anutu köulukögetka qahö möt enğimakza, mi mötzin. Mi mötzinmö, kunñan Anutu göda qem wañgiba diñgiba keu jitñi tem köla wuatañgömakzawi, yañgö köulukñi mönö kezap ala mörakza. ³² Kun jegömöl asuhuiga kunöñ kaba jeñi metohoyöhi, kösohot

mewöŋi mi mutuhök qahö möta malin. Suep gölmenöŋ asuhuyohot, nalö mianğöreŋök könahiba kota mala merak mianğöreŋ kösohot mewöŋi kun qahö mörin. ³³ Anutugöreŋök qahö kabawak ewö, yaŋön mönö yuai mewöŋi memamgö osibawak.”

³⁴ Mewö jii möta kewö jim waŋgiget, “Iwinamgan siŋgisöndokpuk gölöm alohotka siŋgisöndok pakpak miambuk ahuba qarinoŋaŋön merak ninia kusum neŋgimangö mötzan. Mi qahö dop kölja.” Mewö jim waŋgiba közölgetka gumnöŋ erök. Mewö.

Urujenöŋ gömöliiga ilingösöŋ jipjap malmal.

³⁵ Közölgetka gumnöŋ eröhi, keu mianön Jisösgö kezapŋe gei möta azi mi miwikŋaiba kewö jii mörök, “Gi Anutugö Nahönŋi möt narim waŋgizan me qahö?”

³⁶ Mi möta kewö qesiba melenök, “O Ketaŋamni, azi mi daŋön? Mi jinöŋ mötagun i ölop möt narim waŋgimam.”

³⁷ Melenniga kewö jim kutum waŋgiyök, “Gi kewö uba neknöŋ. Göbuk keu jizali, azi mia mönö nöŋön akzal.”

³⁸ Mi möta jiyök, “O Kembu, ni möt narim gi-hizal.” Mewö jiba sipköba köuluköm waŋgiyök.

³⁹ Jisösnöŋ jiyök, “Nöŋön ambazip kewöta keuŋini jim tekömamgöra aka eta gölmenöŋ asuhuyal. Nöŋgöra aka tosatŋan jegömöl akzei, yeŋgö jeŋini tohoiga ölop uba ek kutume. Tosatŋi jeŋini ölopŋi maljei, yeŋön nöŋgöra aka bau jegömöl aka malme.”

⁴⁰ Mewö jiiga Farisi tosatñan kösutñe miangörej kinda keu mi möta kewö qesiget, “Wae! Nini tok jegömöl azia akzin me? Neñgöra jizan me?”

⁴¹ Mewö qesigetka kewö jii mötket, “Injini ‘Jegömöl akzin,’ jibeak ewö, mönö siñgisöndok qahö ahöm enjibawakmö, nalö kewöñe ‘Ölöp ek kutuzin,’ mewö jimakzeañgöra aka siñgisöndokñinan mönö ahöm köhöim enjima.” Mewö.

10

Lama aka galömñini ölöpñi.

¹ Jisösnöñ galöm meme keu kewö jiyök, “Nöñön keu öl töhöññi kun kewö jibi mötket: Tosatñan lama tohoñ uruñe öngöbingöra nanñunöhök qahöpmö, sel walöñda gezei, yeñön mönö kegwek aka yoñgorö meme ambazip akze. ² Kunñan nanñunöñ gezawi, yeñön lama miengö galömñina akza. ³ Yeñön kañgoriga nanñu galömñan eka nanñu öröm wañgiiga eta qeriga lama yeñön keu jölñi ölöp möt kutumakze. Galömñinan nanñi lamaurupñi engehola qetñini qeta enñuanñiriga tohoñini mosöta ölöp yaigepñe anakze.

⁴ “Nanñi lamaurupñi pakpak enñuanñiriga tohoñini mosöta yaigepñe angetka yeñön jitmemeñini aka mutuk aniga keu jölñi möt kutuzeañgöra andöñe wuatangöba anakze. ⁵ Nanñini galömñini ölöp wuatangömakzemö, kian kunñan kaiga i qahöpmahöp wuatangöme. Kian yeñgö keu jölñini qahö möt kutuzeañgöra mönö ziriñziriñ aka yañgöra kök ala deñme.”

⁶ Jisösnöŋ keu tölapŋi mi jii mötketmö, keuŋaŋgö könaŋi qahö möt asariba köŋkuŋ qeget. Mewö.

Jisösnöŋ lama galöm ölöpŋi akza.

⁷ Köŋkuŋ qegetka toroqeba eŋgöra kewö jiyök, “Nöŋön keu öl töhöŋŋi kun kewö jibi mötket: Nöŋön lama tohongö naŋguŋi akzal. ⁸ Nöŋgö andöne kambu galöm pakpak mutuk kageri, yeŋön kegwek aka yoŋgorö meme ambaziwa aket. Mewö akerangöra lama yeŋön i qahö möt kutum eŋgiba malget.

⁹ “Nöŋön mohot lama tohongö naŋguŋi akzal. Denike eŋön Anutubuk köhöiba malbingö jiba nömbuk qekötahöba maljei, nöŋön mönö amöt qem eŋgibiga letotme. Mewö aka lama tohoŋ uruŋe öŋgöba eta yaigep anda nene gölmeŋi möriamŋambuk miwikŋaimakŋe. ¹⁰ Yoŋgorö meme yeŋön wuanöŋgöra kamakze? Yeŋön yoŋgorö memba neŋguba ayuhum neŋgibingöra kamakze. Yuai murutŋi akingöra qahö. Nöŋön mewö qahö akzal. Nöŋön injini malmal köhöikŋi miwikŋaiba oyaenŋkoyaenŋ aka malmegöra kaba maljal.

¹¹ “Nöŋön lama galöm ölöpŋi akzal. Lama galöm ölöpŋan mönö lamaaurupŋi yeŋgöra aka malmalŋi köleŋda eŋgima. ¹² Kunŋan lama toŋi qahö aka bohon memegörök kaba laŋ galöm köl eŋgimakzawi, mi kewö: Kiam kalŋan kaiga eka lamaaurup eŋgömosöta unjurata aniga kiam kalŋan lama eŋgöhöba kiom eŋguba mendeŋ eŋgima. ¹³ Yaŋön yaigewök kaba bohon memegörök ‘Lama galöm köl eŋgimam,’ mi jitnöŋ jiba lama eŋgöra waimanŋat qahö möta nesampurek qakŋe mala laŋ unjurata anma.

14-15 *“Nöñön lama galöm ölopñi akzal. Iwinan ni möt niñgiiga nöñön Iwini möt wañgiba maljal. Mianğö dop nöñön nani lamaurupni möt eñgibiga yeñön ni möt niñgimakze. Nöñön malmalni lamaurupni eñğöra aka köleñda mosötmam. ¹⁶ Nöñğöreñ lama kambu tosatñi mi mewöyök ahuba malme. Yeñön lama tohoñ kianğö toñi qahö maljemö, töndup nöñğö keu jölni mörakñe. Nöñön i mewöyök eñguañgitpiga mianğö dop anda kamakñe. Könañgep kambuñi kambuñi mienñön mindiriba kambu mohot aketka galöm mohotñan galöm köl eñgiiga malme.

¹⁷ “Iwinöñ kewögöra aka ni urunöñ jöpaköm niñgimakza: Nöñön malmalni mosöta kunbuk guliba mal öñğömam. Mi Iwigö jeñe dop kölja.

¹⁸ Malmalni kunñan qahö noañgitmapmö, mi nanak köleñda mosötmam. Iwinan jim kutum niñgiiga nanak malmalni köleñda mosötmam aka mianğö andöñe kunbuk guliba mal öñğömam. Kukösum mewöñi mi nöñğöreñ ahöza.”

¹⁹ Jisösnöñ keu mi jiyöhanğöra aka Juda jitñememe yeñğö sutñine goranora kunbuk asuhuyök. ²⁰ Yeñğöreñök gwötpukñan kewö jiget, “Ömewörömenöñ uruñe geyöhawa mala kahapmahap akza. Mönö wuanöñğöra keuñi mötpinak? Muat mosötpin.”

²¹ Tosatñan jiget, “Keu mewöñi mi kölköljinjin azigö keu ewö qahö. Ömewörömenöñ mönö jegömöl ambazip yeñğö jeñini denöwö metohobawak?” Mewö erauget.

Juda jitñememe yeñön Jisös andö qeget.

* **10:14-15:** Mat 11.27; Luk 10.22

²² Mönöwök jöwöwöl jike köl könjörata nanğunj öröget. Mi yambu (yara) dop mötmöriba kendongö söngaibingöra* Jerusalem tokoget. Nalö mianjön kam kunğuiga kömunjan kie uru nalö amötņi ahök.

²³ Jisösnöņ jöwöwöl jikegö tohoņ uruņe kin Solomongö sombem söranņambuk qetkeri, mianğoreņ anda liliköyök. ²⁴ Anda liliköiga Juda jitņememe yeņön kaba liliköm wanğiba kewö qesim wanğiget, “Könaņamgi köyatinöņa mönö nalö dawik toroqeba mambötņingö mötzan? Gi Amötqeqe Toņi akzan me qahö, mi mönö aukņe jinöņa mötņin.”

²⁵ Mewö jim qesim wanğigetka kewö melenğenyök, “Nöņön lök jibiga mötketmö, inini nöņgö keuni mi qahö möt narize. Nöņön Iwinanğö qetņe anğöletot ahakzali, mianjön mönö könaņamni indela nanğöba kondelakze. ²⁶ Mi nanğöba kondelakzemö, inini nöņgö lama kambu uruņe qahö maljeanğöra aka keuni qahö möt narimakze.

²⁷ “Nöņön mönö lamaaurupni möt engibiga yeņön mewöyök nöņgö keu jölني möta ni nuatanğömakze.

²⁸ Nöņön malmal köhöikņi engibiga letota nalö kunöņ qahö kötökņi ayuhume. Kunņan kun i nöņgö böröneyök qahö öröba kondenğ engima.

²⁹ Nöņgö Iwinan i nöņgö böröne al engiyöhi, yanjön körek enğonğita öngöngöņi ketanņi akza. Mianğöra körekņan i nöņgö Iwinanğö böröneyök öröba kondenğ engibingö osime. ³⁰ Ni aka Iwi netkön mönö mohot aka maljit.”

* **10:22:** Kendon qetņi Hanuka mi Disemba 25 könahiba wehön 8 mianğö dop tata söngaiget. Miri pakpak kiwa ohotiriget asariiga ip sinņi tokoba linjet köla sösongai aket.

³¹ Jisösnöŋ mewö jüiga Juda jitŋememe yeŋön kunbuk gölmenöhök köt umburaŋgöba memba mi-aŋön gila qebingö aket. ³² Mewö aketmö, kewö jim enġiyök, “Iwinöŋ nam köl niŋgiiga aŋgöletot ketanġi gwötpuk aka membiga ekeri, mienġörenök mönö wania kun mötmöriba ni kötnöŋ gila nuŋgubingö mötze?”

³³ *Jim enġiiga Juda yeŋön melenġa jiget, “Neŋön aŋgöletot ketanġi aknönŋaŋgöra aka qahö kötnöŋ gila guhubingö akzinmö, Anutu mepaqepaik ak waŋgizanaŋgö likepŋi ak gihibin. Gi gölme azia aigun silegi öne mem öŋgöba Anutu tandök akŋamgö jizan.”

³⁴ *Mewö jigetka Jisösnöŋ melenġ enġiyök, “Buŋa Kimbinöŋ Köna keu kun kewö ohoget ahöza, ‘Anutu nöŋön jial: Inġini mönö nöŋgö bemurupni akze.’ ³⁵ Buŋa Kimbigö keu mi mönö pömsöm qahö qemapmö, pöwöwöm ahöma. Mianġöra Anutunöŋ keuŋi ali kaba ambazip buŋaŋina ahöhi, Anutunöŋ yeŋgö qetŋini ‘bemurup’ mewö qet enġiyök. ³⁶ Ambazip omanġi mewö qet enġiyökmö, Iwinöŋ azi mem sarahiba melaiiga gölmenöŋ eröhi, enöŋ mönö denöwö aka yaŋgöra kewö jize, ‘Gi Anutu mepaqepaik ak waŋgiba maljan.’ Nöŋön ‘Anutugö nahönŋi akzal,’ keu mewö jibiga enöŋ mönö wuanöŋgöra mi mötket qahö dop kölġa? Inġini Anutugörenġ Buŋa keu mi qeze me?

³⁷ “Nup memakzali, mi eketka Iwinanġö ahakmemegö dop qahö ahakza ewö, mönö kude möt narim niŋgime. ³⁸ Iwinanġö ahakmemegö dop aka memba maljal ewö, könaŋamni mewö eka mönö

* **10:33:** Lew 24.16 * **10:34:** Sum 82.6

möt narim niŋgime. Mi keunaŋgöra aka qahö möt naribeak ewö, mönö aŋgöletotnaŋgöra aka töndup möt narim niŋgime. Iwinöŋ nömbuk qekötahöba kinja aka nöŋön Iwibuk qekötahöba kinjali, inini mianŋö könaŋi möt sölöŋgöba asarimegöra jizal.”

³⁹ Jisösnöŋ mewö jiiga kunbuk memba jöhöbingö mötketmö, börö bapŋineyök unjurata eta anök.

⁴⁰ *Enŋömosöta Jordan o töwatŋi kutuba kunbuk likepŋe anda Jonöŋ mutuk o melun mem eŋgiba malöhi, mianŋöreŋ aŋgota nalö tosatŋi toroqeba mianŋöreŋ malök. ⁴¹ Mianŋöreŋ maliga ambazip gwötpukŋan yaŋgöreŋ kaŋgota eka kewö jiget, “Jonöŋ aŋgöletot mohot kun qahö meyökmö, keu pakpak azi kianŋöra jiyöhi, mi mönö keu ölŋa jiba malök.” ⁴² Kaŋgotkeri, yeŋgöreŋök gwötpukŋan uruŋini melenŋa möt narim waŋgiget. Mewö.

11

Jisösgö alaŋi Lazarusnöŋ kömuyök.

¹ *Betani taongö azi kun qetŋi Lazarus mianŋön kawöl yöhöi ahöyök. Maria aka Marta darumun yetköŋ Betani taon mianŋöreŋök malohot.

² *Maria mianŋön Kembu o köhöwakŋambuknöŋ miriba nörop juŋŋan könaŋi kereŋ meyök. Lazarus kawöl yöhöi ahöyöhi, mi yaŋgö nenŋa.

³ Lazarusnöŋ kawöl yöhöi ahöiga nenyahötŋan buzup keu kewö alohotka Jisösgöreŋ anök, “Kembu mötnöŋ, alagi yaŋgö ak gihimakzawi, yaŋön mönö kawöl yöhöi ahöza.”

* **10:40:** Jon 1.28 * **11:1:** Luk 10.38-39 * **11:2:** Jon 12.3

⁴ Buzup mi anökmö, Jisösnöŋ mi möta kewö jiyök, “Kawöl mianŋön azi alani kömumapköra aka qahö asuhum wanŋii ahöza. Mianŋöra qahöpmö, Anutugö Nahönŋan i mem ölöwaka mianŋöra Suepkö aködahunŋambuk aiga ambazipnöŋ könaŋi mi ek kutuba Anutu möpöseigetka qetbunŋan asarim se-hima. Kawöl mi mianŋöra aka asuhum wanŋiyök.”

⁵ Jisösnöŋ Marta, yanŋö munŋi aka nenŋiri Lazarus yanŋöra ak wanŋiiga malök. ⁶ Mewö malökmö, töndup kawölŋanŋö buzupŋi möta miri malöhi, mianŋöreŋök sömaŋ yahöt toroqeba malök. ⁷ Mi mali nalö mi teköiga gwarekurupŋi yanŋöra kewö jii mötket, “Nini mönö Judia prowinsnöŋ lilingöba anbin!”

⁸ Mewö jiiga melenŋet, “Ketanamnini, Judia yeŋön uruwale kapaŋ köla kötnöŋ gila guhubingö mötket. Mianŋöra kunbuk Judia lilingöba anmamgö jizani, mi qahö dop kölja.”

⁹ Mewö melenŋetka Jisösnöŋ keu kewö jiyök, “Wehönŋö auanŋi 12 ahözei, kunŋan mianŋö asakŋe köna anmawi, yanŋön mönö yuai kunŋan qem mizit qahö ak wanŋima. Gölmegö asakŋan asarim wanŋiiga ölöp eka anma. ¹⁰ Ölöp anmapmö, kunŋan kiwanŋi qahö ahöm wanŋiiga sunŋem jipjap anmawi, yanŋön mönö qem mizit miwikŋaima.” ¹¹ Keu mi jibagun kewö jii mötket, “Alanini Lazarusnöŋ gaunwat ahözapmö, nöŋön anda gaunöhök möndöbi wahötma.”

¹² Keu mi möta kewö jiget mörök, “Kembu, ölna gaun ahöza ewö, mönö ölöp ahöba ölöwakŋa.”

¹³ Jisösnöŋ Lazarus kömuyöhanŋö keu sainŋi jiyökmö, gwarek yeŋön ‘Gauna ahöza,’ jiyöhi,

mianğö môt bibihiba keu kōnaŋi qahö môt kutuget. ¹⁴ Qahö môt kutugeranğöra Jisösnöŋ aukŋeyök jim miwikŋaiba jiyök, “Lazarusnöŋ kömuyöha ahöza. ¹⁵ Nöŋön yambuk qahö malbiga kömuyöhanğöra nöŋön anda mem gulibiga wahöri eketka mötnaripŋinan asuhum köhöima. Mewö aiga enğöra söŋgaiba ‘Simbawon akŋe!’ jizal. Mönö wahötketka yanğöreŋ anin.”

¹⁶ Mewö jim miwikŋaiiga Tomas qetŋi kun Si-wisiwi qetkeri, yanön gwarek alaurupŋi yeŋğöra kewö jii mötket, “Nini ölop mohotŋe mianğöreŋ anin. Andagun yambuk kömuin.” Mewö.

Malmal Tonan nenyahötŋi uruŋiri qesawöliyök.

¹⁷ Lazarusnöŋ kömumba wehön 4 lök qaksirinöŋ ahöi teköiga Jisösnöŋ kanğoriga buzupŋi mewö jiget mörök. ¹⁸ Betani taon mi Jerusalem siti mosöta 3 kilomita anangö dop dowe ahöyök. ¹⁹ Mianğöra Juda ambazip gwötpukŋan Marta Maria nenŋiri kömuyöhanğöra ‘Songon etkekin,’ jiba kaba tatket.

²⁰ Tatketka Martanöŋ “Jisös kaza,” jiget möta miri mosöta kōnanöŋ anda miwikŋaiyökmö, Marianöŋ mire tarök. ²¹ Kōnanöŋ miwikŋaiba kewö jii mörök, “Kembu, gi kianğöreŋ malbanak ewö, nenan mönö qahö kömumbawak. ²² Qahö kömumbawakmö, göŋön nalö kewöŋe mewöhanök Anutugö yuai kungöra köuluköman ewö, mi pakpak ölop miwikŋaim gihiiga asuhuma, mewö mötzal.”

²³ Keu mi möta Jisösnöŋ jii mörök, “Göhö nengan mönö guliba wahötma.”

²⁴ Mi möta Martanöŋ jiyök, “Gölmegö nalö teteköŋe kömukömuŋi yeŋön wahötmei, yanön

mönö nalö ketanji mianğorenj guliba wahötmawi, mi möt yaközal.”

²⁵ Mewö jiiga Jisösnöñ jii mörök, “Kömupnöhök wahötwahötkö Tonji mi nöñön akzal. Nanak Mal-mal köhöikñangö Tonji akzal. Mianğöra kunñan ni möt narim niñgizawi, yañön kömumapmö, töndup toroqeba mal köhöiba malma. ²⁶ Kunñan kun gölmenöñ mala möt narim niñgiza ewö, yañön mönö nalö kunöñ qahö kömum köhöima. Qahö! Keu mi möt narizan me qahö?”

²⁷ Martanöñ keu mi möta jiyök, “O Kembu, mi möt narizal. Göñön Anutugö Nahönñi akzan. Amötqeqe Tonji Kraist gölmenöñ asuhumapkö jigeri, göñön mönö mia akzan. Mewö möt narizal.” Mewö.

Jisösnöñ sahöri imbilñan erök.

²⁸ Martanöñ keu mewö jiba miriñe lilingöba anda munñi Mariagöra keu ölöñ jiiga görañe kaiga jiyök, “Böhinöñ kaba könanöñ kinda göhöra endu anda ekñangöra jiza.”

²⁹ Mewö jiiga Marianöñ keu mi möta mianğorenjök i mosöta Jisösgorenj anök. ³⁰ Anökmö, Jisösnöñ miri sombemnöñ qahö kañgoriga endu Martanöñ köna namñe miwikñaiba ehöhi, mianğorenjök kinök. ³¹ Juda ambazip yeñön Mariabuk miri uruñe uru qesawölökö tatketka Marianöñ zilañ wahöta gumnöñ eta aniga eka kewö mötmöröiba jiget, “Yañön mönö qaksirinöñ anda sahötma.” Mewö jiba yañgö andöñe wuatangöba anget.

³² Marianöñ anda Jisös kinöhanğorenj anğota eka könañe sipköba eta kewö jii mörök, “O Kembu,

göñön ki malbanak ewö, nenan mönö qahö kömumbawak.”

³³ Mewö jiba silata qeta sahöriga Juda ambazip yambuk kaba nañgöba mohotñe sahötkeri, Jisösnöñ mi eka wösöñi pölpölgöiga jeñi asöliiga köna böröñi jönömñambuk unduyök. ³⁴ Jönömñambuk undui qesim enjyök, “I denike alget ahöza?” Qesim enjiiga jiget mörök, “Kembu, kewö kaba eknöñ!”

³⁵ Mewö jigetka Jisösnöñ sahörök. ³⁶ Sahöriga Juda ambazip yeñön eka jiget, “Yei! Mönö alañgöra önöñi qahö ak wañgii malök.”

³⁷ Mewö jigetmö, tosatñan keu mi qeba kewö jiget, “Jegömöl ambazip jeñini metohoba malök ewö, mönö ölop Lazarus jiiga qahö kömumbawak me?” Mewö.

Jisösnöñ Lazarus mem guliiga kömupñöhök wahörök.

³⁸ Mewö lañ jigetka Jisösgö wösöñi kunbuk pölpölgöiga jeñi asöliiga qaksirinöñ anök. Qaksirinöñ anda yuai kewö ehök: Köt köteñ urorohoba qamötñi miangö uruñe ala nañguni köt ketañan köl közipkögetka tarök. ³⁹ Mi eka kewö jiyök, “Mönö köt qililingögetka anök.” Mewö jiiga azi kömuyöhañgö nenni Marta yañön kewö jii mörök, “O Kembuni, sömañ 4 ahözawañgöra lök wörönñambuk akza.”

⁴⁰ Jisösnöñ mi möta Martagöra kewö jiyök, “Gi möt narim niñgibanak ewö, Anutugö kukösumñan aködamunñambuk asuhuiga ekanak. Mutuk keu mewö jibiga mötnöñ me qahö?”

⁴¹ Mewö jiiga köt qililingöget aniga Jisösnöñ eu ui öngöiga kewö jiyök, “Iwi, gi köulukni mötzanañgöra aka ‘Pipsaiwap!’ jim gihizal. ⁴² Gi nalö dop köulukni mörakzani, mötzalmö, göñön melaim

niŋginöŋga gölmenöŋ erali, ambazip kambu liliköm niŋgiba ki kinjei, yeŋön mi möta möt narimegöra aka keu ki jizal.”

⁴³ Mewö jiba imbiŋi memba wahöta ketaŋanök qeta kewö jiyök, “Lazarus, gi mönö wahöta kaŋgotnöŋ!” ⁴⁴ Mewö qeriga azi kömukömuŋi yaŋön guliba wahöta kayök. Köna böröŋi opo kawukŋambuknöŋ esuhuba jemesoholŋi opo jöhanŋan köpeiba jöhöget ahöi dundunŋambuk kayök. Mewö kaiga Jisösnöŋ jiyök, “Mönö dundunŋi pösatketka ölöp anma.” Mewö.

*Juda galöm yeŋön Jisös kömumapkö aŋgönaŋ geget.
Mat 26.1-5; Mak 14.1-2; Luk 22.1-2*

⁴⁵ Juda ambazip Mariagöreŋ kaŋgota Jisösnöŋ yuai aiga asuhuiga ekeri, yeŋgöreŋök gwötpukŋan uruŋini melenđa Jisös möt narim waŋgiget. ⁴⁶ Möt narim waŋgigetmö, tosatŋan Farisi (Köna keugö kapaŋkölköl) yeŋgöreŋ anda Jisösnöŋ yuai ahöhi, miangö kösohotŋi jiget mötket.

⁴⁷ Mi jiget mötketka jike nup galöm aka Farisi yeŋön jike kaunsöl jitŋememe öröm eŋgiget tokogetka kewö jiget, “Azi mianöŋ aŋgöletot kukösunŋambuk sehisehiŋi memakzawaŋgöra i mönö denöwö ak waŋgiinga dop kölbawak?

⁴⁸ Wakosoraŋ aka yuai kun qahö ak waŋgiinga toroqeba mewö aka malma ewö, mönö ambazip körek pakpak i möt narim waŋgibeak. Mewö aketka Rom gawman yeŋgö irimŋini seholiiga kaba nanini jöwöwöl jikenini aka ambazip kambu ki nenguangitketka öne töhöŋ malbinbuk.”

⁴⁹ Mewö jiget tatketka yeŋgöreŋök kun qetŋi Kaiafas yaŋön yambu (yara) miangöreŋ jike nup

galöm bohonji aka nup mia memba malök. Yanön wahöta goro keu kewö jii mötket, “Inini uru mötmötñinaᅅgö kinimji tok qahö tohoza. ⁵⁰ Inini keu ki ölop qahö kewötze: Nini ambazip kambu körekñanök ayuhuinga lömböt keta bölöknji akapuk. Miangöra azi mohotñan Juda kambu neᅅgö aip selnini ala sohpnini memba kömuiga dop kölma.”

⁵¹ Yanön keu mi nanji imbiᅅe qahö ahuiga jiyökmö, yambu (yara) miangöreᅅ jike nup galöm bohonji malöhanᅅgöra aka nanjak keuᅅaᅅgö könani qahö möta kezapqetok keu jiyök, “Jisösnöᅅ ambazip kambu neᅅgöra aka kömui dop kölma.” Keu mi ölna jiyök. ⁵² Juda ambazip kambu neᅅgöröhök qahö kömuyökmö, Anutugöreᅅ urumeleᅅ könagesö gölme dop deᅅqeᅅda mal anjini, nini mewöyök mindirim neᅅgiiga urumeleᅅ kambu mohok aka malbingöra kömuyök. Kömumapkö keuᅅi mi qeljiᅅe jiyök.

⁵³ Wehön miangöreᅅök könahiba jitñememe yeᅅön tokoba mewö eraum möta Jisös kömumapkö keuᅅi jim köhöiba areᅅi alget. ⁵⁴ Miangöra Jisösnöᅅ toroqeba Juda yeᅅgö sutñine aukñe qahö anda kaba malök. Mewö qahöpmö, eᅅgömosöta gölme qararaᅅkölkölñanᅅgö göraᅅe anök. Miangöreᅅ anda taon qetñi Efraim miangöreᅅ aᅅgota gwarekurupñi yembuk nanñinök malget.

⁵⁵ Juda neᅅgöreᅅ ak-kömukömu kendonöᅅ töriyök.* Miangöra Juda ambazip gwötᅅpukñan miri

* **11:55:** Kendon qetñi Nei keunöᅅ Pasowa jize. Anu-tunöᅅ mönövök Israel ambazip neᅅgehoriba neᅅgoᅅgiröhi, miangöra yambu dop nalö ala söᅅgaimakzema. Eksodus 12.15

dop mirinini mosöta köl könjörat ak anğubingöra möta Jerusalem sitinöŋ öngöget. ⁵⁶ Jisös jaruba mala jöwöwöl jikegö tohoŋ uruŋe kindä eraum möta kewö qesim anğugət, “Jisösnöŋ sösöŋgai kendongöra ki kama me qahöpto? Denöwö mötze?”

⁵⁷ Mewö qesim anğugətmö, jike nup galöm aka Farisi yeŋön jimkutukutu keu kewö algetka sehiyök, “Kunŋan Jisösgö ahöm tatatŋi eka mötmawi, yaŋön mönö neŋgöreŋ kaba buzupŋi jii möta anda memba jöhöbin.” Mewö.

12

Marianöŋ Jisös o köhöwaktambuknöŋ miriyök.

Mat 26.6-13; Mak 14.3-9

¹ Anutunöŋ mönöwök neŋgehoriba neŋgoŋgiröhi, miangö ak-kömukömu kendonŋan* töriba sömaŋi 6 teköiga miangöreŋ kam kuŋgumamgö ahök. Jisösnöŋ nalö miangöreŋ miri qetŋi Betani miangöreŋ anök. Mutuk azi qetŋi Lazarus mem gulii kömupnöhök wahöta malöhi, mönö yaŋgö mire anğorök. ² Miangöreŋ anğoriga Jisös göda qem waŋgibingöra miri kunöŋ nene ohoba mözözömgöget. Martanöŋ ohom töndeŋ köl eŋgiyökmö, azi Jisösbuk mohotŋe tata nene negeri, Lazarusnöŋ yeŋgö sutŋine tarök.

³ *Mewö tatketka Marianöŋ kelök kirin kun lömbötŋi 500 gram mi memba Jisösgöreŋ kayök. Kirin mi o umköhöwaktambuk ölni qetŋi nad bohonŋi öngöŋgöŋi ketanŋi miaŋön kokolak qeqeŋa. Yaŋön mi memba kaba simin köla Jisös könaŋe mimbiliba miriba nörop jupŋan kereŋ meyök.

* **12:1:** Eksodus 12.15 * **12:3:** Luk 7.37-38

Mewö aiga miri uruŋe tatkeri, mi ogö wöronŋan pukpuköba dop köla ahöiga mötket.

⁴ Mewö asuhuiga Jisösgö gwarek yengörenök kun qetŋi Judas Iskariot, könaŋgep Jisös mamalolo meyöhi, azi mianŋön qetala kewö jiyök, ⁵ “O köhöwakŋambuk mi mönö wuanöngöra bohonŋi memegöra qahö alök? Iwinanŋö jitŋi! Mi albawak ewö, mönö silim 300:kö töwaŋi (Kina 1500,-) mianŋö dop yöhötibawak. Mia ambazip wanapŋi enŋiinga dop kölbawak.” ⁶ Mewö jiyökmö, keu mi ambazip wanapŋi yengöra waimanjat mörohaŋgöra aka qahö jiyök. Yengöra aka qahöpmö, yonŋorö meme azia mala moneŋ gösö kutukutulanaŋi galöm köli moneŋ alget geiga mianŋörenök kitipŋi nanŋanŋöra memba malök. Mönö mianŋöra aka mi jiyök.

⁷ Mewö jüiga Jisösnöŋ jiyök, “Inŋini ambi ki mönö kude jim waŋgime. Nöŋön kömumbiga löm köl niŋgimeanŋö nalöŋi törizawaŋgöra ölop sileni o umköhöwakŋambuknöŋ nömira. ⁸ *Ambazip wanapŋi mi mönö nalö dop sutŋine malakzemö, nöŋön embuk nalöŋi nalöŋi qahö malmam.” Mewö.

Lazarus qebingö keu jöhöba anŋönaŋ alget.

⁹ Jisösnöŋ Betani mire malöhi, mi Juda ambazip kambu gwötpukŋan möta mianŋören kaget. Jisösgöröhök qahö kagetmö, Lazarus kömupnöhök mem guli wahöröhi, i mohot ekingö likeplikep öröba kaŋgotket. ¹⁰ Mewö kaŋgotketmö, jike nup galöm yeŋön Lazarus mewöyök qein kömumapkö keu jöhöget. ¹¹ Juda ambazip gwötpukŋan

* 12:8: Dut 15.11

Lazarusgöra aka Betani anda uruñini melenđa Jisös möt nariget. Mianğöra keu mewö jöhöget. Mewö.

Jisös köirañ kölgetka Jerusalem öngöyök.

Mat 21.1-11; Mak 11.1-11; Luk 19.28-40

¹² Mewö aketka ahöba wahöta mianğöreñ ambazip kambulelebenöñ ak-kömükömu kendongöra Jerusalem sitinöñ kañgota malgeri, yeñön buzup keu kewö mötket, “Jisösnöñ Jerusalem kamangö könanöñ kaza.” ¹³ *Keu mewö möta umji böröñi memba könanöñ miwikñaibingö anda kewö jiba qetket,

“Hosana, owe owe! Anutu möpöseizin. Kembugö qetne kamawi, Anutunöñ mönö kötuetköma! Israel neñgö Kiñ Kembunini owe owe!”

¹⁴ Jisösnöñ donki moröñi kun miwikñaiba mianğö qakne öngöba tarök. Mi kezapqetok keu kun kewö ohoget ahözawañgö dop asuhuyök,

¹⁵ *“O Jerusalem ambazip Zaion kundunji liliköba maljei, inini mötket, engö Kiñ Kembuninan mönö kama.

Donki moröñañgö qakne tata kama. Mianğöra keñgötñini mönö kude mötme.”

¹⁶ Jisösgö gwarekurupñan yuai asuhuyöhi, mianğö könani mutuk qahö möt kutugetmö, könangep ölop möt asariget. Jisösnöñ Suepnöñ öngöba asakmararañambuk malöhi, keu mi nalö mianğöreñ mötmöriba kewö jiget, “Aha! Keu mi mönö Jisösgöra ohoget ahöza aka ambazipnöñ keu mianğö dop ak wañgigetka ölnambuk ahök.”

* **12:13:** Sum 118.25, 26 * **12:15:** Zek 9.9

17 Ambazip Jisösbuk Betani malgeri, yeñon dangunu ewö kinda buzupni jim sehiget. Jisösnöñ Lazarus qeriga kömupnöhök guliba wahöta qaksirigö köt köteñ mosöta kañgoriga ambazip kambunöñ ekeri, yeñon Jisösgö könañi nañgöba jiba jim asariget. 18 Jisösnöñ añgöletot mi meyöhi, keu mi mötkeañgöra aka ambazip kambunöñ lulunđa köl öröm wañgibingö anget.

19 Mewö angetka Farisi (Köna keugö kapañkölköl) yeñon nanñinök eraum möta kewö jiget, “Mötket. Gölmeñi gölmeñi ambazip yeñon mönö lulunđa öröba yañgö andöñe anakze aka nini keu nup miyök mem bibihiinga ölni kun qahö asuhuza.” Mewö.

Grik ambazip tosatñan Jisös jaruget.

20 Juda ambazip ak-kömukömu kendongöra Jerusalem sitinöñ öñgöba Anutu waikni memba möpöseigeri, yeñgö sutñine Grik ambazip tosatñi mohotñe malget. 21 Yeñon gwarek qetñi Filip yañgöreñ kaget. Filipnöñ Galili prowinsgö taon qetñi Betsaida miangö azia malök. Grik yeñon yañgöreñ kaba qesiba kewö jiget mörök, “Ketañamnini, nini sihimninan Jisös ekingö mötzin.”

22 Mewö jiget möta Andrugöreñ anda keu mi jii mörök. Jii möta mohotñe anda Jisös jiyohot mörök.

23 Keu mi möta melenđa kewö jiyök, “Suepkö asakmararañan Suep gölmegö Azi Ölni yañgöreñ kunbuk asuhum kutuiga asarimawi, miangö nalöñan mönö töriza. 24 Nöñon kömupnañgö söpsöp keu öl töhöñni kun kewö jibi mötket: Sehoñ kötni gölmeñöñ qahö geba julma ewö, mönö öne miyök

ahöma. Mewö öne ahömapmö, geba julma ewö, korapnan mönö jula öndölböndöl wahöri ölni gwötpuk söhöma.

²⁵ **“Miangö dop denike yeñon malmalnini nanñinanğöra anğon köla nanñini imbi-imbi siyonşayonji qahö malbingö ak engimakzawi, yeñgö malmalninan mönö sohoma. Mewö sohomapmö, kunñan kun nanñi malmalñi göragöra ala nia jegep al niñgimawi, yañon mönö malmal ölni öndölböndölnambuk miwikñaiba köhöiba teteköñi qahö mal öñgöma. ²⁶ Kunñan ni welen qem niñgimangö jizawi, yañon mönö ni nuatangöba mali dop kölma. Weleni qemakzawi, mönö ni anda kaba malmamañgöreñ mewöyök nömbuk malma. Kunñan nömbuk mala weleni qem niñgimakzawi, Iwinöñ mönö i göda qem wañgii malma.”* Mewö.

Jisösnöñ kömumba gulimawañgö keu saiñi jiyök.

²⁷ Jisösnöñ jiyök, “Wösöni döлки kot gwözöñniga amqam aka maljal. Denöwö jibileñak? Keu jaruzal. O Iwi, gi ölop aua nalö kewöñañgö köñjiliñnöñök meköm niñgiman. Töndup kewögöra mewö qahö köulukömam: Aua kianañgö sihimbölöñi mi mököşönđa bisimamğöra aka nangak qakne aljan. ²⁸ O Iwi, gi mönö nangi aködamungi al niñgiba qetbuñagi mem qariman.” Mewö köuluköiga Suepnöhök keu kewö asuhiba erök, “Nöñon aködamuni lök al gihiba mewö qetbuñani mem qarial aka toroqeba mem qaribiga sehiba anma.”

²⁹ Keu mi asuhuiga ambazip kambu kinget yeñon mi möta jiget, “Wöl pöndañ qetza.” Tosatñan

* **12:25:** Mat 10.39; 16.25; Mak 8.35; Luk 9.24; 17.33

jiget, “Suep garata kunjan yangöra keu jiiga kouruknji mötzin.”

³⁰ Mewö mewö jigetka kewö jii mötket, “Kouruk mi nöngöra aka qahö asuhuzapmö, mi engöra aka asuhuza. ³¹ Nalö kewöñe gölmeñi gölmeñi ambazip ahakmeme bölöñi wuatañgömakzei, yeñgö kewötkewöt nalöñinan mönö mesohol köl engiza. Anutunöñ yeñgö keuñini jim teköba likepñi meleş engiiga qakñine öngömapkö akza. Nalö kewöñe Anutunöñ Bölöñangö Kembuñi gölme dop galöm köl engimakzawi, mönö i közöliga yaigep etmapkö akza. ³² Yanön etmapmö, nöngöra kewö asuhuma: Ambazipnöñ gölmenöhök nömemba könakemba kösököm niñgigetka öngöba kinbiga köna ahuiga ambazip gölme dop öröm engibiga luluñda nöngöreñ kaba kambu köla kinme.” ³³ Mi kömup denöwöñi kömumawi, miangö keu saña mewö jii mötket.

³⁴ *Ambazip kambu yeñön mi möta kewö jiget mörök, “Nini Köna keu oyoñda kewö mötzin, ‘Kraistnöñ qahö kömumba teteköñi qahö mal öngöba malma.’ Göñön wuanöngöra kewö jizan, ‘Suep gölmegö Azi Ölni gölmenöhök memba kösökögetka könakemba öngöba kinma.’ Suep gölmegö Azi Ölni mi dañön?”

³⁵ Mi möta meleş engiyök, “Asakñan nalö töröptökñi kunbuk sutñine asariba malma. Söñaupnöñ qakñine öngöba turum engii miangö buñaji akepuköra mönö asakñe anda kaba malme. Asakñan ahöm engimawañgö dop mönö asakñe malme. Dañön panamanöñ jipjap anda

* **12:34:** Sum 110.4; Ais 9.7; Eze 37.25; Dan 7.14

kamazzawi, mönö denike angotmawi, mi qahö mötza. ³⁶ Mianğöra asakñan nalö dawik embuk malmawi, nalö mianğöreñ mi mönö urunöñ möt anğön köla malme. Asakñanğö könagesö aka malmegöra mönö asakñi mi möt nariba malme.” Jisösnöñ keu mewö jiba enğömosöta tölapköba anök. Mewö.

Juda ketanji yengö uruköhöikñinan qahö löwöriyök.

³⁷ Jisösnöñ anğöletot gwötpuk memba maliga Juda yeñön mi jeñinan eketmö, töndup i qahö möt narim wanğiba silebile malget. ³⁸* Mewö malgetka kezapqetok azi Aisaiağöreñ keu kun mi öljambuk asuhuyök. Yanğön keu mi kewö ohoyöha ahöza,

“O Kambu, neñön Buña keu jim asariba uruñini kungum enğimakzinmö, dañön mi möt narib-
awak?

Kembunöñ kukösumñi mi mönö dagöra indeli möt asarima?”

³⁹ Amötqeçe Toñi möt narim wanğibingö lömböriba osigeri, Aisaianöñ mianğö könañi möta keu kun qeljiñe kewö jiba ohoyöha ahöza,

⁴⁰ *“Nanñini jeñinan yuai eka könañi ek kutubepuk me uruñinan keu könañi möt asaribepuk. Mi möt asariba uruñini melenjebepuk.

Uruñini melenjgetka mem ölöwak enğibilenjbuk. Yanğön mewö asuhubapuköra ambazip jeñini mem gömöliba uruñini gwözöñniga malje.”

* **12:38:** Ais 53.1 * **12:40:** Ais 6.10

⁴¹ Jisösnöŋ Suepkö asakmararaŋnöŋ asariba mali Aisaianöŋ mewö eka könaŋi jim asariba keu mi jiyök.

⁴² Jitŋememe aka galömkölköl azi yeŋgöreŋök gwötpukŋan mewöyök Jisös möt narigetmö, Farisi (Köna keugö kapaŋkölköl) yeŋön köuluk miri kambunöhök közöl eŋgibepuköra mi aukŋe qahö jim miwikŋaiget. ⁴³ Ambazipnöŋ möpöseim eŋgimegöra kapaŋ kölgetmö, Anutunöŋ möpöseim eŋgimapköra mi gemasolokep aket. Mewö.

Jisösgö keuŋan ambazip kewöta keunini jim teköma.

⁴⁴ Tosatŋan mewö aketmö, Jisösnöŋ keu qeta kewö jiyök, “Kunŋan möt narim niŋgizawi, yaŋön niyök qahö möt narim niŋgizapmö, kunöŋ melaim niŋgiyöhi, i mewöyök möt narim waŋgiza. ⁴⁵ Kunŋan ni neka mönö melaim niŋgiyöhi, i mewöyök ehakza. ⁴⁶ Ambazip kun ni möt narim niŋgizawaŋön mönö söŋaupnöŋ qekötahöba malbapuk. Miangöra nöŋön eta asuhuba gölmeŋi gölmeŋi eŋgö asakŋina aka maljal.

⁴⁷ “Nöŋön eta asuhuba gölmeŋi gölmeŋi eŋgö keuŋini jim tekömangöra aka qahö kayalmö, ambazip gölme dop amöt qem eŋgibiga nalö kewöŋe letota Suepkö buŋaya akŋegöra aka kayala maljal. Miangöra ambazip nöŋgö Buŋa keuni möta qahö tem köla wuatangömakzei ewö, nöŋön yeŋgö keuŋini qahö jim tekömam. ⁴⁸ Denike yeŋön jijiwilit ak niŋgiba Buŋa keuni qahö möt aŋgön köljei, yeŋgö jim teteköŋinan mönö kewö asuhuma: Nöŋön Buŋa keu jibi mötkeri, keu mianöŋ mönö

nalö ketanje keunji jim teköiga sihimbölöjini miangö dop mötme.

⁴⁹ “Könañi kewögöra mewö asuhuma: Nöñön Buña keu jiba malali, mi keu omani qahö. Mi nani imbineyök qahö asuhuiga jiba kota malal. Mewö qahöpmö, Iwi melaim niñgiyöhanön nanjak keu jit denöwö jimami, miangö jim kutum niñgiiga jiba kota maljal. ⁵⁰ Iwigöreñ jimkutukutu mi-añön mönö inini malmal köhöikne al engimakza, mi mötzal. Miangöra Iwinan mi jimamgö jim kutum niñgiyöhi, mönö miangö dop Buña keu jimakzal.” Mewö.

13

Jisösnöñ gwarek yenjö könañini sanjoñök.

¹ Ak-kömukömu kendonöñ* töriiga Jisösnöñ könañi kewö möt yaköyök, ‘Gölme mosöta Iwinangöreñ öngömamangö nalöñan mönö töriza.’ Mewö möt yaköba nanñi alaurupñi gölmenöñ malgeri, mi uruñan jöpaköm engiba mala teteköñe miangöreñ mewöyök uru jöjöpani mi kondel engiyök.

² Kömumawangö nalöñan kam kuñgumamgö aiga nalö kunöñ suñgemgö nene nemingö tokoba mohotne tatketka yuai kewö asuhuyök: Saimon Iskariotkö nahönñi qetñi Judas i Satanöñ lök sölölohöyök. Jisös mamalolo ak wangimapkö keunji mi sanep ali uruñe geiga möta tarök. ³ Jisösnöñ nanñi könañi mi kewö möt kutuyök, ‘Iwinöñ yuai

* **13:1:** Anutunöñ mönöwök Israel ambazip neñgehori ba neñgoñgiröhi, kendon miangö qetñi Nei keunöñ Pasowa jize. Eksodus 12.15

pakpakö kukösumñi mi nöngö böröne aliga Anu-tugöreñök eta mala kunbuk yangöreñ öngömamgö akzal.’

⁴ Könañi mewö möt kutuba nene nemba tatkerañgöreñök wahöta malukuñi köteköba nupkö opo jöhanñi kun memba kembrañe köpeiba jöhöyök. ⁵ Mi jöhöba o joutnöñ mokoï geiga könañiba gwarekurupñi yengö könañini sanğonñök. Sanğon teköba opo jöhanñi (tauöl) kembrañe köpeiba jöhöyöhi, mianğon könañini kutuyök. ⁶ Sanğonda anda Saimon Pitögö könañe kanğoriga kewö jii mörök, “O Kembu gi welenqeçe etqeçenji qahö. Göñon nöngö könañi sanğonñönga qahö dop kölma.”

⁷ Mewö jii möta kewö meleşnök, “Yuai dölki akzali, göñon mianğö könañi nalö kewöñe qahö möt kutuzanmö, könañeğpnöñ mi ölop möt asariba malman.”

⁸ Meleşniga kewö kapan köla jiyök, “Gi mönö nöngö könañi nalö kunöñ qahöpmahöp sanğonman.” Mewö jiiga kewö jiyök, “Nöñon gi qahö sanğon gihimam ewö, gi mönö nöngö gwarekni toroqeba malmamgö osiman.”

⁹ Mewö jiiga Saimon Pitönöñ pörösöl ala auruba meleşnök, “Kembu, mewögöra gi könananök qahöpmö, böröni aka nöropni mi mohotje sanğonman.”

¹⁰ Mewö meleşniga kewö jii mörök, “Kunñan o ariba kaiga könañi tok sanğonninga töwötñi qahö sarakñi ak teköma. İnini körek lök sarakñi ak teközemö, mohotnöñök sarakñi qahö akza.”

¹¹ Dañon mamalolo ak wañgimamgö ahöhi, Jisösnöñ mi möta mianğöra kewö jiyök, “İnini körek sarakñi qahö akze.”

12 *Könañini sañgoñ teköba malukuñi kunbuk löngöta eta tari negetka kewö qesim engiba jiyök, “Nöñön yuai ak engizali, inini mianğö könañi möt asarize me qahö? 13 Inini nöngöra ‘Böhi!’ aka ‘Kembu!’ mewö noholakze aka nöñön mi ölna akzal. Mianğöra mi dopñe jimakze. 14 Nöñön engö Kembu Böhiñini aka welenqeçe eretñangö silik memba könañini sañgonjal ewö, inini mönö mewöñanök memba et al añguba weleqeçe aka könañini sañgoñ añguba malgetka dop kölma. Mi mönö nupñina.

15 “Nöñön aka kondel engizali, inini mönö mianğö dop nañgöba welen qem añguba malme. Mewö malmegöra mianğö silikñi nöñön merak kondel engibiga ekze. Mi mötmöriba mianğö tandökñi wu-atangögetka dop kölma. 16 *Nöñön keu öl töhöñni kun kewö jibi mötket: Welenqeçenöñ eretñi aiga toñan öngöngöñi akza. Gwareknöñ böhiñi oñgita öngöngöñi akñangö osima. Mewöyök azi kembu kunöñ garatañi melaiiga kolek anda nup memakzawi, yañön mönö kembuñangö bapñe malakza. 17 Inini keu kötni mi merak möt kutuze. Mewögöra silememe mosöta alaurupñini nembö bapñine anda malme ewö, nöñön mönö engöra ‘I-ia simbawoñ!’ jimam.” Mewö.

Kunöñ mamalolo ak wangimapkö qeljine jiyök.

Mat 26.20-25; Mak 14.17-21; Luk 22.21-23

18 * “Keu jizali, mi mönö inini lökñanök qahö engömeza. Nöñön niñia möwölöhöba engömeali, engö könañamñini mönö ölop möt kutuzal. Mewö

* **13:12:** Luk 22.27 * **13:16:** Mat 10.24; Luk 6.40; Jon 15.20

* **13:18:** Sum 41.9

maljalmö, Buŋa Kimbi kun mianön ölnambuk aiga dop kölma. Keu mi kewö, ‘Kunön nönğörej nene mohotje neziri, yañön mönö kelewele aka gwakötŋan tötäl niŋgiba nuŋgumamgö jöjöröza.’†

19 “Ni ölni könŋep asuhumawaŋgö keuŋa mutuk jizal. Mianğöra ölni asuhumawi, inini nalö mianğörej nönğö könani möt asariba kewö jime, ‘Aha! Malmalgö könani nalö dop mala kota malöhi, yañön mönö mia akza.’ Mewö jiba möt narim niŋgimeğöra nönön keu mi qeljiŋe aukŋe jibiga mötze.

20 * “Nönön keu öl töhöŋŋi kun kewö jibi mötket: Nönön ambazip kun melaibi nup memamğöra kaiga kunŋan i köl örözawi, yañön mönö ni tok köl öröm niŋgima. Mewöŋanök ni köl öröm niŋgizawañön mönö melaim niŋgiyöhi, mönö i mewöyök köl öröm waŋgima.”

21 Jisösönöŋ keu mewö jiba wösöŋi kot gwözönđa jul takömamgö ahiga keu indela kewö jiyök, “Nönön keu öl töhöŋŋi kun kewö jibi mötket: Eñğörejök kunŋan ni mamalolo mem niŋgima.”

22 Mewö jiiga gwarekurupŋan nanŋini kuŋkalilin uba aŋgehiba nanjök nanjök kewö mötmoriget, ‘Mönö dagöra jizapto?’ Mewö mötmöriba uruyahöt tönpin tatket. 23 Tönpin tata nene negetka Jisösgö wölböt gwarekŋan yaŋgö qöhöröneyök tarök. 24 Yañön tariga Saimon Pitönöŋ nöröpŋan gwarek mi söpsöp ak waŋgiba kewö jii mörök, “Keu mi dagöra jizawi, mi qesiba jinöŋ mötŋi.”

† **13:18:** Gwakötŋan tötäl niŋgiba nuŋgumamgö jöjöröza, keu mi Israel yeŋğörej dopkeu kun. Könani kewö: Yañön uruŋan qetala utaköm niŋgiza. * **13:20:** Mat 10.40; Mak 9.37; Luk 9.48; 10.16

²⁵ Mewö jii möta lapingöba Jisösgö töptöpne nanğöba kewö qesiyök, “Kembu, azi mi danön?”

²⁶ Mewö qesiiga melen wanğiyök, “Beret kitipni kulunön kundungöba kun wanğimami, yanön mönö mi.” Melen wanğiba beret kitipni memba kulunön kundungöba Judas wanğiyök. Judasgö iwinji qetni Saimon Iskariot. ²⁷ Beret kitipni mi wanğiiga Satanön miangörenök Judasgö uruñe geyök. Miangöra Jisösnön i jim kutum wanğiba kewö jiyök, “Yuai akñani, mi mönö zilañ akñan.” ²⁸ Keu mewö jiyökmö, mi wuanöngöra jii möröhi, mi gwarek tosatñan mohokñe tata nene negeri, yeñgörenök kunñan kun qahö möt asariyök. ²⁹ Gwarek tosatñan miangöra kewö mötmöriget, “Judasnön moneñ gösögö galömña malöhi, miangöra kendon nalöñe yuai osibini, mi bohonji memapköra melaiza me ambazip wanapni moneñ yuai kun memba enğimapköra jiza.”

³⁰ Judasnön keu mi ölop möt asariba beret kitipni mi memba miangörenök mosöta yaigep aniga sunğem ahök. Mewö.

Jisösnön jöjöpñ keu dölökñi jim kutuyök.

³¹ Judasnön mosöta yaigep aniga Jisösnön kewö jiyök, “Dölki Anutunön aködamunñi Suep gölmegö Azi Ölni al teköm wanğiiga yanön Anutugö qetbuñani mem qarri asuhuza. ³² Yanön Anutugö qetbuñani mem qariba Anutubuk qekötahözawangöra Anutunön mönö mewöñanök yangö qetbuñani mem qarima. Mi nalö qahö körii mem qarriiga asakmararañan asuhum tiñgiri mal öngöma.

33 **“O gömokurupni, nöñön nalö töröptökñi kunbuk embuk malmam. Mi mala engömosötpiga könañgep jarum niñgiba malme. Juda yeñgöra kewö jibi mötket, ‘Ni miri anmami, injini miangöreñ kabingö osime.’ Keu miyöhök dölki engöra mewöyök jizal.*

34 **“Nöñön jöjöpañ keu dölökñi jim kutum engizal: Injini mönö uruñinan jöpaköm aᅇguba malme. Nöñön urukalem ak eñgiba malali, injini mönö miangö dop jöpaköba urukalem ak aᅇguba malme. ³⁵ Sutñine uruñinan jöpaköm aᅇguba malme ewö, ambazip körek yeñön eñgeka könañamñini möt kutuba kewö jiba malme, ‘Aha! Mönö Jisösgö gwarekurupñi akze.’ ” Mewö.*

*Pitönöñ Jisös qaᅇ kölmapakö keu qeljiñe jiyök.
Mat 26.31-35; Mak 14.27-31; Luk 22.31-34*

36 Saimon Pitönöñ Jisös kewö qesim wañgiyök, “Kembu, gi denike anman?” Qesim wañgiiga melenök, “Ni denike anmami, gi miangöreñ nuatañgöba kamamgö osiman. Nalö kewöñe osimanmö, könañgep mia ölop nuatañgöba kaman.”

37 Melenñiga kewö qesiyök, “Kembu, ni mönö wuanöñgöra nalö kewöñe gi guatañgöba kamamgö osimam? Nöñön mönö malmalni göhöra aka köleñda mosötmam.”

38 Qesiiga kewö melenök, “Gi öñña malmalgi nöñgöra aka köleñda mosötmamgö jizan me? Keu mi jitkanök jizan. Nöñön keu öl töhöññi kun kewö

* **13:33:** Jon 7.34 * **13:34:** Jon 15.12, 17; 1 Jon 3.23; 2 Jon 5

jibi mötnöŋ: Merak kuruknöŋ qetmamgö dopdowiiga göŋön nalö miangöreŋ qaŋ köl niŋginöŋga indimŋi karöbut akŋa.” Mewö.

14

Jisösnöŋ gwarekurupŋi urukölalep mem enġiyök.

¹ “Uruŋinan mönö waimanġat kude möta wösöbirik kude aka malme! Mönö Anutu möt narime aka ni mohok möt narim niŋgiba malme! ² Nöŋgö Iwinanġö miri bohonne miri uruŋi sehisehiŋi ahöze. Mi qahö ahöbeak ewö, mönö enġöra keu kewö jibilenak: Nöŋön mönö miangöreŋ öŋgöba enġö dum miri mem möhamġömam.

³ “Nöŋön mutuk anda öŋgöba enġö dum miriŋini mem möhamġömam-mö, nöŋön miri malmami, iŋini mewöyök nömbuk miangöreŋ mohotŋe malbingö sihimŋi mötzal. Miangöra nöŋön mönö kunbuk liliŋgöba kaba enġuanġitpiga euyangöreŋ öŋgöme. ⁴ Nöŋön miri denike anmami, iŋini miangö könaŋi lök möt kutuze.” Mewö.

Iwigöreŋ anangö köna mi Jisös.

⁵ Jisösnöŋ mewö jiiga gwarek qetŋi Tomas yaŋön kewö jiyök, “O Kembu, gi miri denike anmani, nini mi qahö mötzin. Miangöra miangö könaŋi mi mönö denöwö möt kutubinak?”

⁶ Mi möta kewö jii mörök, “Nöŋön Köna akzal. Nöŋön Keu ölni aka Malmal köhöikŋi akzal. Kunŋan Iwigöreŋ anġotmamgö möta nöŋgöreŋ kama ewö, yaŋön mönö köna miwikŋaima. Köna murutŋi kun qahö ahöza. ⁷ Iŋini ni ölna möt kutum niŋgibeak ewö, mönö nani Iwini mewöŋanök möt

kutum wangibeak. Inini nalö kiangörenök könahiba nöngö Iwini lök eka möt wangize.”

⁸ Mewö jiiga Filipnönj kewö jii mörök, “O Kembu, gi Iwi kondel nenjinönga nenjon i uba ehinga dop köl nenjima.”

⁹ Mi möta Jisösnönj jii mörök, “O Filip, ni nalö köröp tinjini embuk pöndañ malbigun neka töndup könani qahö möt kutuzan me? Kunjan ni nek kutuyöhi, yañon mönö Iwini mewöyök eka malja. Miangöra gi mönö denöwögöra Iwi kondel nenjinönga ekingöra jizan?

¹⁰ “Nöñon Iwibuk qekötahöba kinbiga Iwinönj nömbuk qekötahöba kinjawi, mi möt narizan me qahö? Keu Buña jibiga mörakzei, nöñon keu mi nani uruneyök qahö memba jimakzal. Qahö! Nup memakzali, mi mewöyök Iwi nömbuk qekötahöba kinjawañon nam köl ninjii ölnji ahumakza. Miangöra nup memakzali, mi mönö yangö nuwa memakzal.

¹¹ “Nöñon Iwibuk qekötahöba kinbiga Iwinönj nömbuk qekötahöba kinja. Inini mönö mewö möt narim ninjiget. Keu mi jitnönj jibi möta qahö möt narim ninjibeak ewö, mi mönö anğöletotni ekzeangöra aka möt narim ninjime. ¹² Nöñon keu öl töhönnji kun kewö jibi mötket: Denike yeñon ni möt narim ninjizei, yeñon mewöyök ni anğöletot memba malali, miyöhök memakne. Miyöhök memakne aka nalö tosatne nöñon meali, miangö dopni onğita mi memakne. Nöñon Iwigörenj öngöba malmamanğöra aka anğöletot öngöngöñji ketanji megetka asuhume.

¹³ “Iwinan nöngöra aka qetbuñañambuk aknapkö mötzal. Miangöra aka Inini nöngö qetne wani

yuaigöra köulukömei, nöñön mönö mi akñam. Mewö akigun mianñön Iwinanğö qetbuñani jigetka qarimakña. ¹⁴ Inini yuai kungöra nöñgö qetne köuluköba qesim niñgime ewö, nöñön mönö mi akñam. ¹⁵ Inini uruñinan jöpaköm niñgimakze ewö, mönö nöñgö jöjöpañ keuni tem köla wuatangöba malme.” Mewö.

Jisösnöñ Uña Töröñi melaimamgö jim jöhöyök.

¹⁶ “Nöñön Iwi köuluköm wangibiga yañön nam köiput Toñi kun enjiiga eta nöñgö salupni aka teteköñi qahö embuk mal öñgöma. ¹⁷ Nam köiput Toñi mi Uña Töröñi. Yañön keu ölnanğö Toñi akza. Uruñini qahö melenget yeñön i qahö ek kutuba qahö möt wangize. Mianğöra yeñön i köl öröba möt anğön kölbिंगö osimakzemö, Uña yañön lök embuk malja aka könanğep uruñine geba embuk kinma. Mianğöra i kiana qahöpmö, i ölop möt kutum wangize.

¹⁸ “Nöñön enğömosötpiga gwani morö ewö qahö aka malme. Ni mönö enğören lilingöba kamam. ¹⁹ Nalö töröptökñi teköigun gölme ambazip omani yeñön ni kunbuk qahö neka malme. Yeñön qahöpmö, uruñini melenğeri, enñön ni ölop nehakñe. Nöñön köhöiba maljalangöra inini mewöñanök guliba köhöiba malme. ²⁰ Iwi, nani aka inini, nini mohok aka maljin. Nöñön Iwinambuk qekötahöba kinbiga inini nömbuk qekötahöba kingetka nöñön embuk qekötahöba kinjal. Mianğö könani mi Uña Töröñan uruñine gemawangö nalöñe ölop möt asarime.

²¹ “Kunñan nani jöjöpañ keuni pakpak möt anğön köla tem kölakzawi, yañön mönö uruñan ni

jöpaköm niŋgimakza. Kunŋan ni jöpaköm niŋgiiga nöŋgö Iwinan mönö i jöpaköm waŋgimakza aka nöŋön i jöpaköm waŋgimakzal. Nöŋön i jöpaköba könaŋamni indel waŋgibiga möt kutuma.”

²² Jisösnöŋ mewö jüiga Judas Iskariotkö wakaŋi Judas yaŋön kewö jiyök, “Kembu, gi denöwögöra könaŋamgi neŋgöreŋök indelman aka ambazip uruŋini qahö melenŋeri, yeŋgöra mi köyatim eŋgimamgö jizan?”

²³ Mewö jüiga kewö melen waŋgiyök, “Kunŋan uruŋan jöpaköm niŋgimakza ewö, yaŋön mönö nöŋgö Buŋa keuni tem köla wuatangöba malma. Mewö maliga Iwinan i jöpaköm waŋgiiga Iwi netkön mönö yaŋgö uruŋe geba pöndaŋ yambuk mohotŋe malbin. ²⁴ Kunŋan ni uruŋan qahö jöpaköm niŋgimakza ewö, i mönö nöŋgö Buŋa keuni qahö tem köla wuatangöba malma. Keu jibi mörakzei, mi nani Buŋaya qahöpmö, Iwi melaim niŋgiyöhi, yaŋön mi niŋgiiga jimakzal.

²⁵ “Nöŋön keu pakpak mi embuk pöndaŋ malali, nalö mianŋöreŋ kusum eŋgiba malal. ²⁶ Mewö malalmö, Iwinöŋ Uŋa Töröŋi nöŋgö qetne melai-iga eta nam köiput (aka tinjonjon) Tonjini akaŋa. Yaŋön keu pakpak kusum eŋgiba nöŋön qambaŋ keu pakpak eŋgiali, mi ölum eŋgubapüköra köl gulim eŋgimakŋa.

²⁷ “Nöŋön luai eŋgizal. Nane luai sorokni qainŋi kun mi albi uruŋine ahöma. Gölmönöŋ ambazip yeŋön luai qem aŋgumakzei, nöŋön mianŋö tandök ewö kude qem eŋgimakzalmö, mi onŋita luai qainŋi kun eŋgimakŋam. Mianŋöra uruŋinan mönö wösöbirik kude aka keŋgötŋini kude möta malme.

28 “Nöñön keu kewö jibiga mötket, ‘Nöñön engömosöta öngöba mala kunbuk engören lilingömam.’ İhini uruñinan ni ölna jöpaköm niñgibeak ewö, keu jizali, miangöra ölop söngaibeak. İwinöñ nöngö ketañamni akza. Miangöra ni ‘İwinangören öngömam,’ jizali, İhini mi möta ölop urusösöngai miwikñaigetka dop kölbawak. 29 Keu dölki jibi mötzei, miangö ölni bian asuhuma. Ölni asuhumawi, İhini nalö miangören mi ölop mötmöriba möt narime. Miangöra mi nalö kiangören qeljine jibi mötze.

30 “Nalöni törizawañgöra embuk keu gwötpuk kunbuk jimangö dop qahö mötzal. Bölöñangö Kembuñan gölme dop galöm köl engimakzawi, yañön mönö kamangö jöjöröza. Yañgö ösumñan mönö luhut qahö al niñgiba kondondöngöma. Nöngören köna mi yañön jim kutumawañgö dop qahö ahöza. 31 Qahö ahözapmö, nöñön İwi jöpaköm wañgimakzalañgöra yuai pakpak keu jim kutum niñgimakzawañgö dop ahakzal. Gölme ambazipnöñ nöngö könañamni mewö jim kusum engigetka möt asarimegöra mötzal. Miangöra mönö mosöta wahöta kagetka anbin.” Mewö.

15

Jisösnöñ wain ip bömöñji, neñön böröñji akzin.

1 Jisösnöñ gwarek yengöra kewö jiyök, “Nöñön wain ip öl sorokñi akiga nöngö İwinan wain nupkö toñi akza. 2 Nöñön ip ewö qak börönambuk akzal. İp böröni pakpak ölni qahö miwikñaiba gilipitñi akzei, İwinan mi kutum gil engima. İp böröni pakpak nöngören tatketka ölni ahum sirizei, İwinan

mi mönö köl könjörat engima. Ahakmemegö ölni qarim kuwulem sehisehinji miwikñajimegöra mönö mem solanim engima.

³ “Injini Buña keu jibi mötketka mianjön lök mem solaniba köl könjörat engii sarakñi aka malje. ⁴ Mianjöra enjön mönö nömbuk qekötahöba kinme. Mewö kingetka nöñjön embuk kinmam. Wain böröñi kunñan ip kembaje qahö tata tala etza ewö, mi mönö nanñi nam köl anguba ölni ahum wanjimapkö osima. Mianjögö dop injini mewöñanök nömbuk qahö qekötahöba kinje ewö, mönö nanñinök ahakmemegö ölni öne ahum wanjibingö osime.

⁵ “Ni waingö ipñi akiga enjön mianjögö böröñi akze. Injini nömosöta nanñinök kinda yuai kun ak-ingö osime. Mianjögöra kunñan nömbuk qekötahöba kiniga nöñjön yambuk qekötahöba kinbiga yanjön mönö ahakmemegö ölni önöñi qahö miwikñajiba siriba malma. ⁶ Denike yeñjön nömbuk qahö qekötahöba kinje ewö, wain ip toñan mönö i ip böröñi ewö kutum engiba gili yaigep anme. Anda soholigetka memba tokoba könöpnöñ gili geba jeme.

⁷ “Yeñjön jememö, likepñi injini mönö nömbuk qekötahöba kinme. Mewö kingetka nöngö Buña keunan engö uruñine qekötahöba kinja ewö, injini i me wai buña qem angubingö mötzei, mi mönö Iwi köuluköm wanjigetka engima. ⁸ Injini nöngö gwarekurupni aka kingetka ahakmemenjanjögö ölni önöñi qahö ahuba eta tatketka malme. Mewö memba malgeranjögöra Iwinanjögö qetñan mönö aködamunñambuk aka ahöma. ⁹ Iwinan ni jöpaköm

ningiba malöhi, nöñön mönö miangö dop mohot jöpaköm engiba malal. Injini mönö nöngö urukalem uruñe kinme. ¹⁰ Nöñön Iwinangörej jöjöpañ keu tem köla mala kota yangö urukalem uruñe kinjal. Miangö dop eñön nöngö jöjöpañ keuni memba tem köla malme ewö, mönö ölöp nöngö urukalem uruñe kingetka jöpaköm engiba malmam.

¹¹ “Nöñön uru sösöngai al engibi engörej kutuiga uruñini kokolak qei ahöiga önöñi qahö söngaim sehiba malmegöra keu mi jibi mötze. ¹² *Nöngörej Köna keu mi kewö: Nöñön uru jöpaköm engiba malali, injini mönö miangö dop nannini jöpaköm aᅇguba malme. ¹³ Kunᅇan alaurupᅇi yengöra aka nannᅇi malmalᅇi tököba mosötmawi, mianᅇön mönö urukalem öngöngöñi ketanᅇi akza. Kunᅇan mi öᅇgita jöpaköm engimamgö osima. Urukalem tosatᅇi mi miangö eretᅇi.

¹⁴ “Nöñön yuai akᅇgöra jim kutum engimakzali, injini miangö dop ahakze ewö, mönö nöngö alaurupᅇi akze. ¹⁵ Welenᅇeᅇegö könanᅇi kewö: Galöᅇᅇan nupᅇi denöwö aka memakzawi, mi welenᅇeᅇeᅇan qahö mörakza. Miangöra engö qetᅇini ‘Welenᅇeᅇeurupᅇi,’ mewö qahö toroᅇeba engoholmam-mö, Iwinangörejök Buᅇa keu mörali, mi pakpak mönö engöra indelbiga mötze. Mewögöra qetᅇini ‘Alaurupᅇi,’ mewö engoholbiga dop köᅇja.

¹⁶ “O alaurupᅇi, eñön ni qahö möwölöhöm ningigetmö, nöñön injini möwölöhöba kuᅇgum engibiga kinje. Miangöra eñön liliköba anda öᅇñi kewö miwikᅇaiba pöndanᅇi sirigetka ahöahöñi

* **15:12:** Jon 13.34; 15.17; 1 Jon 3.23; 2 Jon 5

ahi dop kölma: Nöngö qetni qeta yuai mi me mi mianğöra Iwi köulukömei, mi mönö engii buñañini akña. ¹⁷ İñini mönö sutñine jöpaköm anğuba malme. Nöñön jöjöpañ keuni mewö jim kutum engizal.” Mewö.

Urumelenğö kopañi yeñön iñini kazik ak engime.

¹⁸ “Gölmenöñ uruñini qahö melenget yeñön kazik ak engime ewö, mönö keu kewö mi möt kutume: Yeñön mutuk ni mewöñanök kazik ak niñgiba malget. ¹⁹ İñini urumelenğö kopa kambunöñ malbeak ewö, kambu-urup mienön mönö nanñini alaurupñini urukalem ak engibeak. Mi ak engibeakmö, nöñön iñini möwölöhöba yeñgö areñnöhök engömembiga murutñi aka malje. Yeñgöreñ ahakmeme bölöñi mi andö qeba maljeanğöra aka kazik ak engimakze.

²⁰ *“Nöñön keu kun kewö jibi mötkeri, mi mönö urukönömñine ala mötmörime, ‘Welenqeçenöñ eretñi aiga toñan ketanamñi akza. Gwareknöñ böhiñi onğita öngöngöñi akñamgö osima.’ Mianğö dop tosatñan ni sesewerowero ak niñgiba mala kotket ewö, tosatñi yeñön mönö nöngö undumurupni iñini mewöñanök sesewerowero ak engiba malme. Yeñön nöngöreñ Buña keu möt anğön köla malget ewö, iñini nöngö keuni jim sehiba malgetka mönö mewöñanök ölop möt anğön köla malme. ²¹ Mewö malmemö, ni melaim niñgiyöhi, yeñön i qahö möt wañgize. Mianğöra silebile qakñe yuai könañi könañi lañ ak engime, mi mönö nöngö qetbuñanangöra aka asuhum engima.

* **15:20:** Mat 10.24; Luk 6.40; Jon 13.16

22 “Nöñön yeñgöreñ qahö eta Buña keu jibi mötpeak ewö, yeñön mönö köpösihitñinañgö gamuñi qahö möta malbeak. Mewö öne malbeakmö, nalö kewöñe siñgisöndokñini möt teköba köl turubingö osize. Möndömöndö keuñini mönö denöwö miwikñaiibeak? 23 Kunñan ni kazik ak niñgizawi, yañön mönö Iwini mewöñanök kazik ak wañgiza. 24 Angöletot öngöñgöñi ketañi meali, mi kunñan kun engö sutñine qahö memba malök. Nöñön mi qahö membilenak ewö, yeñön mönö köpösihitñinañgö gamuñi mi qahö möta malbeak. Tönpin malbeakmö, nalö kewöñe nöñön mi membiga ek teköbagun töndup ni aka Iwini mewöñanök öne töhön kazik ak netkiba malje.

25 * “Mewö ak netkiba malgetka Buña keu kun öñambuk ahök. Mosesnöñ köna keu engiyöhi, mianğöreñ keu mi kewö ohoget ahöza, ‘Yeñön öne töhön lañ kazik ak niñgiba malget.’ Keu mianñön lök öñambuk ahök.

26 Nöñön Iwigöreñ öngöba köiput Tonji melaibiga engöreñ kaba uruñine geba nañgöm engima. Uña Töröñi yañön keu öñañgö Tonji akza. Yañön Iwigöreñök eta nöñgö könañamni nañgöba jim asarim engiba malma. 27 Yañön mewö malma aka eñön mewöñanök nöñgö könañamni nañgöba jim asariba malme. Nöñön könahiba urugö qenjarök nup memba malali, eñön mönö könakönahineyök nömbuk mala kotket. Mianğöra iñini mönö mi ölop jim asariba malme. Mewö.

16

* 15:25: Sum 35.19; 69.4

Jisösgö gwarekurupni bim engöhöi utal engime.

¹ Jisösnöñ toroqeba kewö jiyök, “Inini tala eta engui janjun akepuköra nöñön keu mi qeljine jibi mötze. ² Uruñini qahö melenget yeñön mönö köuluk miri kambuñineyök utal engigetka yaigep eta malme. Könañgep nalö kun kam kuñgumawi, miangören inini nöngöra aka engugetka kömume. Mewö enguba kewö jime, ‘Mewö miangön Anutugö welenni qeinga Anutugö uruñan ölöwakza.’ Köreknan mewö möt sohoba jime. ³ Yeñön Iwi aka ni netkö könañamniri qahö möt asarimakzeañgöra aka mewö ak engiba malme.

⁴ “Mewö tönpin malmemö, nöñön keu mi qeljine engöra jibi mötze. Miangöra nalö mi kam kuñguiga keu miangö ölni asuhumawi, inini nalö miangören ölop kewö jime, ‘Kraistnöñ kiangö buzup keuñi lök qeljine jii mörin.’ Nanak embuk malalañgöra aka keu mi nalö köröpni ahöiga mutuk qahö jibi möta kotket.” Mewö.

Uña Töröñan nupni kewö memakza:

⁵ “Nöñön nalö kiangören melaim niñgii erali, mönö yangören öngömangö akzal aigun engörenök kunjan kun kewö qahö qesim niñgiza, ‘Gi denike anman?’ ⁶ Keu mewö jizali, eñön mi möta miangöra wösöbiriknöñ uruñini kokolak qei malje.

⁷ “Mewö maljemö, töndup nöñön miangö likepni keu ölni kun kewö jibi mötket: Nöñön engömosöta lilingöba öngömami, miangö ölnan asuhuiga mönö kewö mem ölöwak engima: Nöñön öngöba köiput Toñi melaibiga engören eta uruñine gema. Nöñön qahö engömosöta öngöbilenak ewö, Toñi yañön mönö engören etmamgö osima.

⁸ “Köiput Tonji yañön eta malmalgö könañi kewö kondel engiba malma: Gölme dop siñgisöndokñini indela kondeli Anutunöñ keuñini jim teköiga solanime me uruñini qahö melengetka keuñini jim teköba likepñi melen engima. Ambazipnöñ könañamñini mewö eka möt kutume. ⁹ Ni qahö möt narim niñgizeañgöra siñgisöndokö könañi indel engiiga möt kutume.

¹⁰ “Anutugö köna solanñi möt sohoba nöñgöra keu lañ jimakze. Mianğöra yañön nöñgö könañamni indela kondel engiiga kewö möt kutum niñgime: Nöñön solanñi mala Iwinañgöreñ lilingöba öñgöbiga ni kunbuk qahö neka malme.

¹¹ Bölöñangö Kembuñi gölme dop galöm köl engimakzapmö, Anutunöñ yangö keuñi lök jim teköyöha könöp siagö Tonji akña. Mianğö dop körek neñgö keunini mewöyök jim teköma.

¹² “Nöñön ölop keu gwötpuk toroqeba jibilenakmö, mi nalö kewöñe jibiga usuñumburañ aka köl gulibingö osibepuk. ¹³ Mi osibepukmö, keu ölnañgö Tonji, Uña Töröñi yañön eta uruñine geba keu sañep qei mötme. Mi nanñi imbiñangö dop lañ qahö jiba malmapmö, Anutugöreñ keu kezap ala mötzawi, yañön mönö miyök jimakña aka könañgep yuai asuhumawi, mi qeljiñe indela jima. Mianğöra yañön engömembra keu ölni pakpak mianğö o angöñe al engiiga keu ölnañgö köna tiba anme.

¹⁴ “Yañön mönö nane köwenöhök keu memba jim asariba uru kuñgum engiba malma. Mianğöra mönö nöñgö könani indeliga nöñön qetbuñanambuk ahakñam. ¹⁵ Iwinañgöreñ yuai pakpak ahözawi, mi mönö nöñgö böröne ali ahöza. Mianğöra jizal,

‘Yañön mönö nane köwenöhök keu memba jim asariba uru kuñgum ak engiba malma.’ Keu mi mewö.”

Wösöbirik malgetka melenjiga urusösöngai mötme.

¹⁶ “Nalö töröpñi kun teköiga injini ni kunbuk qahö nekñe. Mianğö andöñe nalö töröpñi kun teköigun mönö asuhum engibi ölop kunbuk nekñe.”

¹⁷ Mewö jiiga gwarekurupñi yengörenök tosatñan nanñinök kewö eraum mötket, “Keu kewö jiza, ‘Nalö töröpñi kun teköiga injini ni qahö nekñe. Mianğö andöñe nalö töröpñi kun teköigun mönö asuhum engibi ölop kunbuk nekñe,’ aka keu kun kewö jiza, ‘Ni Iwinanğöreñ öngömam.’ Mewö jiiga mötzini, keu yahöt mianğö könani mi denöwö?”

¹⁸ Mewö eraum möta uzohola jiget, “Yañön ‘Nalö töröpñi teköigun,’ jizapmö, keu mianğö könani denöwö? Mi wuanöngöra jizawi, nini mi qahö möt asarizin.”

¹⁹ Mewö jiba qesim wañgibingö mötketka Jisösnöñ engek kutuba kewö jii mötket, “Keu kewö jizal, ‘Nalö töröpñi kun teköiga injini ni qahö nekñe. Mianğö andöñe nalö töröpñi kun teköigun mönö asuhum engibi ölop kunbuk nekñe,’ Injini mönö keu mianğö könani jaruba eraum mötze me?”

²⁰ “Nöñön keu öl töhönñi kun kewö jibi mötket: Nöñön anbiga injini jinğen köla sahötmemö, uruñini qahö melenget yeñön lañ börum memba sösöngai aka malme. Injini wösöbirik aka malmemö, wösöbirikñini mianğön mönö nöngöra aka melenđa sösöngai aka malme. ²¹ Ambinöñ morö memamğö nalöñi kam kuñguiga masö qeiga qemjen qakñe morö mezapmö, morö dölökñi memba kinda

i eka sösöngainangöra mönö sihimbölöni mi ölum qemakza. ²² Miangö dop injini mewöyök nalö kewöne wösöbirikpuk maljemö, nöñön könañep kunbuk asuhuba engekiga injini ölop urusösöngai buk malme. Urusösöngainini mi kunjan kun qahö enguan gitma.

²³ “Nalö miangöreñ yuai kungöra ni qahö qesim niñgimemö, köulukñini Iwigöreñ algetka diñdiñanök ani ampei malme. Nöñön keu öl töhöñni kun kewö jibi mötket: Injini nöngö qetnöñ yuai kungöra Iwi köuluköm wañgime ewö, yañön mi mönö tököm enjima. ²⁴ Nömbuk mala kageri, injini nalö miangöreñ yuai kungöra nöngö qetne qahö köuluköba malget. Mönö Iwi köuluköba malme. Köulukögetka ölop melen enjima. Mi enjiiga sösöngaininan asuhum sehiba uruñini kokolak qem teköi malme.” Mewö.

Jisösnöñ gölmegö ahakmeme bölöni mi luhut alakza.

²⁵ “Keu jibi möta kamakzei, mi keu sainjambuk jibi möta malget. Könañep nalö kun kam kuñgumawi, miangöreñ keu sainji mi kunbuk qahö qeba jibi mötme. Qahöpmö, Iwinangö könañi mi aukne jim asariba malmam. ²⁶ Nalö miangöreñ injini nöngö qetni qeta Iwi köuluköba malme. Miangö könañi kewö: Injini köulukñini Iwigöreñ albingöra nöngöreñ kunbuk qahö kamakñemö, nanñinak Iwigöreñ diñdiñi köuluköba malme. Nöñön enjö jit memba Iwigö qahö köulukömam.

²⁷ “Iwinöñ nanñak uruñan jöpaköm enjiba köulukñini kewögöra möta malma: Nöñön Anutugöreñök erali, injini nöngö könani mewö

möt nariba pöndaŋ uruŋinan jöpaköm niŋgiba mala kotketka köna mewö ahuiga köulukŋini möta malma. ²⁸ Nöŋön Iwi mosöta gölmenöŋ eta mala gölme mosöta kunbuk liliŋgöba Iwinanŋörenöŋ öŋgömam.”

²⁹ Mewö jiiga gwarekurupŋan jiget, “Mötnöŋ, keu dölki jizani, mi saini qahö qeba jizan. Mi mönö aukŋeyök jinöŋga ölop möt asarizin. ³⁰ Nini merak könaŋamgi kewö möt yaközin: Göŋön mönö nanganök yuai pakpak möt tekönöŋga kunŋan kun qesiba kusum gihimapköra qahö osizan. Mianŋöra gi Anutugöreŋök etnöŋi, nini mi ölop möt narizin.”

³¹ Mewö jigetka Jisösnöŋ melenŋa jiyök, “Merak ölop möt narim niŋgizemö, ³² mötket, nalö tandökŋi kun kama aka mianön lök mesohol köla naŋgunöŋ kinja. Nalö mianön kam kuŋguiga eŋön keŋgötŋini möta nömosöta deŋŋenda simbisembel aketka nanök malmam. Töndup nanöhök töhön qahö malmam-mö, Iwinan nömbuk malma. Iwinöŋ nömbuk malmawanŋöra aka nanöhök töhön qahö malmam. ³³ Eŋön toroqeba gölmenöŋ mala kahasililiŋ qakŋe möta malmemö, nömbuk qekötahöba luainöŋ malmegöra möta keu göndökŋi ki jibi mötze. Keuyök qahö jizalmö, nöŋön gölmegö ahakmeme bölöŋi mi lök luhut ala wahijambanŋi kusum teköbiga erök. Mianŋöra mönö ewebibiŋinambuk köhöiba saitŋgit malme.” Mewö.

17

Jisösnöŋ nanŋanŋöra Iwi köuluköyök.

¹⁻² Jisösnöŋ keu mewö jim teköba Suepnöŋ göröken ui öŋgöiga kewö köuluköyök, “Iwini,

göñön gölme dop ambazip pakpak Nahöngi nöngö bapne al enjinönga kukösum qakne Kembu ak enjizal. Ambazipnöñ Nahöngi nöngö keuni ölop qahö andö qeba onjita malme. Göñön ambazip sutñineyök tosatñi meköba nöngö böröne al enjiba kewö jim kutum niñginöñ, ‘Gi mönö i körek kusum enjinönga malmal köhöikñi miwikñaiba malme.’ Nup mi mem teköbiga Nahöngan qetbuñagi mem qarimapköra mönö aködamungi niñginöñ. Nöngö nalöni mi dölki kam kuñguiga kinda mewö köuluközal.

³ “Malmal köhöikñañgö könañi mi kewö: Göñön mohot Anutu ölni akzan aka azi Jisös Kraist ni melaim niñginönga erali, ambazipnöñ netkö könañamniri mewö möt kutume. Malmal kömbönañi mewö miwikñaime. ⁴ Nup al niñgiba ‘Meman,’ jiba jim kutum niñginöñi, nöñön mi tem köla memba mala meköyal. Aködamungabuk mala qetbuñagi gölmenöñ indel sehibiga aködamunñambuk ahök.

⁵ “O Iwi, nöñön gölme qahö asuhuiga Suep mire mianğöreñ göhö qöhöröñge asakmararañbuk asariba malal. Asakmararañ miyöhök mönö dölki kunbuk al niñginönga asuhum kutum niñgiiga kunbuk göhö qöhöröñge asakmararañbuk asariba mal-mam.” Mewö.

Jisösnöñ gwarekurupñi yeñgöra aka köuluköyök.

⁶ “O Iwini, göñön gölme ambazip tosatñi kewöta nöngö böröne al enjinöñi, nöñön göhö qetbuñagi mi yeñgöra indela kondela malal. Yeñön göhö buñaya aketka göñön i nöngö böröne al enjinönga yeñön göhö Buña keugi mi möt anğön köla malje. ⁷ Göñön

yuai ninginönga mi pakpak göhöreñök kamakzawi, yeñön mi nalö kewöñe lök möt kutuze. ⁸ Göñön keu Buña ninginöñi, nöñön mi gwarekurupni kusum engibiga möt aņgön köla malje. Ni gömosöta gölmenöñ erali, yeñön mi ölna möt yaköze. Göñön melaim ninginönga asuhuyali, yeñön mi mewöyök möt narize.

⁹ “Ni yeñgöra aka köuluköm gihizal. Urumelenğö kopa ambazip yeñgöra qahö köuluközalmö, könagesö nöñgö böröne al enğinönga uruñini melenđa göhö buñaya akzei, mönö yeñgöra aka köuluköm gihizal. ¹⁰ Ambazip pakpak nöñgö buña akzei, yeñön mönö göhö buñaya akze aka ambazip göhö buñaya akzei, yeñön mönö nöñgö buña mewöyök akze. Nani aködamuni al engibiga miangö qakñe kinda ahakmemenñini aketka nöñgö qetbuñanan qarim sehimakña. ¹¹ Ni gölmenöñ malmalni teköiga göhöreñ kotmamğö akzalmö, yeñön toroqeba gölmenöñ malme. O Iwi Töröñi, göñön qetki ninginönga miangö ösumñan mönö sel jöhöm enğinönga qahö julme. Netkön mohot aka maljiri, yeñön miangö dop mohot aka malmegöra köuluközal.

¹² * “Nöñön yembuk gölmenöñ mala korali, nalö miangöreñ qetbuñagi ninginönga miañön sel jöhöm engiba malal. Buña Kimbigö keu kunöñ ölnambuk akñapköra azi mohok-kunñan sohoba könöp siagö buñaya aka sihimbölö möta malma. Nöñön galöm köl enğialaņğöra yeñgöreñök tosatñan qahö janjuñ aka sohoget. ¹³ Tosatñan qahö sohogetmö, nöñön dölki gölmenöñ mala göhöreñ kamamğöra kaba keu ki jizal: Nöñgö uru sösöñgainan mönö yeñgöreñ

* **17:12:** Sum 41.9; Jon 13.18

kutui megetka uruᅇini kokolak qeiga söᅇgaiba malme. Mewö asuhumapköra köuluközal. ¹⁴Nöᅇön göhö Buᅇa keugi kusum eᅇgibiga möta malje. Nöᅇön gölmegö ahakmeme bölöᅇi mi qahö wuataᅇgömakzali, yeᅇön mönö mewöyök mi qahö wuataᅇgöba andö qemakze. Miāᅇgöra gölmenöᅇ uruᅇini qahö melenᅇet yeᅇön mönö kazik ak eᅇgimakze.

¹⁵ “Nöᅇön gölmenöhök eᅇguaᅇgitmāᅇgöra qahö qesim gihizalmö, Bölöᅇi Toᅇaᅇgöreᅇök aᅇᅇön köla sel jöhöm eᅇgiba malmāᅇgöra köuluközal. ¹⁶Nöᅇön gölmegö ahakmeme bölöᅇi andö qeba mi qahö wuataᅇgöbiga yeᅇön mewöyök mi andö qeba qahö wuataᅇgömakze. ¹⁷Keu ölnᅇi miāᅇön mönö mem sarahim eᅇgiba malman. Göhö Buᅇa keugan mönö keu öl töhöᅇᅇi akza. ¹⁸Göᅇön melaim niᅇᅇinöᅇga gölme ambazip sutᅇine anda nup memba malali, nöᅇön mewöᅇaᅇök i melaim eᅇgibiga gölme ambazip yeᅇgö sutᅇine deᅇda anme. ¹⁹O Iwini, yeᅇön keu ölnᅇaᅇgö dop malmalᅇini körek tököm gihimegöra aka bauköm eᅇgiba nani malmalni jömuk tököm gihizal.” Mewö.

Jisösnöᅇ mötnariᅇ ambazip pakpak neᅇgöra köuluköyök.

²⁰ “O Iwini, nöᅇön gwarekurupni yeᅇgörök aka qahö köuluközalmö, Buᅇa keu jim sehigetka ambazip möt narim niᅇᅇimeᅇi, mönö yeᅇgöra aka mewöyök köuluközal. ²¹Iwi göᅇön nömbuk qekötahöba kinöᅇga nöᅇön mewöyök göbuk qekötahöba kinjal. Miāᅇgö dop yeᅇön mewöyök netpuk qekötahöba kinmegöra mötzal. Nangak melaim niᅇᅇinöᅇga erali, gölme ambazipnöᅇ mi

möt narimegöra aka yeñön körek pakpak mohot aka malmegöra köuluközal. ²² Naniri mohot aka maljiri, yeñön mewöñanök mohot aka malmegöra aka aködamungi al niñginöñi, nöñön mi yeñgöra al eñgial.

²³ “Nöñön yembuk qekötahöba kinbiga göñön nömbuk qekötahöba kinjan. Miangö dop yeñön keuñini jöhöm teköba mohot aka malmegöra köuluközal. Mohot aka kingetka gölme ambazipnöñ könañamni kewö möt asarime: Göñön melaim niñginöñ etpiga jöpaköm niñgiba malnöñi, miangö dop i mewöyök jöpaköm eñgiba malnöñ.

²⁴ “O Iwini, göñön gölme qahö miwikñainöñi, qeljiñe nalö miangöreñ lök urugan jöpaköm niñgiba asakmararañ al niñginöñga mala koral. Könañgep alaurup niñginöñi, nöñön yeñön mewöyök asakmararañ mi ekñegöra mötzal. Miangöra nöñön miri malmami, yeñön miangöreñ nömbuk mohotñe malbingö sihimñi mötzal.

²⁵ “O Iwi solanni, gölme ambazip uruñini qahö melenjeri, yeñön gi qahö möt kutum gihiba mala kotketmö, nöñön gi ölöpñanök möt kutum gihizal. Nangak melaim niñginöñi, nöñgö urumelen alaurupnan mi lök möt yaköze. ²⁶ Nöñön göhö qetki mi jim tuarim eñgibiga möta malget. Göñön urugan jöpaköm niñgiba malnöñi, urukalem mianön uruñine ahöi mötketka nöñön yembuk qekötahöba kinbi malmegöra mönö toroqeba qetki jim tuarim eñgiba malmam.” Mewö.

Jisös memba jöhöget.

Mat 26.47-56; Mak 14.43-50; Luk 22.47-53

¹ Jisösnöñ keu mi jim teköba gwarekurupñi engömeiga siti mosöta geba o qetñi Kidron kutuba likepñe angota arö kun ahöyöhi, miangören anget.

² Jisös aka yangö gwarekurupñi yeñön qösösök miangören tokoba malget. Miangöra Judas mamalolo mem wangimangö ahöhi, yanñön mewöyök arö mi ölop mörök.

³ Jike nup galöm aka Farisi (Köna keugö kapañkölköl) yeñön jöwöwöl jikegö kiripo galöm (sikiriti) tosatñi melaim engigetka Judasnöñ i aka gawmangö yarö azi kambu kun engömeiga mohotñe kaget. Yeñön kiwa lambe aka timbi lingipñini memba bisiba arönöñ kaget. ⁴ Kagetka Jisösnöñ yuai pakpak mewö asuhum wangimawi, mi lök möröhangöra aka wahöta aukñe kaba kewö qesim engiyök, “Inini dagöra jaruze?”

⁵ Qesim engiiga kewö melenget, “Nini Jisös Nazaret toni mia jaruzin.” Melengetka kewö jiyök, “Mia nöñön.” Judas mamalolo meme azi yanñön mewöyök yembuk kinök.

⁶ “Mia nöñön,” Jisösnöñ keu mewö jiiga möta andöandö anda gölmenöñ tala eta enguyök. ⁷ Mewö aketka kunbuk qesim engiyök, “Inini mönö dagöra jaruze?” Qesim engiiga jiget, “Jisös Nazaret toni ia jaruzin.”

⁸ Jigetka melenök, “Mia nöñön, mi lök jibi mötze. Inini nia jarum ningize ewö, mönö azi ki ölop engömosötketka öne anme.” ⁹ Mutuk köuluköba gwarekurupñi yeñgöra keu kun kewö jii

mötket, “Ambazip nöngö böröne al enjinönga mal-
jei, nöjön mi köyan köl enjiba malbiga yengöreñök
kunöñ kun qahö sohoba ayuhuyök.” Keu mianön
ölñambuk akñapköra Jisösnöñ jitñememe yengöra
keu mewö jiyök.

¹⁰ Mewö jiiga Saimon Pitönöñ bimgö sou ketani
memba malöhi, yañön mi kupinneyök öröba jike
nup galöm bohonñangö welen aziñi qeba kezapñi
ölñe göröken köteköi erök. Welenqeçe azi mi qetñi
Malkus. ¹¹ *Mewö asuhuiga Jisösnöñ Pitö kewö
jim kutum wañgiyök, “Gi bimgö sou ketani mi
mönö kunbuk alnönga kupinñe geyök. Iwinan
sihimbölögö qambi o qölñambuk nöngö buñaya
qeyöhi, mi ölop möta mököstönda mesohol kölmam.”
Mewö.

Jisös wañgitketka Anasgö jeñe kinök.

¹² Suahö galömñinan jiiga yarö azi kambu
aka Juda yengö nanqu galöm (sikiriti) yenön
Jisös memba jöhöget. ¹³ Jöhöba wañgita mutuk
jike nup galöm qetñi Anas yañgö mire anget.
Anasgö qinñi qetñi Kaiafas yañön jike nup
galöm bohonñi aka yambu (yara) miangöreñ
nup mi memba malök. ¹⁴ *Kaiafasnöñ mutuk
Juda ambazip yengöra qambañ keu kewö jiyök,
“Ambazip kambu jömuk ayuhum teköbinbuköra
azi mohotñan neñgöra aka kömuiga dop kölma.”
Mewö.

Pitönöñ Jisös könahiba qañ kölök.

Mat 26.69-70; Mak 14.66-68; Luk 22.55-57

* **18:11:** Mat 26.39; Mak 14.36; Luk 22.42 * **18:14:** Jon 11.49-50

15 Jisös memba angetka Saimon Pitö aka gwarek alaŋi kun yetkôn andöŋine anohot. Anohotka alaŋi mianjôn jike nup galöm bohonŋi möt waŋgiyöhaŋgöra aka ölop amqeba Jisös wuatangöba jakömbuak miri sel uruŋe geyök.

16 Yaŋön geyökmö, Pitönöŋ sel yaigepŋe nanŋunöŋ kinök. Mewö kiniga gwarek alaŋan jike nup galöm bohonŋi möt waŋgiyöhi, yaŋön yaigepŋe geba nanŋu galöm ambi yambuk keu jii möta nanŋu öröiga Pitö waŋgita sel uruŋe geyohot.

17 Gebitkö ahoŋi, miangöreŋ welenqeŋe ambi sel nanŋuŋi galöm kölöhi, yaŋön Pitö eka kewö qesim waŋgiyök, “Gi ölna mewöyök azi miangö gwarek yeŋgöreŋök kun akzan me?” Mewö qesim waŋgii möta “Ni qahö!” jiyök.

18 Welen azi aka nanŋu galöm (sikiriti) yeŋön amötŋangöra aka könöp jeba ururuŋgöba ahöiga jömöta kinget. Mewö kingetka Pitönöŋ mewöyök yeŋgö sutŋine anda könöp jömöta kinök. Mewö.

*Jike nup galöm bohonŋan Jisös qeŋesi al waŋgiyök.
Mat 26.59-66; Mak 14.55-64; Luk 22.66-71*

19 Jike nup galöm bohonŋi Anas yaŋön Jisösgö qeŋesi al waŋgiba kewö jiyök, “Gi ambazip denöwö kusum eŋgiba gwarekurupki niŋi niŋi eŋgömemba maljan?”

20 Mewö jiiga kewö melenŋ waŋgiyök, “Ni nalö dop aukŋe ambazipŋi ambazipŋi kusum eŋgiba malal. Juda könagesö pakpak neŋön jöwöwöl jikenöŋ öngöba köuluk mirininangö dop tokomakzini, ni mönö miangöreŋ kinda kusum eŋgiba malal. Buŋa keu tölapŋi kun qahö jial.

21 Nöŋön keu denöwö ambazip kusum eŋgiba

malali, wuanöngöra ni mewö qesim ningizan? Nöñön keu jibiga ambazip möta malgeri, yeñön mönö keunañgö kötni möt teköze. Miangöra i qesim enñinönga dop kölma.”

²² Mewö melen wañgiyökmö, jikegö kiripo galöm (sikiriti) kunöñ kösutñe kinda Jisös nuñgulumñe qekötahöba jiyök, “Jike nup galöm bohonñan qesim gihiiga gi keu silik mewöñi mönö wuanöngöra melen wañgizan? Gödaqegegi qahö.”

²³ Mewö jiiga kewö melen wañgiyök, “Keu bölöña jibileñak, mi mönö indelnönga dop kölmamö, keu ölni jizal ewö, mönö wuanöngöra ni öne nuñguzan?”

²⁴ Mewö melen wañgiiga Anasnöñ Jisös melaiba jiiga tapepñi (muñgamuñga) tok böröñe tariga wañgita jike nup galöm bohonñi Kaiafas yangören anget. Mewö.

Pitönöñ Jisös qañ köliga yahöt karöbut ahök.

Mat 26.71-75; Mak 14.69-72; Luk 22.58-62

²⁵ Saimon Pitönöñ könöp jömöta kiniga tosatñan qesiba kewö jiget, “Gi ölna mewöyök yangö gwarekurupñi yeñgörenök kun akzan me qahö?” Mewö jigetka qañ köla “Ni qahö,” jiyök.

²⁶ Pitönöñ jike nup galöm bohonñangö welen aziñi qeba kezapñi qeköi eröhi, yangö tinitosolomñi welenqege alañi kunöñ mi möta qesiba jiyök, “O gi mönö arönöñ yambuk mohokñe malohotka gekzal me denöwö?”

²⁷ Mewö jiiga Pitönöñ kunbuk qañ köliga nalö miangörenök kuruknöñ könahiba qeriga mörök. Mewö.

Jisösnöŋ premiö Pailötkö jeŋe kinök.

Mat 27.1-2, 11-14; Mak 15.1-5; Luk 23.1-5

²⁸ Miri gianjiiga söŋanök Jisös Kaiiafasgö mir-inöhök waŋgita eta Rom premiögö jakömbuak mire anget. Juda yeŋön uruŋini tölöhoba kölköljinjinjŋ akinbuköra waimanjat möta kewö jiget,* “Ak-kömukömu kendongö lama nembangö osibinbuk.” Mewö jiba möt lömböriba premiögö jakömbuak miri uruŋe qahö öngöget. ²⁹ Miangöra premiö Pailötnöŋ yaigep eta engeka kewö qesim engiyök, “Azi kianön mönö wani pinjit aiga keu jim waŋgiba waŋgita kaze?”

³⁰ Qesim engiiga melenget, “Azi mianön kegwek me bölöŋi meme azi kun qahö akawak ewö, neŋön mönö öne töhöŋ i waŋgita göhö böröge qahö albinak.”

³¹ Mewö melengetka Pailötnöŋ jii mötket, “Injini mönö nanŋinak keu jakeŋine al waŋgiba Köna keuŋinaŋgö dop kewöta keuŋi jim teköme.” Mewö jii möta jiget, “Neŋön azi kun kömumapkö keuŋi jim teköbingö soŋgo ahöi osizin.” ³²*Juda yeŋön mewö jigetka Jisös nanŋak kömup denöwöŋi kömumawi, keu mi indela jiiga mewö mianön ölnambuk ahök.

³³ Pailötnöŋ Juda yeŋgö keuŋini möta kunbuk jakömbuak miri uruŋe öngöba Jisös oholi kaiga kewö qesim waŋgiyök, “Gi Juda enögöreŋ kinj kembuŋina akzan me qahö?”

* **18:28:** Rom gawman yeŋgöra Juda yeŋön kewö möt nariget: Nini Rom yeŋgö jakömbuak mire öngöinga urunini tölöhoi ösumnini eri kölköljinjinjinambuk aka ak-kömukömu kendongö lama töröŋi nembangö osibin. Miangöra sombemnöŋ yaigep malget. * **18:32:** Jon 3.14; 12.32

³⁴ Mewö qesim wanğiiga melenđa kewö qesiyök, “Keu mi mönö nangi urugeyök jizan me tosatjan nönğöra keu mewö jiba jitke algetka jizan?”

³⁵ Mewö qesiiga Pailötnöŋ melennök, “Yei! Ni mönö Juda azia aka Juda enğö keuŋini nanğömakzal me? Qahöpmahöp! Ni Rom premiö malbiga nangi ambazip kambu-urupki aka jike nup galöm yeŋön mönö goanğita nönğö böröne al gihize. Göŋön mönö wanat yuai aknöŋ?”

³⁶ Mewö melenniga jiyök, “Nönğö kiŋtohoŋni mianğö könaŋi mi gölme kianğöreŋ qahö ahöza. Nönğön gölmegö kiŋtohoŋ kungö kiŋ kembuya akilenak ewö, nönğö sunğurumurupnan mönö ölop wahöta nönğöra aka suahö akeak. Suahö aka nönğön Juda jitŋememe yeŋö böröŋine gebilenbuköra kapaŋ köla bim qegetka nömembangö osibeak. Mi osibeakmö, nönğö kiŋ tohoŋnanğö könaŋi mi miri kungen ahöza. Ni gölme azi kembuya qahö akzal.”

³⁷ Keu mi jiiga Jisös kewö qesim wanğiyök, “Gi tönđup kiŋ kembu qainŋi kun akzani, mi ölna me qahö?” Mewö qesim wanğii melennök, “Ni kiŋ kembu qainŋi kun akzali, mi nangak jizan. Nönğön keu ölni nanğöba jim tuarimamğöra aka gölmenöŋ eta asuhuyal. Körek yeŋön keu ölnanğö likepŋe maljei, yeŋön mönö nönğö keuni kezap ala mörakze.”

Jisös kömumapkö jim teköget.

Mat 27.15-31; Mak 15.6-20; Luk 23.13-25

³⁸ Mewö melenniga Pailötnöŋ mepaqepaik aka qesiyök, “Keu ölni mi mönö wania kun?” Mewö qesiba kunbuk Juda yeŋgöreŋ geba söndaknöŋ

kinda kewö jii mötket, “Nöñön azi miangö pinjitñi jaruba kun qahö miwikñaizal.” ³⁹ “Kun qahö miwikñaizalmö, ahakmemeni kun kewö ahöi mötze: Yambu (yara) dop ak-kömukömu kendon nalöñe kösö mireyök azi mohot engöra pösatpi erakza, mi mötze. Miangöra Juda engö kiñ kembuñini ölop engöra pösatpi etpawak me qahö? Miangöra inini sihimñinan denöwö mötze?”

⁴⁰ Mewö jii möta melenđa kewö qetket, “Qahö, i qahöpmö, Barabas pösatnöñga neñgören etma!” Mewö qetketmö, Barabas yanñon kegwek azia aka bim karim kun megeri, miangö bohonñi ahök. Mewö.

19

Pailötnöñ Jisös maripomnöñ kömumapkö jim teköyök.

¹ Silata qetketka Pailötnöñ Jisös wañgita anda jiiga yarö azi yeñon ihilek wahinambuknöñ tauköba qeget. ² Yarö azi yeñon tauköba mepaqepaik kewö ak wañgiget: Yeñon Jisös qeba kösö wahinambuk memba köpeiba ila möhamgöba nöropñe kölget geiga maluku pisikñi gugakgugakñambuk mi köl wañgigetka geyök. ³ Mewö aka kösutñe arengöba kinda jiget, “Owe owe! Juda engö Kiñ Kembuñini, owe!” Mewö jiba nuñgulumñe gwötpuk qekötahöget.

⁴ Mewö mepaqepaik ak wañgigetka Pailötnöñ kunbuk yaigepñe geba kewö jii mötket, “Mötket! Nöñön azi mi kewöta pinjitñi kun qahö miwikñaizal. Miangöra i kunbuk wañgitpiga engö jeñine eriga könañi mewö möt kutuba ekñe.”

⁵ Mewö jii mötketka Jisösnöñ eta söndakñe kini

kewö eket: Tosatjan kösö wahibuknöñ ila köpeiba nöropñe köla maluku pisikñi gugakgugakpuk köl wañgetka kiniga Pailötnöñ jii kewö mötket, “Azi ölni ki eket!”

⁶ Mewö jii mötketka jike nup galöm aka nanğu galöm (sikiriti) yeñön i eka keu wölwölbuk qeta jiget, “Maripomnöñ qeget kömuma. Maripomnöñ qeget kömuma.” Mewö jigetka Pailötnöñ jitñine memba kewö jii mötket, “Nöñön pinjitñi kun qahö miwikñaizal. Mianğöra inini mönö nanñinök i memba maripomnöñ qeget kömumbawak.”

⁷ Juda jitñememe yeñön keu mi möta kapañ köla kewö jiget, “Neñğöreñ Köna keu ahöza. Keu mianğö dop kewöringa kömumawañğö dop akza. Nanñi memba öñğöba ‘Anutugö nahönñi akzal,’ jimakza. Mianğöra mönö kömupkö buñaya aiga dop kölma.”

⁸ Mewö kapañ köla jigetka Pailötnöñ möta böññi wahöriğa jönömñi undui keñğötñi mörök. ⁹ Mewö möta Jisös wañgita kunbuk jakömbuak miri uruñe öñğöba kewö qesim wañgiyök, “Gi denikeğöra?” Qesim wañgiyökmö, yañön kitipñi kun qahö melenđa keu bök kinök. ¹⁰ Keu bök kiniga kewö jii mörök, “Gi nöñğöra keu kitipñi kun melenman me qahö? Nöñön jim teköbiga pösat gihime me maripomnöñ guhugetka kömuman. Mianğö kukösumñi mi nöñğöreñ ahöza. Mianğö könanji mötzan me qahö?”

¹¹ Mewö jii möta kewö melen wañgiyök, “Kunöñ euyañğöreñök kukösum qahö al gihiyök ewö, gi mönö azi omanji mala yuai ak niñgimangö osibanak. Mianğöra azi kun dañön ni göhö böröge

al niŋgizawi, yaŋgö siŋgisöndokŋan mönö göhören pinjit onŋgita ketanji akza.”

¹² Mewö melenj waŋgiyöhaŋgöra aka Pailötnöŋ Jisös pösari etmapkö kapanj kölök. Mewö kapanj kölökmö, Juda yeŋön qet gigilahöba kewö jiget, “Pösatnöŋga etma ewö, mönö sisa kiŋgö alaŋi qahö toroqeba aka malman. Kunöŋ nanŋaŋgö möri öŋgöiga ‘Kiŋ kembuya akzal’ jizawi, yaŋön mönö sisa kiŋ tuarenjonj ak waŋgiza.”

¹³ Mewö jigetka keu mi möta jim kutuiga Jisös waŋgita yaigep etket. Etketka premiö Pailötnöŋ jake kun kötnöŋ ala tömbulget ahöyöhi, miangörenj öŋgöba keu jimtekötekögö dum tatatŋe eta tarök. Jake miangö qetŋi Hibru keunöŋ Gabata jimalget. Mi nanine keunöŋ Jake Kötnöŋ mem tömbultömbulŋi. ¹⁴ Eta taröhi, Juda ambazipnöŋ wehön miangörenj ak-kömukömu kendon tatpingöra jöjöröget. Wehön mi aiga silim bibiŋi dopdowiiga Pailötnöŋ dum tatatŋe tata Juda yeŋgöra kewö jii mötket, “Eket, eŋgö kiŋ kembuŋini ki!”

¹⁵ Mewö jii möta qet gigilahöget, “Yapmakek! Yapmakek! Maripomnöŋ qeget kömuma!” Qet gigilahögetka kewö jiyök, “Eŋgö kiŋ kembuŋinaŋgö keuŋi jim teköbiga maripomnöŋ öŋgömapköra jize me?” Mewö juiga jike nup galöm yeŋön melenja jiget, “Sisa kiŋnöŋ mohok kiŋ kembunina akza. Neŋgörenj kiŋ kembu murutŋi kun qahö ahöza!”

¹⁶ Mewö melenja jigetka Pailötnöŋ Jisösgö keuŋi jim teköba maripomnöŋ qeget kömumapköra böröŋine alök. Böröŋine aliga yarö azi yeŋön Jisös memba galöm kölget.

Jisös maripomnöḡ qeget.

Mat 27.32-44; Mak 15.21-32; Luk 23.26-43

¹⁷ Galöm kölgetka nannḡ maripomnḡ nannḡak aḡguba siti kutuba yaigep geba gölme kun qetḡ Nöröpsihit qerakzema, mianḡöreḡ anget. Nöröpsihit qet mi Hibru keunöḡ Golgota qerakze. ¹⁸ Mianḡöreḡ anda maripomnöḡ qeget aka yambuk azi yahöt likeplikep mohotḡe etkuba Jisös sutḡire algetka kinget.

¹⁹ Mewö qegetka Pailötnöḡ kulem ohoba ji-iga maripomnöḡ Jisösgö nöröpḡe göröken eu ala qeget. Kulem mi kewö ohoi kinök, “Jisös Nazaret tonḡ, Juda yeḡgö kiḡ kembuḡina ki.” ²⁰ Jisös maripomnöḡ qegeri, gölme mi siti kösutḡe ahöyök aka kulem mi keu karöbut, Hibru, Latin aka Grik keu mianḡön ohoget kinök. Mianḡöra Juda ambazip gwötpukḡan oḡgita anda kaba eu uba kulem mi oyonget. ²¹ Mewö ohoiga Juda yeḡgö jike nup galöm yeḡön Pailöt kewö jiget mörök, “ ‘Juda yeḡgö kiḡ kembuḡina ki,’ mewö kude ohomanmö, kewö ohoman, ‘Nannḡaḡöra Juda kiḡ kembunina akzal, jiyök.’ ”

²² Mi möta Pailötnöḡ keu kewö melenḡök, “Keu lök ohozalḡöra mi mönö mewö ahöma.”

²³ Yarö azi yeḡön Jisös maripomnöḡ qebagun opo silepöke öröyuainḡ memba azi 4 sutḡine mendenḡa 4 aiga totonḡine meget. Mewö megetka malukuḡi ahöi megetmö, mi kewögöra ölop qahö mendenḡet: Mi körekḡanök opo jöhannḡi mohotḡan memeḡa. Opo kitipḡi kitipḡi qahö mindiriba euyök liliklilik uhum megetka emu gegenḡi ahöyök. Mianḡöra mi bölibapuköra mendenḡbingö osiget.

24 *Osiba eraum möta kewö jiget, “Mi mitiinga qahö dop kölma. Mianğöra ölop mianğö unji qeinga tonji ahuma.” Mewö jiba unji qegetka Buña keu kun öljambuk ahök. Keu mi kewö ohoget ahöza,

“Yenön opo silepökeni memba sutņine mendenđa totonine memba malukunangö unji mönahot algetka kunöñ luhut alma.”

Yarö azi yenön keu mianğö dop aket.

25 Jisös maripomnöñ qeget kiniga ambi kewöñan könañe kinget: Jisösgö nam nasöñi aka Klopas anömñi qetņi Maria aka Magdalagö ambi qetņi Maria. 26 Jisösnöñ namñi aka wölböt gwarekñi kösutņe kinohotka etkeka namñangöra kewö jiyök, “Namni, mönö nahöngi ki eka tönjonğöba malman.”

27 Mewö jiba gwarek mi kewö jii mörök, “Mönö namgi ki eka tönjonğöba malman.” Mewö jii möta Jisösgö namñi nalö mianğöreñök wañgiriga miriñe anda mohotņe malohot. Mewö.

Jisösnöñ maripomnöñ kinda kömuyök.

Mat 27.45-56; Mak 15.33-41; Luk 23.44-49

28 *Jisösnöñ nupņi pakpak mem teköyöhi, mi möta mianğöreñ Buña Kimbigö keu kunöñ öljambuk akñapköra kewö jiyök, “Ni ogöra ak niñgiza.”

29 Mianğöreñ qem nene kun wain o asöljambuk mianjön kokolak qeba tarök. Mi tariga köwet mömöndö kun kahali tandök mi memba wain onöñ kundumgöba soñgorep suñe qesamböta meget öñgöiga numbuñe alget. 30 Algetka wain

* 19:24: Sum 22.18 * 19:28: Sum 69.21; 22.15

o asölnambuk mi nemba jiyök, “Mönö teköza.” Mewö jiba malmalñi mosötmanğöra nöröpñi wambelahöi eri imutñi koriga nöñ qeyök. Mewö.

Jisösgö marömñi liñgipnöñ utohoget.

³¹ Jisösnöñ nöñ qeiga Juda ambazipnöñ silim mianğoreñ ak-kömükömu kendon tatpingöra jöjöröget. Ak-kömükömu Sabat kendon mi kendon nalö ketañi ahök. Mianğöra Juda jitnememe yeñön waimanjat möta kewö jiget, “Qamöt mienön Sabat kendon nalöñe maripomnöñ kingetka qahö dop kölja.” Mewö jiba premiö Pailötköreñ anda kewö qesim wañgiget, “Gi ölop jinönga anda maripomnöñ engugeri, yeñgö töwat sihitñini kusuetka qamötñini meköin etme?” ³² Qesim wañgigetka jim teköiga yarö azinöñ kañgotket. Kañgota Jisösbuk maripomnöñ etkugeri, mi zilañ kömumahotköra mutuk yetköreñök kungö töwat sihitñi kusuba likep anda kungöreñ mewöñanök aket.

³³ Mewö aketmö, Jisösgöreñ kañgota eketka lök kömuyök. Mewö eka sihitñi qahö kusuet. ³⁴ Qahö kusuetmö, yarö azi yeñgöreñök kunñan liñgip memba marömñi umburatiiga mianğöreñök sep aka o erök.

³⁵ Mewö aketka kunöñ yuai mi jeñan ehöhi, yañön mi nañgöba jiba ki ohoi ahöi döлки oyonje. Keu nañgöba jiba ohoi ahözawi, mi mönö keu ölna akza. Inini mewöyök mi möt narimeğöra möta keu ölna jizawañgö dop mötza. ³⁶ *Yuai mi asuhuyöhi, mi Buña Kimbigö keu kunöñ ölnambuk akñapköra asuhuyök. Keu mi kewö,

* **19:36:** Eks 12.46; Jan 9.12; Sum 34.20

“Yaŋgö sihitŋi mönö kude kusume.”

³⁷ *Aka Buŋa Kimbigö keu kun kewö ahöza,
 “Azi utohogeri, yeŋön mönö yaŋgöreŋ göröken
 jeŋini uba ekŋe.”

Iŋini keu yahöt mianğöra aka mi möt narime.
 Mewö.

Jisösgö qamötŋi köt köteŋnöŋ löm kölget.

Mat 27.57-61; Mak 15.42-47; Luk 23.50-56

³⁸ Mianğö andöŋe Arimatia taon toŋi qetŋi
 Josef kayök. Yaŋön Jisösgö gwarekŋi aka
 malökmö, Juda jitŋememe yeŋgöra keŋgötŋi möta
 mötnariŋi köyatiba malök. Yaŋön kaba premiö
 Pailötköreŋ anda Jisösgö qamötŋi mekömamgö
 qesim waŋgiyök. Qesim waŋgiiga möta jim teköiga
 kaba meköyök.

³⁹ *Azi qetŋi Nikodemus mutuk Jisösgöreŋ
 suŋgem kayöhi, yaŋön mewöyök kayök. Kaba
 qamöt mirimamgöra kelök köhöwakŋambuk qetŋi
 mör mi repa oŋambuk melengeri, mi esu mohot
 lömbötŋi 30 kilogö dop bohonŋi memba kaba Josef
 bauköm waŋgiyök. ⁴⁰ Bauköm waŋgiba mohotŋe
 Jisösgö qamötŋi meköyohot. Meköba jiniŋ wöronŋi
 ölöŋi memba qamöt sileŋe ala opo tuatŋi mianğön
 köpeiyohot. Juda ambazip neŋön qamötnini mewö
 aka mözözömgöba löm köl eŋgizinma.

⁴¹ Jisös maripomnöŋ qegeri, gölme mianğö
 likepŋe arö kun ahöyök. Arö mianğöreŋ qaksirigö
 köt köteŋ löm dölöŋi kun urorohoget kinök.
 Mianğöreŋ qamöt kun qahö algetka gwamönŋi
 ahöyök. ⁴² Gwamönŋi aka kösutŋe ahöiga Juda
 ambazipnöŋ ak-kömükömu kendon tatpingöra

* **19:37:** Zek 12.10; Ind 1.7 * **19:39:** Jon 3.1-2

jöjörögetka nalöñini töriyök. Mianğöra Jisösgö qamötñi memba mianğöreñ ala löm kölohot. Mewö.

20

Jisösgö löm qaksirinjan gwamönñi ahök.

Mat 28.1-8; Mak 16.1-8; Luk 24.1-12

¹ Sabat kendon tatket teköiga Magdalagö Maria yañön Sonda söñanök wañgarañ suruiga qaksirinöñ anök. Anda je ui ani köt ketañi ehiga mi-añön lök köteñ urorohoñi mianğö numbuñeyök qetalget kaba ahöyök. ² Mewö eka mianğöreñök mosöta ösumok anda Saimon Pitö aka Jisösgö wölböt gwarekñi yetköreñ kaba kewö jii mörohot, “Mönö Kembugö qamötñi qaksirinöhök memba anda denike alget ahözawi, mi qahö mötzin.”

³ Mewö jii möta mosöta qaksirinöñ anohot. ⁴ Mohotñe ösumok anohotmö, gwarek alañan ösumñan anda Pitö oñgita mutuk qaksirinöñ añgorök. ⁵ Añgota köt köteñ urorohoñi mianğö uruñe qahö öñgöba numbuñe öne kököriba ui aniga oponi köpeköpeñanök ahöiga ehök. ⁶ Mi ehiga Saimon Pitönöñ mewöyök andöñe kañgota köt köteñ uruñe öñgöba oponi köpeköpeñanök ahöi ehök. ⁷ Mi ehök aka nöropñi opo jahönñi kunöñ köpeiba esuhugeri, mi tosatñan kusuba silegö oponi miambuk qahö mindiriba kungen algetka nanñök tariga ehök.

⁸ Mewö ehiga gwarek alañan mutuk qaksirinöñ kañgoröhi, yañön mewöyök köt köteñ uruñe öñgöba yuai mi eka möt nariyök. ⁹ Jisös guliba kömupnöñök wahötmawi, yetköñ Buña Kimbigö keu

mewöŋi mi qeljiŋe qahö möt asariba tönpin mala korohot. Mewö.

*Jisösnöŋ Magdalagö ambi Mariagöreŋ asuhuyök.
Mat 28.9-10; Mak 16.9-11*

¹⁰ Mala kota miangöreŋök möt nariba lilingöba miriŋire anohot. ¹¹ Yetköŋ anohotmö, Mari-anöŋ nanŋök qaksirigö köt köteŋ numbuŋe kinda sahörök. Mewö sahöta köteŋ urorohoŋi miangö uruŋe kököriba ui anök. ¹² Ui aniga Suep garata yahöt malukuŋiri tuat lalamŋi etkehök. Jisösgö qamötŋan ahöyöhi, yetköŋ mönö miangöreŋ tarohot. Kunöŋ nöropŋi ahöyohaŋgöreŋ tariga kunöŋ könaŋe tarök.

¹³ Mewö tata kewö jiyohot mörök, “Ambi, gi mönö wuanöŋgöra sahötzan?” Mi möta jiyök, “Kembunangö qamötŋi memba anda denike alget ahözawi, mi qahö mötzal.”

¹⁴ Mewö jiba lilingöba Jisösnöŋ kösutŋe kiniga ehökmö, kaisoŋgolomŋi mi qahö ek kutuba tönpin kinök. ¹⁵ Tönpin kiniga Jisösnöŋ kewö qesim waŋgiyök, “Ambi, gi mönö wuanöŋgöra sahötzan? Dagöra jaruzan?” Mewö qesim waŋgiiga arö galömŋan kinja me denöwö, mewö mötmöriba kewö jiyök, “O ketaŋamni, gi qamötŋi memba aŋguba kungen anda alnöŋ ewö, mönö denike ahöza, mi jinöŋga möta anda memam.”

¹⁶ Mewö jiiga Jisösnöŋ qetŋi qeta “Maria!” jiyök. Mi qeta jiiga yangöreŋ lilingöba Hibru keunöŋ qeta “Raboni!” jiyök. Mi nanine keunöŋ “Ketaŋamni.”

¹⁷ Mewö jiiga kewö jii mörök, “Ni Iwinangöreŋ qahö öŋgöba ki kinjal. Miangöra ni kude nömisirimanmö, nöŋgö munurupni yengöreŋ

anda buzup kewö jinöŋ mötme: Nöŋön mönö Iwi Anutuni aka enjö Iwi Anutuŋini yangören lilingöba öngömam.”

¹⁸ Mewö jii möta Magdalagö ambi Maria yaŋön lilingöba anda gwarekurupŋi kewö jii mötket, “Nöŋön Kembu ekiga keu mewö mewö jii mötzal.” Mewö.

Jisösnöŋ gwarekurupŋi asuhum enjyök.

Mat 28.16-20; Mak 16.14-18; Luk 24.36-49

¹⁹ Sonda mianjörenök miri söŋauiga gwarek yeŋön ömbibiŋe tokoba Juda yeŋöra kenjöŋini möta miri nanŋuŋi köla ki namŋi misiget geiga tatket. Mewö tatketka Jisösnöŋ asuhuba sutŋine kinda kewö jiyök, “Alaurupni, luainöŋ embuk ahöma!” ²⁰ Mewö jiba böröyahöŋi aka marömŋi kondeliga Kembu eketka söŋöŋainöŋ uruŋini kokolak qeyök. ²¹ Kokolak qeiga toroqeba kewö jiyök, “Alaurupni, luainöŋ embuk ahöma! Iwinöŋ ni melaim niŋgiiga nöŋön iŋini mewöŋanök melaim enjizal.”

²² Mewö jiba nöropŋine memba ösum enjiba uwulamgöba jiyök, “Mönö Uŋa Töröŋi meget.

²³ *Iŋini ambazip siŋgisöndokŋini mosöta saŋonje ewö, mi mönö Anutugö jeŋe solanim teköza. Ambazip siŋgisöndokŋini qahö mosöta saŋonje ewö, mi mönö Anutugö jeŋe qahö solaniza.” Mewö.

Jisösnöŋ Tomas asuhum waŋjyök.

²⁴ Jisösnöŋ gwarekurupŋi mewö asuhum enjyökmö, gwarek 12 yeŋörenök kun qetŋi Tomas, qetŋi alaŋi Siwisiwi qetkeri, yaŋön nalö

* **20:23:** Mat 16.19; 18.18

mianğöreŋ sutŋine qahö malök. ²⁵ Tomasnön kaiga gwarek tosatŋan “Mönö Kembu ekzin,” jiget möta kewö jiyök, “Jenan birin löpötŋi böröŋe eka kesötŋan marömŋe misirimam ewö, mönö ölop möt narimam. Ni nanak mi qahö eka misiriba oseimam ewö, mönö keuyök jiget möta ölna mi qahö möt narimam.”

²⁶ Mewö jiiga sonda mohot teköiga gwarek yeŋön Sonda mianğöreŋ kunbuk mire qezaköba nanğu köla ki memba Tomasbuk mohotŋe tatket. Mohotŋe tatketka Jisösnön kunbuk asuhaba sutŋine kinda kewö jiyök, “Alaurupni, luainön embuk ahöma!” ²⁷ Mewö jiba Tomasğöra jiyök, “Gi mönö börögi böröŋda böröyahötŋi eka kesötŋan marömne misiriman. Mewö aka yaŋgiseŋ mosöta uruyahötŋi yaköriba ni möt narim niŋgiman.”

²⁸ Mewö jiiga kewö melenök, “O, gi nöŋgö Kembu Anutuna!”

²⁹ Mewö melenniga kewö jii mörök, “Gi nekzanangöra ni ölop möt narim niŋgizanmö, ambazip qahö neka töndup ni möt narim niŋgimakzei, yeŋön mönö simbawoŋ akze.” Mewö.

Jonöŋ Ölöwak Buŋa ki kewögöra ohoyök:

³⁰ Jisösnön nup ösum-mumu qakŋe memba maliga aŋgöletot sehisehiŋi tosatŋi mi gwarek yeŋgö jeŋini qakŋe asuhugetmö, mi buk kianğöreŋ qahö ohoyal. ³¹ Keu tosatŋi ohoyali, mi kewögöra ohoyal: Jisösnön Anutugö Nahönŋi aka Amötqeŋe Toŋi Kraist akzawi, iŋini keu mi möt nariba mewö mianön Jisösgö qetbuŋaŋangöra aka malmal köhöikŋi buŋa qem aŋgume. Mewö aka malmegöra

nöñön Ölöwak Buja papia ki ohobiga engören kaza.
Mewö.

21

Jisösnöñ gwarek 7 yengören asuhuiga söra jök öröget.

¹ Könañgep Jisösnöñ kunbuk gwarek tosatñi yengören asuhuyök. Taiberias o angö jitñe mianğören kewö asuhum engiyök: ² Gwarek azi kewöñan mohotñe malget: Saimon Pitö, Tomas qetñi kun Siwisiwi qetkeri, Natanael azi mi Galili prowinsgö Kana taonöhök aka Zebedigö nahönyahötñi yahöt aka gwarek tosatñi yengörenök yahöt.

³*Mohotñe malgetka Saimon Pitönöñ jii mötket, “Ni mönö söra örömamğöra anmam.” Mewö jiiga tosatñan jiget, “Nini ölop göbuk mohokñe anbin.” Mewö jiba mosöta wañgenöñ öngöba anda sunğem mianğören söra kun qahö öröget. ⁴Söra qahö öröba öne malgetka miri lök gianjiiga Jisösnöñ saknöñ kinök. Kinökmö, yangö kaisongolomñi mi qahö ek kutuget. ⁵Jisösnöñ kinda engohola jiyök, “Alaurupni, söra kun öröze me qahö?” Jiiga melenđa “Qahö!” jiget.

⁶*“Qahö!” jigetka kewö jim kutum engiyök, “Inini mönö mösakñini wañge ölñe göröken gilgetka eri ölop söra miwikñaime.” Mi möta mösakñini gilgetka söra sehisehñi geba ölökögerağöra öröget kotmapkö osiiga öröm suksuköget.

* 21:3: Luk 5.5 * 21:6: Luk 5.6

⁷ Mewö aiga Jisösgö wölböt gwarekñi mianjön Saimon Pitö kewö jii mörök, “Mi mönö Kembuya!” Mewö jiiga Kembugö qetñi möta opo bindoñanök jöhöba malöhangöra silepökeñi köpeiba mianjörenejök o anjönöñ luhuba geyök. ⁸ Yeñön sak qöhöröñe 100 mita mianjö dop kösutñe anda malget. Mianjöra Pitönöñ geba ani gwarek tosatñi yeñön wañge lökuatnöñ qem nañgöba anda mösak sörañambuk örögetka wañge andöñe kayök.

⁹ Mewö kaba sak körikñe öngöba mianjörenej yuai kewö eket: Könöp jeiga gapnöñ söra jejeñi aka beret soñsoñ ahöyök. ¹⁰ Mi eketka Jisösnöñ kewö jii mötket, “Injini döлки söra örözei, mönö mianjörenejök tosatñi memba ki kaget.”

¹¹ Mi jiiga Saimon Pitönöñ möta wañgenöñ öngöba mösak öröiga körikñe öngöyök. Öngöiga ölni 153 eket. Mösak mi söra ketañi sehisehñi mienjön kokolak qegetmö, mösaknöñ töndup qahö tiñgirök. ¹² Ölni mi eketka Jisösnöñ kewö jii mötket, “Mönö kaba söñangö neneñi neget!” Mewö jii möta kaba “Mi Kembunina,” mewö möt kutugetmö, gwarek yeñjörenejök kunñan “Gi danjön?” mewö qesimangö urulömböt aka qahö qesiyök. ¹³ Qahö qesiyökmö, Jisösnöñ anda beret memba enjgiba söra mewöyök mendenja enjgiyök.

¹⁴ Jisösnöñ kömupnöñök wahöta gwarekurupñi asuhum enjgiyöhanjgö indimñi karöbut mi ahök. Mewö.

Jisösnöñ Pitö kunbuk kunjguba mem köhöiyök.

¹⁵ Söñangö neneñi neget teköiga Jisösnöñ Saimon Pitögöra kewö jii mörök, “Saimon Jongö nahönñi! Alaurupki kienjön ni uruñinan jöpaköm niñjimakzei,

gi mönö i enḡonḡita gwötpuk jöpaköm niḡgimakzan me qahö?” Mi möta kewö melenök, “O Kembu, ni göhöra ak niḡgimakza. Gi wölböt alani akzan. Mi nangak ölop mötzan.” Mewö melenḡiga Jisösnöḡ jii mörök, “Gi mönö nöḡgö lamaurupni moröḡi gumohom enḡiba malman.”

16 Mewö jii möri indimḡi yahöt qesim waḡgiyök, “Saimon Jongö nahönḡi! Gi ölna jöpaköm niḡgimakzan me qahö?” Mi möta kewö melenök, “O Kembu, ni göhöra ak niḡgimakza. Gi wölböt alani akzan. Mi nangak ölop mötzan.” Mewö melenḡiga Jisösnöḡ jii mörök, “Gi mönö nöḡgö lamaurupni galöm köl enḡiba malman.”

17 Mewö jii möri indimḡi karöbutḡi qesim waḡgiyök, “Saimon Jongö nahönḡi! Gi mönö ölna wölbötkan (jojopaḡgan) nöḡgö ak gihimakza me qahö?” Mewö qesim waḡgiiga urujöjöpakö qeḡesḡi mohot miyök qesiiga indimḡi karöbut ahöhaḡgöra Pitönöḡ wösöbirik möta melenḡa kewö jiyök, “O Kembu, gi yuai pakpak ölop möt teközan. Gi wölböt alani akzan. Göḡön mönö nangak mi ölopḡanök mötzan.” Mewö jiiga Jisösnöḡ jii mörök, “Gi mönö nöḡgö lamaurupni gumohom enḡiba malman.

18 “Nöḡön keu öl töhöḡḡi kun kewö jibi mötnöḡ: Gi seḡgulia mala nangak sileötaḡi jöhöba köna igen me waigen ‘anmam,’ jiba ak gihiyöhaḡgö dop ölop anda kaba malnöḡ. Mewö mala malnöḡmö, azi namḡi akḡani, nalö miangöreḡ böröḡi böräḡnöḡga kunḡan kaba opo silepökeḡi jöhöm gihiba köna kungen qahö anmangö mötmani, mönö miangöreḡ goaḡgiriga anman.”

19 Jisösnöŋ kezapqetok keu mewö jiba Pitö kömumawaŋgö keu saiŋi indelök. Yaŋön kömup tandökŋi qainŋi kun kömuiga Anutugö qetbuŋaŋi qarimapköra mötmöriba mi jiyök. Keu mi jiba yaŋgöra jii mörök, “Gi mönö kaba ni nuataŋgöba malman!” Mewö.

Jisösnöŋ Pitöbuk gwarek kungö keuŋi eraum mörohot.

20 Pitönöŋ Jisösbuk anda lilingöba Jisösgö wölböt gwarekŋan andönjire kaiga ehök. Gwarek mianön ak-kömukömu lama negeri, miangöreŋ nöropŋan Jisösgö töptöpŋe nariba jiyök, ‘Kembu, göhöreŋ mamalolo azi mi daŋön?’ 21 Gwarek mianön könaŋjire kaiga Pitönöŋ i eka Jisös kewö qesim waŋgiyök, “Kembu, gwarek kiangöra mönö denöwö asuhuma?”

22 Qesim waŋgiiga kewö jii mörök, “Nöŋön yaŋgö malmal areŋi mewö me mewö albilenak, mi mönö göhöreŋ waimanjara qahö. Nöŋön jibiga yaŋön qahö kömumba nöŋön gölmenöŋ lilingöba kama-maŋgö nalöŋe toroqeba jebuk mal öŋgöbawak, keu mi yaŋgö keuya akawak. Gi mönö yaŋgö keuŋi mosöta nangi malmalgi möhamgöba galöm köl aŋguba nöŋgö andöne kaba ni nuataŋgöba malman.”

23 Keu mewö jiiga tosatŋan laŋ möta jim se-higetka urumeleŋ alaurup yengö sutŋine keu mi kewö jim sohoget, “Gwarek mianön qahö kömuma.” Mewö jim sohogetmö, Jisösnöŋ jebuk teteköŋi qahö mal öŋgömapköra qahö jiyökmö, keu kewö jiyök, “Nöŋön yaŋgö malmal areŋi mewö me mewö albilenak, mi mönö göhöreŋ waimanjara qahö. Nöŋön jibiga yaŋön qahö kömumba nöŋön

gölmenöŋ lilingöba kamamaŋgö nalöŋe toroqeba jebuk mal öŋgöbawak, keu mi yaŋgö keuya akawak. Gi mönö yaŋgö keuŋi mosöta nangi malmalgi möhamgöba galöm köl aŋguba malman.” Mewö.

Nanak mi pakpak jenan eka naŋgöba ohom enŋizal.

²⁴ Gwarek mianöŋ yuai mi jeŋan eka mala miangö dop mi naŋgöba jim asariba Ölöwak Buŋa ki ohoyök. Körek pakpak eŋön gwarek miangö könaŋi mötzeanŋöra aka ölop tönguba kewö jiba malme, “Yaŋön keu naŋgöba jiyöhi, mianöŋ mönö keu öl töhöŋŋi akza.”

²⁵ Jisösnöŋ nup aka aŋgöletot tosatŋi sehisehiŋi mi mewöyök aka memba malök. Miengö kösohotŋini mohot mohot mi lökŋanök törörök ohobinak ewö, mönö buk papia böranŋi böranŋi sehisehiŋi asuhugetka kantri dop papia köwe miri (laibreri) pakpak miangöreŋ alinga kokolak qeba ölököiga tiŋi töndup qahö dop kölbawak. Mewö mötmörizal.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 11 Nov 2022 from source files dated 9 Oct 2020

c0871260-68cc-5a50-953f-52200e105d1e